

# **Matyu**

## **I Fye Tulen gablà ku Dyisas Krayst i Sulat Matyu**

*Kafaglabat i libru sulat Matyu*

Libru ani sulat Matyu, satu di dad sfalò lwe gal dek Dyisas, na sulatan ani di là fa falmo i dad to di Roma i syudad Dyérusalém. Di bang Dyisas dini di tah tanà, i dad banwe i dad to Dyu nagot i dad to Roma. I gumdatah mdà di Roma magot i dad to Dyu. Na ani duen dee dad sundalu mdà di Roma mnè di banwe i dad Dyu.

Too malima kagkah i dad Dyu, du dek ale i gumdatah fbayad fafil tanàla klit fali di gubirnu di banwe Roma. Na dekan dademe di dad to Dyu mwè bayad buhis, na taman dademela dad Dyu dmuen dale, na matnù kaflabèla du fdatahla bayad galla nwè.

Matyu satu to di dad gal mwè bayad buhis. Kabay di klak Dyisas kenen du fye mlalò kenen, balingan tnagak i nimoan na laloan.

I libru sulat Matyu ani, sulatan di dademen dad Dyu. Tnulenana ale gablà di dad tdò na i dad mgimò Dyisas. Toon fbangal di dale, Dyisas, to mdà di banwe Nasarét, i too glut Mgalék Dwata santulen Mosis na dad tugad Dwata di sulatla. Du sulatla i fakang Dwata di muna fa feben i To Mgalékan dini di tah tanà, du mebe i dad to Dyu na falwà dale. Na i dad Dyu toola fanden kdohò Dwata fakangan di dale, na fatanla i To Mgalékan.

Taman sulat Matyu libru ani du fye faglut dad Dyu Dyisas i too glut To Mgalék Dwata mebe dale.

*I dad gutambul Dyisas Krayst, i To Mgalék Dwata mebe i kagotan  
(Luk 3:23-38)*

<sup>1</sup> Ani gugsulat i gutambul Dyisas Krayst, i bel Harì Dabid, na i bel Abraham di muna fa.

<sup>2</sup> Abraham i mà Isaak, Isaak i mà Dyékob, Dyékob i mà Dyuda na dad flanekan, <sup>3</sup> Dyuda i mà Féris na Sérah, na i yêla dunan Tamar. Féris i mà Hésron, Hésron i mà Ram, <sup>4</sup> Ram i mà Aminadab, Aminadab i mà Nason, Nason i mà Salmon, <sup>5</sup> Salmon i mà Boas, na i yê Boas dunan Rahab, Boas i mà Obéd, na i yê Obéd dunan Ruth. Obéd i mà Dyési,

<sup>6</sup> Dyési i mà Harì Dabid, Dabid i mà Solomon, na i yê Solomon dunan i yaan Uraya. <sup>7</sup> Solomon i mà Rihoboam, Rihoboam i mà Abadya, Abadya i mà Asa, <sup>8</sup> Asa i mà Dyihosafat, Dyihosafat i mà Dyoram, Dyoram i mà Usaya, <sup>9</sup> Usaya i mà Dyotam, Dyotam i mà Ahas, Ahas i mà Hésékaya, <sup>10</sup> Hésékaya i mà Manasi, Manasi i mà Amon, Amon i mà Dyosaya, <sup>11</sup> Dyosaya i mà Dyékonaya na dad flanekan lagi. Di bang atù i kagakfè na kgebe i dad to mdà di banwe Israél ditù di banwe Babilon.

<sup>12</sup> Di kakella di Babilon, mngà Dyékonaya, na i tingaan dunan Saltiyél. Na Saltiyél i mà Sorubabél, <sup>13</sup> Sorubabél i mà Abayud, Abayud i mà Ilaykim, Ilaykim i mà Asor, <sup>14</sup> Asor i mà Sadok, Sadok i mà Akim, Akim i mà Ilayud, <sup>15</sup> Ilayud i mà Éliasar, Éliasar i mà Matan, Matan i mà Dyékob, <sup>16</sup> Dyékob i

mà Dyosif, i yaan Méri, yê Dyisas i dnagitla Krayst, i To Mgalék Dwata.

<sup>17</sup> Na masdagub nun sfalò fat gumastugad i bel mdà di ku Abraham kel di ku Harì Dabid. Na mdà di ku Harì Dabid kel di kgebe i dad to mdà di Israél salu di Babilon, sfalò fat gumastugad i bella. Na mdà di kgebe dale salu di Babilon kel di ksut Krayst, i To Mgalék Dwata, nun sfalò fat gumastugad i bella.

*I ksut Dyisas Krayst  
(Luk 2:1-7)*

<sup>18</sup> Ani i santulen gablà di ksut Dyisas Krayst. Yéan, Méri, bliwal satu to dnagit Dyosif, bay di là ale fa sdeme gadean tamaltien kenen fagu di Mtiu Tulus Dwata. <sup>19</sup> Na du Dyosif i to matlu, laan mayè ku fyaan Méri di muna i dee dad to, taman én fandaman, kahan Méri di landè to gmadè dun. <sup>20</sup> Kabay di slengan faldam ani, gkudang kenen, na nun kasaligan Dwata msut di kenen fagu di knan, na manan, “E Dyosif, bel Harì Dabid, nang ge likò fasdeme ku Méri, du i kaltienan fagu sa di Mtiu Tulus. <sup>21</sup> Mngà kenen lagi kadang, na i dagitam kenen, Dyisas, du kenen i to falwà i dad ton mdà di dad salàla.”

<sup>22</sup> Na mkel kdee ani, du fye gdohò i gman Dwata fagu di satu tugadan, manan, <sup>23</sup> “Nun kadang satu sawang libun maltien, na mngà kenen lagi. Na én katlola kenen, Imanyuél.” I gumtatek Imanyuél, dunan, “Tadini Dwata samnagin di gito.” <sup>24</sup> Taman di kukat Dyosif nimenan i dek kasaligan Dwata na fasdeme ku Méri. <sup>25</sup> Kabay

laan nutik Méri kel di ksut tingaan lagi. Na di ksut tingaan, én dagit Dyosif dun, Dyisas.

## 2

*I klauy dad to fulung meye i kagu dad blatik di Bétléhém*

<sup>1</sup> Na déén gusut Dyisas di tukay lunsud Bétléhém glam di banwe Dyudiya di bang i kagot Hari Hérod i banwe Dyudiya. Kafnge ksut Dyisas nun dad to too fulung meye kagu i dad blatik kel di syudad Dyérusalém mdà di banwe di gusut i duh. Na manla, <sup>2</sup> “Tanè gumnè i tingà falami sut, én mgimò kadang hari i dad Dyu? Tateenmi di gusut i duh i blatik ilè kakelan. Taman salu gami dini du mangamfù di kenen.”

<sup>3</sup> Na di kaklinge Hari Hérod tasut satu falami hari, too msamuk i nawan kel di kdee dad to di kagotan déén di Dyérusalém. <sup>4</sup> Na én nimoan, fastifunan dad ganlal di kafaglut i dad Dyu, dunan i dad ulu i dad bà di Dwata na i dad to tamdò i dad flalò blé Dwata fagu di ku Mosis, na snalekan ale ku tanè gusut Krayst, i To Mgalék Dwata. <sup>5</sup> Na manla, “Déén di tukay banwe dnagit Bétléhém glam di banwe Dyudiya, du ani sulat i tugad Dwata, manan,

<sup>6</sup> ‘Ge Bétléhém, i tukay lunsud di banwe Dyudiya, balù too tukay ge too mdatah ge di kdee banwe di Dyudiya,

du déén di ge kadang gumdà i satu ulu,

na kenen mifat i dad togu, dad bel Israël.’ ”

<sup>7</sup> Na di kaklinge Hari Hérod i gusut Krayst, fatlon i dad to too fulung meye i kagu dad blatik di landè to gmadè dun, du snalekan ale ku kilen ksut i

blatik. <sup>8</sup> Kgadean dun, dekan ale ditù di Bétlém, manan, “Mdà gamu na tooyu fanngabal i tingà én. Na ku teenyu kenen, samfulê gamu dini du fgadèyu deg i gusablaan, du fye salu agu ditù du mangamfù di kenen.”

<sup>9</sup> Na di kaklingela i gman Hari Hérod, mdà ale. Na teenla i blatik tateenla ditù di gusut i duh magu gsen di munala kel di kfanakan déén di tah i sablà gumnè i tingà. <sup>10</sup> Di kitela i blatik, too ale lehew! <sup>11</sup> Kakella di gumnè teenla i tingà di saféd i yéan Méri, na lkuad ale di munan du mangamfù ale di kenen. Na nukalla dad mabtas nebela du bléla di tingà, dunan blawen, na dad mabtas fangbun dnagit insénso na mira. <sup>12</sup> Kafnge én, mulê ale di banwela, bay mahal dalanla mulê du tafgadè Dwata di dale fagu di kna na fye ku nang ale samfulê di ku Hari Hérod.

*I kila ale Dyosif di banwe Idyif*

<sup>13</sup> Na di kakubu i dad to fulung meye kagu dad blatik, nun kasaligan Dwata lêman msut di ku Dyosif fagu di kna, na manan, “Mték ge, nebem i tingà na yéan, na mila gamu ditù di banwe Idyif, na mnè gamu ditù, du fan fanngabal Hari Hérod i tingà ani du fnatin. Silang gamu mulê ku mangu di gamu.”

<sup>14</sup> Na taman mték Dyosif na neben i tingà na yéan, du mdà ale di butang én salu ditù di Idyif. <sup>15</sup> Na mnè ale déén kel di kfati Hari Hérod. Na fagu déén gdohò i gman Dwata fagu di satu tugadan, manan, “Tlogu tingàgu lamwà fdu di banwe Idyif.”

<sup>16</sup> Na di kaglabat Hari Hérod mafgaw kenen du mdà di nimò dad to fulung meye kagu dad blatik,

too kenen flabè. Taman dekan i dad ton fnati kdee dad ngà lagi falami sut kel di lwe fali i ktuala mnè di banwe Bétléhém na di dademe banwe mdadong déén. Laloan i gman dad to fulung meye kagu dad blatik ku tan i klo mdà di ksut i blatik, du én gugmadean kalnawa tingà fafatin. <sup>17</sup> Na mdà di kfati i kdee dad ngà ani too gdohò i gman Dwata fagu di tugadan Dyérimaya, manan,

<sup>18</sup> “Nun linge to di banwe Rama kamwak na mlanu.

Nngel Rakél i dad ngaan,  
na landè gamlala nawan,

du tamati dad ngaan.”

### *I kulê ale Dyosifdu di banwe Idyif*

<sup>19</sup> Kafnge i kfati Hari Hérode nun kasaligan msut di ku Dyosif déén di Idyif fagu di kna, na manan, <sup>20</sup> “Mték ge, nebem i tingà na yéan, na samfulé gamu di banwe Israél, du tamati i dad to mayè mati i tingà.”

<sup>21</sup> Na taman mték Dyosif, na neben i tingà na yéan mulè di banwe Israél. <sup>22</sup> Kabay di kaklinge Dyosif, na én tlas ku Hari Hérode magot i banwe Dyudiya dunan i tingaan Arkilas, likò kenen mnè ditù di Dyudiya. Na mdà di kafngewe Dwata kenen fagu di kna, baling ale salu di banwe Galili. <sup>23</sup> Na i gumnèla di Galili, dunan i tukay lunsud dnagit Nasarét. Na ani kagdohò i gman Dwata fagu di tugadan, manan, “I katlola kenen, to mdà di Nasarét.”

### 3

#### *Dyan Gal Munyag*

*(Mark 1:1-8; Luk 3:1-18; Dyan 1:19-28)*

<sup>1</sup> Na di file fali kubu, nun to dnagit ku Dyan Gal Munyag kel di banwe landè to mnè déén glam di banwe Dyudiya na tdoan i dad to salu déén di kenen. <sup>2</sup> Na manan, “Msal gamu na tngakyu dad sasè nimòyu, du tamdadong i kagot Dwata.” <sup>3</sup> Na Dyan ani i santulen Dwata fagu di tugadan Isaya di muna fa, manan, “Nun to tamlo di banwe landè to mnè déén, manan, ‘Fatlagadyu i dalan i Amu, na tanluyu i gumagun.’ ”

<sup>4</sup> Na i klaweh lsak Dyan dunan i bul kamél nanem, na i galingan kindal lmanaf. I knaanan tlangas na ttab. <sup>5</sup> Na dee dad to gal salu di kenen mdà di syudad Dyérusalém, na mdà di dademe banwe glam di banwe Dyudiya, na mdà di dad banwe mdadong di yéél Dyordan. <sup>6</sup> Na tulenla kenen i dad salàla, na bnunyag ale Dyan di bong yéél Dyordan.

<sup>7</sup> Kabay di kiten nun dee dad to mdà di lwe bung fnaglut i dad Dyu dnagit Farisi na Sadusi fdadong di kenen du fan fbunyag, manan di dale, “Tay gamu! Salngad gamu i dad ulad mila mdà di lifoh. Simto kè tmulen gamu galwà gamu di flayam blé Dwata ku alò gamu fbunyag? <sup>8</sup> Ku tamsal gamu, fiteyu i ksalyu di dad salàyu fagu di fye nimòyu. <sup>9</sup> Nangyu man, ‘Balù ku là gami msal là gami gakuf di flayam blé Dwata, du gami bel Abraham.’ Tulengu gamu i kaglutan, balù mdà

di dad batu ani gagan Dwata mimò bel Abraham ku kayean tamlas gamu. <sup>10</sup> Na i kukum Dwata too mdadong. Ku fkahito di to mbek kayu, tadéén i balyungan di foon i kayu, du tagatlagad mbek kdee kayu là munge fye bunge, na bat di lifoh.

<sup>11</sup> “I kbunyaggu ani fagu di yéél du ilè tamsal gamu, bay nun to tmadol deg too mdatah fa di deg, taman là agu gablà mebe i talumfaan, du too agu mdanà di kenen. I kbunyagan gamu fagu di Mtiu Tulus na di lifoh. <sup>12</sup> Na santanin dad to tlu na sasè salngad fali tnaaf. Tanagotan i taaf du tmaaf, na i fali tamagtaaf busekan di folan, bay i kdee afa snakufan di lifoh landè kfatin.”

*I kabunyag Dyisas*  
(*Mark 1:9-11; Luk 3:21-22*)

<sup>13</sup> Na salu Dyisas di yéél Dyordan fdu di banwe Galili, du fbunyag ku Dyan. <sup>14</sup> Kabay fan là mayè Dyan munyag kenen, na manan, “Gablà ku ge munyag deg. Kan ku ge baling fbunyag di deg?”

<sup>15</sup> Na tmimel Dyisas, manan, “Faloham i nimòta ani, du fye gimenta i kdee knayè Dwata.” Taman nagin Dyan i knayean, na bnunyagan Dyisas.

<sup>16</sup> Na di kafnge munyag, matun Dyisas mdà di yéél. Na mgukà i langit na teenan i Tulus Dwata fdanà na mdaf di kenen gambet abun. <sup>17</sup> Na nun talù mdà di langit, manan, “Ani tingàgu, toogu kando na too fye nawagu kenen.”

## 4

*I ktilew Satanas ku Dyisas*  
(*Mark 1:12-13; Luk 4:1-13*)



<sup>1</sup> Na kafnge én, nebe Tulus Dwata Dyisas salu di banwe landè to mnè déén, du fye tnilew kenen Satanas. <sup>2</sup> Na di fat falò duh na butang là kmaan Dyisas, taman too bitil kenen. <sup>3</sup> Na fdadong di kenen Satanas du tnilewan, na manan, “Ku ge Tingà Dwata, fanbalingam fan dad batu ani.”

<sup>4</sup> Kabay tmimel Dyisas, manan, “Nun gsulat di Tnalù Dwata, manan, ‘Ise ku alò knaan gamto i to, bay lê gamto i kat talù man Dwata.’ ”

<sup>5</sup> Kafnge én, nebe Satanas Dyisas di syudad Dyérusalém na ftadagan kenen di sen tah i Bong Gumnè Dwata. <sup>6</sup> Na manan di kenen, “Ku ge Tingà Dwata, na kamyaf ge mdà dini, du nun gsulat di Tnalù Dwata, manan, ‘Dek Dwata i dad kasaliganan mifat ge.

Snilungla ge i dad kmalla, du fye là gtudà di batu i bliam.’ ”

<sup>7</sup> Kabay tmimel Dyisas, manan, “Nun lê gsulat di Tnalù Dwata, manan, ‘Nangam tnilew Amum Dwata.’ ”

<sup>8</sup> Na lêman nebe Satanas kenen ditù di satu too mdatah bulul, na fiten kenen i kdee banwe nagot i dad to di tah tanà na i bong kafyela. <sup>9</sup> Na manan di ku Dyisas, “Blégu di ge i kdee teenam ani ku lkuad ge du mangamfù di deg.”

<sup>10</sup> Kabay tmimel Dyisas, manan, “Nang ge dini Satanas! Gsulat di Tnalù Dwata, ‘Fnangamfuam Amum Dwata, na kenen alò i nimenam.’ ”

<sup>11</sup> Na tnagak kenen Satanas, na nun dad kasaligan Dwata salu di kenen du nifatla.

*I katbù nimò Dyisas  
(Mark 1:14-15; Luk 4:14-15)*

<sup>12</sup> Na di kaklinge Dyisas tabnilanggùla Dyan Gal Munyag, samfulê kenen di banwe Galili. <sup>13</sup> Kabay là kenen mnè di Nasarét, bay mili kenen di satu lunsud dnagit Kafernaum di kilil i bong lanaw Galili mdadong di dad banwe Sibulun na Néftali. <sup>14</sup> Na fagu di knean déén, gdohò i gman Dwata fagu di tugadan Isaya, manan,

<sup>15</sup> “I dad banwe Sibulun na Néftali,  
dunan i gumnè i dad to ise Dyu,  
mdadong di lanaw Galili  
di faltù i yéél Dyordan.

<sup>16</sup> Na i dad to déén,  
balù tagnè ale mnè di gukmifun,  
tamite ale i bong kalwa.

Balù mlo ale mnè di kakifu i fati,  
tanun kagalwàla.”

<sup>17</sup> Na mdà di bang éñ, tambù Dyisas tamdò, manan, “Msal gamu, na tñagakyu i dad sasè nimòyu du tamdadong i kagot Dwata.”

*I kalék Dyisas i fat to gal mwè nalaf  
(Mark 1:16-20; Luk 5:1-11)*

<sup>18</sup> Na satu duh magu Dyisas di kilil i bong lanaw Galili, na teenan lwe lagi saflanek, Simon i dnagitla Fiter na Andru. Mukut ale di lanaw, du ale i dad to gal mwè nalaf. <sup>19</sup> Na man Dyisas di dale, “Magin gamu deg, du balù ani galyu nimò meye nalaf, tdòta gamu meye i dad to du fye mlalò ale deg.” <sup>20</sup> Na di kmanan ani, tagakla i fukutla, na magin ale kenen.

<sup>21</sup> Na di slengla magu teen Dyisas lwe lagi saflanek dnagit Dyém na Dyan, i dad ngà Sébidi. Déén ale di awengla magin i màla. Tambél ale i fukutla. Na di kite Dyisas dale tlon ale du faginan, <sup>22</sup> na tngakla awengla na màla du magin ale ku Dyisas.

*I katdò Dyisas di dad banwe di Galili*  
(Luk 6:17-19)

<sup>23</sup> Na lamngab ale Dyisas di dad banwe glam di Galili, du tamdò kenen di dad gal gusatdò dad Dyu i Fye Tulen gablà di kagot Dwata. Na fanguléan kdee bung tduk i dad to na dad gukulang i lawehla. <sup>24</sup> Na too mbel i santulen gablà di kenen di klamang banwe Sirya, taman nebela di kenen i kdee dad to nun dad sahal bung tduk, na dad to maflayam du mdà di sasè katduk, na dad to nun busaw, dad to bnabuy, na dad to là galyak lawehla, na fangulé Dyisas i kdeela. <sup>25</sup> Na too dee dad to mlalò kenen, dademe mdà di Galili, na mdà di dad sfalò banwe dnagit Dikafolis, na dademe mdà di syudad Dyérusalém na mdà di klamang Dyudiya na dademe mdà di dad banwe di faltù i bong yéél Dyordan.

## 5

*I katdò Dyisas di tah bulul*  
(Luk 6:20-23)

<sup>1</sup> Na satu duh, di kite Dyisas i kdee dad to, mnagad kenen di bulul, na ditù gusudengan. Na stifun di safédan i dad to gal mlalò kenen. <sup>2</sup> Na tambù kenen tamdò dale, manan,

- 3 “Nun kafye i dad to dmlè là ale gmagan mlalò  
Dwata ku ise mdà di tabengan,  
du gakuf ale di kagotan.
- 4 Nun kafye i dad to mlidù,  
du nlala ale Dwata.
- 5 Nun kafye i dad to fdanà i ktola,  
du gdawatla i tafakang Dwata di dale.
- 6 Nun kafye i dad to bitil na malinum i katlu  
Dwata,  
du fabsolan ale kadang.
- 7 Nun kafye i dad to kamdo i dademela to,  
du kando ale Dwata.
- 8 Nun kafye i dad to matlu i nawala,  
du site ale kadang Dwata.
- 9 Nun kafye i dad to smafye i dademela to,  
du matlo ale dad ngà Dwata.
- 10 Nun kafye i dad to fanlayam mdà di matlu  
nimòla,  
du gakuf ale di kagot Dwata.
- 11 “Nun kafyeyu ku nadoy gamu i dad to, na  
fanlayam gamu, na ku dnalamlà gamu di kdee  
bung sasè làyu nimò du mdà di ksatuyu di deg.
- 12 Salngad ani i kaflayamla dad tugad Dwata di  
muna, taman too gamu flehew du bong untungyu  
kadang di langit.

*Flingen Dyisas di kahì na salò i dad to Dwata  
(Mark 9:50; Luk 14:34-35)*

- 13 “Gamu dad togu, di kagbolyu di dad to di tah  
tanà gambet gamu i kahì du gamu gumdà i kafye  
di dale. Kabay ku magwè i nem i kahì, talandè kibò  
fye fasfulê i neman. Na ku én knè i kahì talandè  
gukmamu dun, tatì alò bat na ndà i dad to.

14 “Na di kagbolyu di dad to di tah tanà lê gamu gambet i salò. Ku fkahta di lunsud, ku ditù gugnean di tah i bulul là gbuni dun. 15 Na i to mtam i salò, laan snukub dun. Bay ku ntaman i salò, toon fagfan gufkahan, du fye mite i kdee dad to. 16 Salngad éngamu, tooyu fneng i salòyu di kdee dad to, du fye teenla dad fye nimòyu, na dnayenla i Màyu di langit.”

*I tdò Dyisas gablà di kimen dad flalò Dwata*

17 Na man fa Dyisas, “Nangyu fandam ku i duengu salu dini di tah tanà, du kayègu fnang dad flalò blé Dwata fagu di ku Mosis na i tdò i dad tugadan. Làgu sa fnang, bay fitegu i glut kimen dun. 18 Tulengu gamu i kaglutan, di klo i nun tanà na langit, landè lana di flalò Dwata balù tukay du mti gdohò i kdee. 19 Na taman balù simto mlafà balù alò satu flalò Dwata, na léan tdò di demen dad to i klafà dun, mdanà kenen di kdee to di kagot Dwata di langit. Kabay ku simto mimen kdee flalò Dwata na tdoan di demen to i kimen dun, too kenen mdatah to di kagot Dwata di langit. 20 Taman mangu di gamu silang gamu gakuf di kagot Dwata ku mdatah fa i katluyu di katlu i dad to tamdò i flalò Dwata na i dad Farisi di kimenla i flalò Dwata.”

*I tdò Dyisas gablà di kaflabè*

21 Na fadlug Dyisas tamdò, manan, “Talingeyu i gal tdò di dad to di muna fa, manan, ‘Nang gamu manò, na ku simto manò, nebeyu di gumukum du fye nukum.’ 22 Kabay ani mangu fa di gamu, balù simto to flabè i demen to gablà nukum di gal gumukumyu. Na lêman i to smilo i demen to, gablà

nukum di dad mdatah mukum. Na lêman i to ku manan, ‘Landè kamu ge,’ du mdà di kalbutan satu to, gablà kenen fanlayam Dwata di lanaw lifoh.

<sup>23</sup> “Taman ku tadéén ge di gudamsù di Dwata, na nun fanam blé di Dwata, bay nun gafaldamam salà tamgimoam di demem to, <sup>24</sup> funam tngak i blém na mdà ge salu di to én na fnafyem klom samfulê du mlé i dsuam di Dwata.

<sup>25</sup> “Na ku nun to fsalà ge na neben ge di usay fye ku funa gamu stulen alò gamu du fye gasil sulê di gusafyeyu di là gamu fa gafat di ganlal, du ku takel ge ditù, ken blén ge di to mukum du kenen gmadè ku tan kiboan ge. Na i to mukum blén ge di dad fulis na i fulis fbilanggù ge. <sup>26</sup> Na tulengu gamu i kaglutan, ku mkel ani di ge, silang ge galwà di bilanggù ku taftim bnayad i salaam.”

### *I tdò Dyisas gablà di klafà i yaan*

<sup>27</sup> Na fadlug Dyisas tamdò, manan, “Talingeyu i gal tdò manan, ‘Nang ge mlafà i yaanam.’ <sup>28</sup> Kabay ani mangu di gamu, balù simto to meye di satu libun ise yaanan na nibalan tagamsalà kenen du tanlafaan yaanan di fandaman. <sup>29</sup> Taman ku i matam kwanan mebe ge di kimò sasè, baling fye fa ku tanwilam na Batam, du fye là ge fles mimò sasè. Fye fa ku lana satu matam na nun nawam landè sen, di sikof i laweham na baling ge bat di lanaw lifoh. <sup>30</sup> Na lêman ku i kmalam gsen di kwanan mebe ge di kimò sasè, baling fye fa ku kanlangam na Batam, du fye là ge fles mimò sasè. Fye fa ku lana satu alel di laweham di sikof i laweham, bay baling ge gsalu di lanaw lifoh.”

*I tdò Dyisas gablà di kakah i yaan*  
(*Matyu 19:9; Mark 10:11-12; Luk 16:18*)

<sup>31</sup> Na man Dyisas fa, “Na nun gal tdò di muna fa, ‘Balù simto to mkah i yaanan, là fakay ku laan blé di kenen i fafil gugmadè takahan kenen.’ <sup>32</sup> Kabay ani mangu di gamu, balù simto lagi mkah i yaanan i là mlafà kenen gamsalà di Dwata, du i kakahan kenen gumdà i yaanan mlafà kenen ku lêman mwè yaan i libun kahan. Na i lagi mwè i libun takah ani lê gakuf kenen di kagsalaan.”

*I tdò Dyisas gablà di ksafà*

<sup>33</sup> Na fadlug Dyisas tamdò, manan, “Talingeyu i gal tdò di dad to, manan, ‘Ku smafà ge, nang tmulen kéng, bay toom dnohò i fakangam di Dwata.’ <sup>34</sup> Kabay ani mangu di gamu, nang gamu smafà. Hae, nang gamu smafà fagu di langit, du én sa i gusudeng Dwata di kagotan. <sup>35</sup> Na nang gamu smafà fagu di tanà, du én gumdà i blian. Na nang gamu smafà fagu di Dyérusalém, du én sa syudad Dwata i too mdatah hari. <sup>36</sup> Na nang gamu smafà fagu di uluyu, balù sbalu wakyu làyu gagan fbukay ku demen fafitam. <sup>37</sup> Kabay di ktimelyu ku mayè gamu, manyu ‘hae’, na ku là gamu mayè, manyu ‘là’, du ku smafà gamu fa én ksafà tnùyu fdu di ku Satanas.”

*I tdò Dyisas gablà di kbalas*  
(*Luk 6:29-30*)

<sup>38</sup> Na man Dyisas fa, “Talingeyu i gal tdò di dad to, manan, ‘Ku nun to fatduk i satu matayu, fatdukyu satu kenen mata. Na ku nun to falmo satu kifanyu, lèyu falmo satu kifanan.’ <sup>39</sup> Kabay ani i mangu di gamu, nang gamu malas sasè di to

mimò sasè di gamu. Kaflingenta dun ku nun to smamfak gamu di bali bawehyu di kwanan, lêyu nà i balin du fsamfakyu kenen. <sup>40</sup> Ku nun to mebe gamu di usay, du fye gwean saulyu, lêyu blé kenen i tahà sigalyu. <sup>41</sup> Na ku nun to mleges gamu mebe i knakifan kel di kawag i satu kilumitru, nebeyu kel di lwe. <sup>42</sup> Na ku nun to mni di gamu, banléyu kenen, na fandemyu i to mayè mdem di gamu.”

*I tdò Dyisas gablà di kakdo di dad to dmuen ge  
(Luk 6:27-28, 32-36)*

<sup>43</sup> Na fadlug Dyisas tamdò, manan, “Talingeyu i gal tdò di dad to, manan, ‘Kandom i dad demem sgalak, na knangam nawa,’ kun, ‘i dad to dmuen ge.’ <sup>44</sup> Kabay ani mangu di gamu, kandoyu i dad dmuen gamu, na dnasalyu i dad to mlayam gamu. <sup>45</sup> Na ku ani nimòyu too dnile dad to na gamu dad ngà i Màyu di langit, du Dwata là alò di dad to matlu i gufnengan i duh na gumlén i ulen bay balù di dad to i là matlu na mimò sasè. <sup>46</sup> Nangyu fandam ku nun untung blé Dwata gamu ku én alòyu kando i dad to kamdo gamu. Landè gusahal i nimòyu di nimò dad to sasè gambet dad to gal mwè bayad buhis, du galla kando i dad to kamdo dale. <sup>47</sup> Na salngad én, ku alò én gustulenyu i dademeyu sgalak landè gusahal i nimòyu di nimò dad to là gmadè Dwata, du balù dad to là gmadè Dwata stulen ale di dademela sgalak. <sup>48</sup> Taman tooyu snikof i kakdoyu di kdee dad to, du fye sikof i katluyu salngad di Màyu di langit.”

## 6

*I tdò Dyisas gablà di kablé di Dwata*



<sup>1</sup> Na fadlug Dyisas tamdò, manan, “Di kimòyu i dad nimòyu di Dwata too gamu fgeye, du fye ise én duenyu mimò dun du fite di dademe to, du ku én nimòyu, landè untung gdawatyu mdà di Màyù di langit.

<sup>2</sup> “Taman ku nun tabeng bléyu di dad to landè knun, nangyu fgaðè dun gambet i nimò dad to gal mféw di tafan ale mlé déén di gudee dad to di gal gusatdoito na di kilil dalan, du alòla kayè ku dag i dad to i nimòla. Na tulengu gamu i kaglutan, alò kdag i dad to gusen i untungla. <sup>3</sup> Kabay gamu, ku nun bléyu di dad to landè, nangyu fgaðè balù di dademeyu sgalak, <sup>4</sup> du fye gbuni i kabléyu, na i Màyù di langit i mite kdee nimòyu di gugbunin, kenen sa i mlé gamu untung.”

*I tdò Dyisas gablà di kdasal*  
(Luk 11:2-4)

<sup>5</sup> Na fadlug Dyisas tamdò, manan, “Ku dmasal gamu di Dwata nangyu ganbet i dad to flingu ale fye to. Ku dmasal ale, too ale mayè tadag di gal gusatdoito dad Dyù, na di kilil i dalan fye teen dad to i nimòla. Na tulengu gamu i kaglutan, alò kdag i dad to gusen i untungla. <sup>6</sup> Kabay gamu, ku dmasal gamu fusuk gamu di sibayyu na tnakabyu, na dmasal gamu di Màyù i là teen. Na i Màyù mite kdee nimòyu di gugbunin, kenen sa i mlé gamu untung.

<sup>7</sup> “Na ku dmasal gamu nangyu fandee i manyu landè gukmamu gambet nimò i dad to dmasal di dad ise glut dwata,\* du fandamla too ale fanlinge

---

\* **6:7** Satu kubad ani dunan, dad to là gmadè Dwata.

ku fantahàla i dasalla. <sup>8</sup> Nangyu ale ganbet du tasana gadè i Màyu i kanlidùyu di là gamu fa mni di kenen. <sup>9</sup> Kabay gambet ani i fye kdasalyu, Mami déén di tah langit,

kayèmi moon ku kdee dad to mangamfù di ge.

<sup>10</sup> Kayèmi ku ge magot i kdee dad to, na ku gdohò i kdee knayeam dini di tah tanà salngad kagdohoan déén di langit.

<sup>11</sup> Blém gami gablà knaanmi di duh ani.

<sup>12</sup> Na nlifetam i dad salàmi, salngad klifetmi salà i dad to gamsalà di gami.

<sup>13</sup> Nangam faloh di gami i dad tilew gamgebe gami di salà, bay falwaam gami di ku Satanas gumdà i kdee sasè.

<sup>14</sup> “Na ku nlifetyu salà i dademe to gamsalà di gamu, nlifet i Màyu di langit gamu salà. <sup>15</sup> Kabay ku làyu nlifet salà i demeyu to là nlifet i Màyu di langit gamu salà.

### *I tdò Dyisas gablà di kafwasa*

<sup>16</sup> “Na ku fwasa gamu, nangyu flidù bawehyu gambet i dad to gal flingu ale fye to, du én nimòla fitela di bawehla na too ale bitil,† du fye dilè i dad to fwasa ale. Tulengu gamu i kaglután, alò kdag i dad to gusen i untungla. <sup>17</sup> Kabay gamu ku fwasa gamu samwat gamu na lngauf, <sup>18</sup> du fye landè dad

---

† **6:16** Di bang Dyisas mto satu nimò dademe to fwasa, snafangla ulula, ku demen kahla abu di ulula na nusing i bawehla du fite di dad to fwasa ale. Dademe to gal bayà malob na samwat du fite i kafwasala. Kayè Dyisas di kimoito di Dwata, ise duenito mimò dun du fye dag i dad to nimoito, bay kayean ku nimoito dun mdà di kbrong nawaito Dwata.

to dmilè i kafwasayu. Na i Màyu di langit i là teen mite i kdee nimòyu di gugbunin, na kenen i mlé gamu untung.”

*I tdò Dyisas gablà di knunito*

*(Luk 11:34-36; Luk 12:22-34; Luk 16:13)*

<sup>19</sup> Na fadlug Dyisas tamdò, manan, “Nang gamu samtifun knun dini di tah tanà, du alò falmo i kanok na tnéé ku demen tnaku i dad to. <sup>20</sup> Kabay én gusamtifunyu knun ditù di langit, du ditù landè kanok gafalmo dun na laan tnéé, na landè to gfusuk du tmaku dun. <sup>21</sup> Hae, du ku nè gusamtifunyu i knun tooyu knabas, én sa gumnè i nawayu.

<sup>22</sup> “I matayu gambet i salò di lawehyu. Ku fye i keyeyu fakayyu man matlu i fandamyu, na gambet langub lwa klamang lawehyu, <sup>23</sup> bay ku sasè i keyeyu, sasè fandamyu na gambet langub kifu klamang lawehyu. Na ku sasè i keyeyu na fandamyu too gamu mnè di gukmifun.

<sup>24</sup> “Landè kibò flifan di lwe amu, du ku lwe amu satu to knangan nawa satu na kanbongan nawa satu ku demen nimenan satu na snilon satu. Ku too bong nawayu i knun na làyu gimen Dwata du landè kibò flifan di lwe.†

*I kifat Dwata dad to smalig di kenen*

*(Luk 6:22-31)*

<sup>25</sup> “Taman ani mangu di gamu, nangyu fsamuk i nawayu gablà di knèyu dini di tah tanà, i galyu knaan na ninum, na gablà di lawehyu ku tan klaweh galyu lsak. Mabtas fa i nawata di knaan, na i lawehta di klaweh. Na ku gablé Dwata di

---

† **6:24** Satu kubad ani dunan, Landè kibò flifan di Dwata na i knun.

gamu i lawehyu na nawayu, kan ku fsamukyu nawayu gablà di knaan na klaweh?

<sup>26</sup> “Fandamyu dad anuk di bnas mayeng di langit. Là ale mla ku demen kamtu, landè fol gumsekla i ulê i flala, bay fankaan ale i Màyü di langit. Na gamu too mabtas fa di dad anuk. <sup>27</sup> Nun kè di gamu tmugad i klawilan balù tukay fagu di kafsamuk i nawan gablà di kliduan? Landè sa. <sup>28</sup> Na tan fa ku fsamukyu nawayu gablà di klawehyu? Fandamyu dad bulek di bnas, ku tan kibò ktabòla. Là ale faflayam meye klidùla na là ale mimò klawehla. <sup>29</sup> Kabay ani mangu di gamu, balù Hari Solomon di too nun knunan, landè klawehan gasngad di kafye baweh i satu bulek nimò Dwata. <sup>30</sup> Na fandamyu, landè kabtas dad bulek di bnas mto duh ani bay fayah mlanas na bat di lifoh. Ku kanlaweh Dwata i dad bulek di kafye én, laan gamu kè kanlaweh du too gamu mabtas? Tay, too tukay i ksaligyu! <sup>31</sup> Taman nangyu fsamuk nawayu, na nangyu man, “Tanè gumwèmi i knaanmi? Tanè gumwèmi ninummi? Tanè gumwèmi klawehmi?” <sup>32</sup> Hae, du én nimò dad to là gmadè Dwata du toola fanngabal kdee ani, bay i Màyü di langit tasana gmadè i kdee klidùyu. <sup>33</sup> Kabay gamu, ani nimòyu, funayu fdatah di nawayu kagot Dwata gamu, na klalòyu katlun, na blén di gamu kdee kanlidùyu. <sup>34</sup> Taman nangyu fsamuk nawayu gablà di klidù fayah, du dee i dad klidù di mduh ani. Silangyu fandam i dad klidùyu ku takel.”

*I tdò Dyisas gablà di kukum i demem to  
(Luk 6:37-38, 41-42)*

<sup>1</sup> Na fadlug Dyisas tamdò, manan, “Nang gamu mukum i demeyu to, du fye là gamu nukum Dwata. <sup>2</sup> Ku tan i ukumyu demeyu to salngad i ukum Dwata gamu, na ku tan kablat ukumyu i demeyu to salngad kablat ukum Dwata gamu.

<sup>3</sup> “Kan ku neyem i tukay salà gambet fuling di mata i demem to, bay tatiam bayà i bong salà gambet i bateng di ge mata? <sup>4</sup> Na kan ku manam, ‘Nwègu kun i fulingam,’ na blaam nun bong bateng di ge mata. <sup>5</sup> Tay, tati ge flingu fye to, funam nwè i bong bateng di ge mata, du fye, fye kitem di kweam fuling di mata i demem to.

<sup>6</sup> “Na di ktulenyu i kaglut Dwata, ku nun to là mayè flinge nangyu fadlug tulen di dale. Hae, nangyu blé di dad ayem i nfun Dwata du kenla gamu baling nakét. Na nangyu bat di dad sdè dad too mabtas du balingla sa sandà.

*I tdò Dyisas gablà di kafni di Dwata  
(Luk 11:9-13)*

<sup>7</sup> “Mni gamu di Dwata, na banlén gamu, mngabal gamu na fiten di gamu i fanngabalyu, na mbal gamu fusuk na lanwan di gamu i takab. <sup>8</sup> Du balù simto mni di Dwata, gamdawat sa kenen, na balù simto mngabal, fite Dwata di kenen i fanngabalan, na balù simto mbal fusuk, lanwa Dwata di kenen i takab.

<sup>9</sup> “Gamu dad lagi nun dad ngà, ku mni dad ngàyu fan, bléyu kè batu? <sup>10</sup> Ku mni nalaf, bléyu kè ulad? Là sa. <sup>11</sup> Balù tagnè gamu dad gamsalà, knean fulung gamu mlé fye di dad ngàyu. Mdatah fa déén

i kfulung Màyu di langit mlé kafye di dad mni di kenen.”

*I glut gumtatek i kdee flalò Dwata di dad to  
(Luk 6:31)*

<sup>12</sup> “Na ku tan kayèyu nimò i demeyu to di gamu, én nimòyu di dale, du én sa i gumtatek kdee flalò blé Dwata fagu di ku Mosis na i tdò i dademe tugadan.”

*I lwe dalan nalék dad to  
(Luk 13:24)*

<sup>13</sup> Na fadlug Dyisas tamdò, manan, “Neyeyu du fye fusuk gamu di fital dalan salu di nawa landè sen, du mabal i gufusuk na too mula kagu déén di dalan salu di lanaw lifoh, na too dee dad to magu déén. <sup>14</sup> Kabay i dalan salu di nawa landè sen too fital i gufusukan na too malima nagu, na là dee to mite dun.”

*I dad ise glut tugad Dwata dilè di nimòla  
(Luk 6:43-44)*

<sup>15</sup> Na fadlug Dyisas tamdò, manan, “Too gamu fgeye du nun dad to flingu ale tugad mdà di Dwata. Salu ale di gamu gambet dad mnamal lmanaf bilibili, bay i too glut kagkahla salngad di labè ayem di bnas gal falmo. <sup>16</sup> Én gudmilèyu ku fye ale di ulè nimòla, salngad di dad munge dilè di bungela. I walad banal là munge i bunge grép, na i samfinit là munge i bunge fig. <sup>17</sup> Salngad én, i fye kayu, munge fye, na i sasè kayu, munge sasè. <sup>18</sup> I fye kayu là gambunge sasè, na i sasè kayu là gambunge fye. <sup>19</sup> Na gukel kdee kayu là munge fye, nbek na ntam. <sup>20</sup> Taman én gudmilèyu i dad ise glut tugad Dwata fagu di dad sasè nimòla.

*I dad to là dilè Dyisas di fulé duh*  
(Luk 13:25-27)

<sup>21</sup> “Di kdee dad to tamlo deg, ‘Amu,’ là ku i kdeela gfusuk di kagot Màgu di langit. Én alò gfusuk i dad to mimen i knayean. <sup>22</sup> Di kakel i duh kukum kadang, dee dad to fakdo di deg, manla, ‘E Amu, làmi kè tdò i Tnalù Dwata, na fagu di dagitam falwàmi dad busaw, na gamgimò gami i dee tnikeng.’ <sup>23</sup> Kabay é n mangu di dale, ‘Làta gamu dilè. Fawag gamu di deg, du gamu dad to mimò sasè.’

*I fléd tdò Dyisas gablà di lwe to fdak gumnè*  
(Luk 6:47-49)

<sup>24</sup> “Na taman kat to mlinge i dad tdògu na mimen dun, salngad ale di to too fulung faldam du déén gufdakan gumnean di bong batu. <sup>25</sup> Na kel i bong ulen, na dmunuk na mbal i bong nus fsalu di gumnean, bay laan fugen du déén gugafdak i dad lahan di tah batu. <sup>26</sup> Kabay kat to mlinge i tdògu, bay là mimen dun, salngad kenen di satu to là fulung faldam du déén gufdakan gumnean di falak. <sup>27</sup> Na kanto mulen na dmunuk na mbal i bong mgal nus fsalu di gumnean, tati fugen na mti malbà.”

<sup>28</sup> Na kafnge kman Dyisas ani too tikeng i kdee dad to di katdoan, <sup>29</sup> du too nun glalan di katdoan, là salngad di katdò i dad tamdò i dad flalò blé Dwata fagu di ku Mosis.

## 8

*I kafgulé Dyisas i to tanfig*  
(Mark 1:40-45; Luk 5:12-16)

<sup>1</sup> Na di kasol Dyisas mdà di bulul gutamdoan, too dee dad to mlalò kenen. <sup>2</sup> Na nun satu lagi tanfig fdadong di kenen, na lkuad di munan, manan, “Amu, ku beg ge mayè gaganam fglulê deg di tduk fagsik deg ani.”

<sup>3</sup> Na nagot Dyisas kenen, manan, “Mayè agu sa. Mgulê ge nan.” Na too glut, tamgulê i tfigan. <sup>4</sup> Na man Dyisas di kenen, “Nangam tulen ani di balù simto to, bay én nimoam mdà ge, na fitem laweham di bà di Dwata na nebem di kenen i dsù di Dwata fgadè ku Mosis, du én i gugmadè i dad to too glut tamgulê ge.”

*I kagulê Dyisas i lifan satu kafitan sundalu mdà di banwe Roma  
(Luk 7:1-10)*

<sup>5</sup> Na salu Dyisas di lunsud Kafernaum. Kakelan déén nun satu kafitan dad sundalu mdà di banwe Roma smite kenen du mni tabeng, <sup>6</sup> manan, “Amu, én lifangu tatì milè di gumnègu du là galyak lawehan na too sasè kaflayaman.”

<sup>7</sup> Na man Dyisas di kenen, “Salu agu ditù du fye fangulêgu kenen.”

<sup>8</sup> Kabay man i kafitan, “Amu, là agu gablà ku fusuk ge di gumnègu. Alò ge talù na mgulê i lifangu. <sup>9</sup> Gadègu ani, du balù agu mdanà di dad mdatah ganlal, nun sa dad sundalugu mdanà fa di deg, na ku nun dekgu mdà, mdà sa. Na ku dekgu salu dini, na gasil salu dini. Na ku nun dekgu lifangu mimò balù i tan déén, nimoan. Mdatah fa ge, ku nun manam, mgimò sa.”

<sup>10</sup> Kaklinge Dyisas i manan, too kenen tikeng, na man Dyisas di dad to mlalò kenen, “Tulengu gamu i kaglukan, landè fa to teengu di bel Israél



salngad ani i bong kafaglutan. <sup>11</sup> Na ani mangu gamu, kadang di fulé duh, nun dee dad to ise Dyu kel mdà di klamang banwe, mdà di gusut i duh na di gusdapan, na kmaan ale di saféd ale Abraham, Isaak, na Dyékok di kagot Dwata di langit. <sup>12</sup> Kabay dee dad Dyu gakuf moon di kagot Dwata du bel Israél, bay balingan ale bat di lwà di gukmifun, déén di gumlanula na gukminggat i kifanla.”

<sup>13</sup> Na lêman talù Dyisas di kafitan dad sundalu, manan, “Fakay ge mulê, du tamgimò i fnaglutam.” Na glut sa, du salngan di kman Dyisas dun, tamgulê i lifan kafitan i dad sundalu.

*I kfgulê Dyisas i tewe Fiter na dademe dad to  
(Mark 1:29-34; Luk 4:38-41)*

<sup>14</sup> Kafnge éen salu ale Dyisas di gumnè Fiter. Di kfusukan teenan i tewe Fiter libun milè déén du too minit i lawehan. <sup>15</sup> Na fdadong Dyisas na nagotan i kmalan, na magwè i initan. Na gasil kenen mték, na fles mlé kenen knaan.

<sup>16</sup> Na di kasdaf i duh, nebe i dad to di ku Dyisas dee dad to nun busaw, na falwaan i dad busaw fagu alò di taluan na fanguléan i kdee nun tduk.

<sup>17</sup> I nimò Dyisas ani dunan i gman Isaya, i tugad Dwata, manan,  
“Kenen mwè dad lyaloito,  
na fgulê dad tdukito.”

*I klalò ku Dyisas  
(Luk 9:57-62)*

<sup>18</sup> Na di satu duh, teen Dyisas too dee dad to stifun di safédan, taman manan di dad gal mlalò kenen, “Mifal ito i lanaw.” <sup>19</sup> Na di là ale fa mdà nun satu to gal tamdò dad flalò blé Dwata fagu di

ku Mosis fdadong di kenen, na manan, “To Tamdò, magin agu ge balù nè gusalum.”

<sup>20</sup> Na man Dyisas di kenen, “Fandamam i kalima di klalò deg, du i dad tuyun, nun ilib gumulêla, na dad anuk di bnas, nun fulalla, bay deg, i dnagit Tingà To, balù gumilègu, landè.”

<sup>21</sup> Na nun satu to gal mlalò ku Dyisas, manan di kenen, “Amu, faloham agu mulê funa du lbanggu mà.”

<sup>22</sup> Kabay man Dyisas, “Bayaam i tamati. Én lambang dun i dad to mati, i dad to là fa gamfun nawa landè sen. Kabay ge, fles ge mlalò deg.”

*I kngak Dyisas i nus na lwek  
(Mark 4:35-41; Luk 8:22-25)*

<sup>23</sup> Na kafnge énn, myak Dyisas di aweng na magin dad to gal mlalò kenen. <sup>24</sup> Na di kifalla i lanaw nkel ale i bong mgal nus di talà na maglam lwek i awengla, na fan fnò yéél. Kabay Dyisas, kudang. <sup>25</sup> Taman fdadong dad mlalò kenen, du nukatla, manla, “E Amu, ttabengam gami! Tafan ito galnab, mlimas ito kadang!”

<sup>26</sup> Na man Dyisas, “Kan ku likò gamu? Tukay kadì i ksaligyu.” Na tadag kenen na nngakan i nus na dad lwek, na mbaling too lanél i lanaw.

<sup>27</sup> Kite dad lagi énn, too ale tikeng, na sasalek ale, manla, “Tan bung to ani? Balù nus na lwek mimen kenen.”

*I kafalwà Dyisas dad busaw  
(Mark 5:1-20; Luk 8:26-39)*

<sup>28</sup> Kakel ale Dyisas di banwe Gadara di faltù i lanaw, nun gsitongan lwe lagi nun busaw. Lamwà ale mdà di dad ilib gulambang i dad to. Na too

ale labè, na taman landè to gal magu déén. <sup>29</sup> Na di ksitongla ku Dyisas mkit ale, manla, “Ge Tingà Dwata, tan i kiboam gami? Salu ge dini kè, du fanlayamam gami balù ise fa bangan?”

<sup>30</sup> Na nun dee dad sdè nifat samwel mdadong déén. <sup>31</sup> Na fakdo i dad busaw, manla, “Ku falwaam gami, dekam gami fusuk di dad sdè ditù.”

<sup>32</sup> Na man Dyisas, “Na, ditù gamu.” Taman lamwà ale di lwe to éñ, na fles fusuk di dad sdè. Na i kdee dad sdè mti mila masol di bilil na gtufa di lanaw, na sdulê mlimas.

<sup>33</sup> Di kite i dad to mifat i dad sdè ani, mila ale salu di lunsud, na tulenla kdee mgimò di dad sdè na di dad lagi nun busaw. <sup>34</sup> Na kdee dad to mdà di lunsud mlinge ani, salu ale ditù di ku Dyisas. Di kitela kenen fakdo ale fye ku tngakan i banwela.

## 9

### *I kafgulê Dyisas i to là galyak lawehan (Mark 2:1-12; Luk 5:17-26)*

<sup>1</sup> Na myak ale Dyisas lêman di aweng du salu di faltù i bong lanaw, du samfulê kenen di banwe galan gumnè. <sup>2</sup> Kulê Dyisas nun dad lagi kel. Nun nebela di kenen i to là galyak lawehan, milè di igeman. Na di kite Dyisas i bong kafaglutla di kenen, manan di to là galyak, “E Tò, fangalam i nawam. Tamaglifet dad salaam.”

<sup>3</sup> Di kaklinge i dad tamdò dad flalò blé Dwata fagu di ku Mosis i man Dyisas, manla di ktola, “Tay, to ani, falmon dengeg Dwata di gmanan éñ.”

<sup>4</sup> Kabay gadè Dyisas i kdee mnè di fandamla, na manan di dale, “Kan ku sasè i fandamyu? <sup>5</sup> Nè i too malima man, ‘Maglifet i salaam,’ ku demen,

‘Tadag ge na magu?’ Salngad sa, du slame alò Dwata gmagan mimò dun. <sup>6</sup> Taman fangulêgu to ani, du fye gadèyu agu, i dnagit Tingà To, nun glal di tah tanà ani mlifet dad salà i dad to.” Taman man Dyisas di to là galyak, “Tadag ge, nweam i gumileam, na mulê ge.” <sup>7</sup> Na glut, tadag i to é n na mulê. <sup>8</sup> Di kite i kdee dad to i nimò Dyisas, likò ale na dnayenla Dwata, du tablén i bong gnagan ani di satu to.

*I klak Dyisas ku Matyu  
(Mark 2:13-17; Luk 5:27-32)*

<sup>9</sup> Kafnge é n, mdà ale Dyisas na slengla magu nun teenan satu lagi dnagit ku Matyu sudeng di lam i gumimò i dad to gal mwè bayad buhis. Na man Dyisas di kenen, “Mlalò ge deg.” Na tadag Matyu na fles mlalò kenen.

<sup>10</sup> Na kmaan ale Dyisas di gumnè Matyu. Di slengla kmaan nun kel dademe dad gal mwè bayad buhis na dademe gal mlafà dad flalò fnaglut dad Dyu na sudeng du kmaan di safédla. <sup>11</sup> Na nun dad to mdà di fnaglut Farisi mite kenen na snalekla dad to gal mlalò ku Dyisas, manla, “Kan ku kmaan Dyisas di saféd i dad to gal mwè bayad buhis na dademe to gamsalà?”

<sup>12</sup> Na di klinge Dyisas i manla, tnmelan ale fagu di fléd, manan, “Hae, du i dad to nun tduk nun kamu i to mulung, bay i dad to landè tduk landè gukmamu i to mulung. <sup>13</sup> Na tooyu fandam i gumtatek i man Dwata ani, ‘Ise ku é n toogu knayè i kabléyu dsù, bay é n toogu knayè i kakdoyu i demeyu to.’ Na ise ku é n duengu salu dini du fanngabalgu dad to tlu du fsalgu di dad salàla, bay dad to gamsalà i fanngabalgu.”

*Flingen Dyisas i kton di lagi sandeme  
(Mark 2:18-20; Luk 5:33-35)*

<sup>14</sup> Kafnge én, nun di dad to gal mlalò ku Dyan Gal Munyag salu di ku Dyisas. Na smalek ale, manla, “Gami na i dad Farisi gal fwasa. Kan ku là fwasa i dad mlalò ge?”

<sup>15</sup> Na tmimel Dyisas fagu di fléd, manan, “Ku fkahta di kasdeme, fwasa kè i dad to malò i kasdeme ku déén fa i lagi sandeme di safédla. Là sa. Salngad én i dad mlalò deg, bay nun duh kadang nwè di dale i lagi sandeme, na én i bangla fwasa.”

*I guflingen Dyisas i tdoan di falami safut na falami binu*

*(Mark 2:21-22; Luk 5:36-39)*

<sup>16</sup> Na man Dyisas, “Tagadeito sasè ku klafang i falami safut di labi klaweh tabaltok, du i falami klafang kamsang na matnù baling kbong kasè i klaweh.

<sup>17</sup> “Na salngad én, là fakay fkah i falami binu kmadok fa di lam i labi gufkah kindal, du btù sa, na mkok i binu na malmo i gufkah kindal. Taman én fye gufkah i falami binu di falami kindal, du fye là malmo.”

*I kafgulê Dyisas i libun maloh tienan na kton i tingà mati*

*(Mark 5:21-43; Luk 8:40-56)*

<sup>18</sup> Di sleng Dyisas talù ani nun salu di kenen satu ganlal i dad Dyu, na lkuad di muna Dyisas, manan, “Tlabo ani kafto nawa tingàgu libun, bay beg ge magin deg ditù na nagotam kenen du fye mto lêman.” <sup>19</sup> Taman tadag Dyisas magin kenen na lê magin i dad gal mlalò kenen.

<sup>20</sup> Na di kagula nun satu libun déén too maflayam mdà di tdukan, tatì maloh i tienan. Sfalò lwe fali klon lamyalo dun. Na fdadong kenen di kagol Dyisas, na nagotan i kilil klawehan, <sup>21</sup> du manan di kton, “Ku alògu gagot i klaweh Dyisas mgulê agu.”

<sup>22</sup> Na di kagotan i klawehan falê Dyisas na teenan libun én, na man Dyisas, “Tingàgu, fan-galam nawam, du mdà di kafaglutam tamgulê ge.” Na mdà di bang én, mgulê kenen.

<sup>23</sup> Na di kakel ale Dyisas di gumnè i ganlal dad Dyu teenan dad to samlali gal magin lambang na dademe to madung too mlanu déén, <sup>24</sup> na manan di dale, “Lamwà gamu. Là mati i tingà, bay alò kudang.” Na toola kenen nulé. <sup>25</sup> Na di takalwà i dad to, fusuk Dyisas di gumilè i tingà, na nagotan i kmalan na mték kenen. <sup>26</sup> Na too mbel i santulen gablà di mgimò Dyisas di klamang banwe.

### *I kafgulê Dyisas lwe to butè*

<sup>27</sup> Na mdà ale Dyisas di banwe atù, na slengla magu nun lwe lagi butè tmadol ku Dyisas. Tlola kenen, manla, “E bel Harì Dabid, begam gami kando.”

<sup>28</sup> Na di kagfusuk ale Dyisas di satu gumnè magin i lwe to butè, na snalekan ale, manan, “Faglut gamu kè gagangu fgulê gamu?” Manla, “Hae Amu.”

<sup>29</sup> Na nagot Dyisas i matala, na manan, “Fagu di kafaglutyu mgulê gamu.” <sup>30</sup> Na mite ale lêman. Kabay fnang Dyisas dale, manan, “Nang gamu tmulen di balù simto to i mgimò di gamu ani.”

<sup>31</sup> Kabay knean balingla santulen i mgimò Dyisas di klamang banwe.

*I kafalwà Dyisas i busaw di lagi umu*

<sup>32</sup> Na di takdà i dad to é n gine, nun dademe to kel mebe di ku Dyisas i satu lagi umu mdà di knè i busaw di kenen. <sup>33</sup> Na kafnge Dyisas falwà i busaw, gta lù sa. Na too tikeng i dad to, na manla, “Landè fa lmen teen i dad to gambet ani dini di banwe Israél.”

<sup>34</sup> Kabay é n baling man i dad Farisi, “É n mlé kenen gnagan falwà i dad busaw dunan Satanas i gumdatah i dad busaw.”

*I kakdo Dyisas di dad to*

<sup>35</sup> Kafnge é n, magu Dyisas di kdee dad syudad na malnak banwe du tamdò kenen di dad gal gusatdò dad Dyu na santulenan i Fye Tulen gablà di kagot Dwata, na fanguléan dad to di kdee bung tduk.

<sup>36</sup> Di kite Dyisas i kdee dad to, toon ale kando du too ale maflayam na mlungay, salngad i dad bilibili landè to mifat dale. <sup>37</sup> Taman manan di dad gal mlalò kenen, “Tadee dad to gatlagad dmawat i Fye Tulen. Salngad ale dnaru fali too mabal gablà kantu. Kabay kulang i dad kamtu. <sup>38</sup> Taman dmasal gamu di Amuito Dwata, i mfun i fali, na fniyu ku dekan kamtu i dademe dad to.”

## 10

*I kalék Dyisas i dad sfalò lwe to galan dek  
(Mark 3:13-19; Luk 6:12-16)*

<sup>1</sup> Na tlo Dyisas dad sfalò lwe gal mlalò kenen salu di safédan na banlén ale glal falwà dad busaw na fgulê i dad to di kdee bung tduk.

<sup>2</sup> Na ani dad dagit i sfalò lwe to galan dek, Simon i dnagitan ku Fiter, Andru i flaneke Simon, Dyém, na i flaneke Dyan i dad ngà Sébidi, <sup>3</sup> Filif, Bartolomyu, Tomas, Matyu i gal mwè bayad buhis, Dyém i tingà Alfuyus, Tadyus, <sup>4</sup> Simon i msen di banwen, na Dyudas Iskariyot i to mangkal kenen.

*I kafngewe Dyisas dad sfalò lwe dekan tamdò  
(Mark 6:7-13; Luk 9:1-6)*

<sup>5</sup> Na di kdek Dyisas i sfalò lwe dad to ani fanlaun ale, manan, “Nang gamu salu di dad to ise Dyu ku demen di dad banwe glam di Samériya. <sup>6</sup> Kabay én gusaluyu di dademeyu dad bel Israél, du salngad ale i dad bilibili tatlas. <sup>7</sup> Na di kaguyu, tamdò gamu, manyu, ‘Tamdadong nan i kagot Dwata.’ <sup>8</sup> Na fangulèyu i dad to nun tduk, ntékyu i dad to mati, fangulèyu dad tanfig na falwàyu dad busaw. Nangyu fbayad i tabengyu dad to du i kdee gdawatyu mdà di Dwata laan fbayad gamu. <sup>9</sup> Kabay nang gamu mebe filak balù blawen, salafi ku demen tabaga. <sup>10</sup> Na di kaguyu nangyu nebe kuyut ku demen tugad. Na én alò saul na talumfà nebeyu i tagnè lsakyu du i to nun nimò gablà banlé i gulandean.

<sup>11</sup> “Na balù nè syudad ku demen tukay banwe gukelyu di kaguyu mngabal gamu i to mgafè i mayè fyak gamu di gumnean, na déén gumilèyu kel di kdàyu i banwen. <sup>12</sup> Na di kyakyu di gumnean manyu di dad to déén, ‘Fye ku i ktanak nawa mnè di gamu.’ <sup>13</sup> Na ku dnawatla gamu, mnè sa di dale ktanak nawa nebeyu, bay ku làla gamu dnawat gulè di gamu i fye gmanyu. <sup>14</sup> Na ku nun dad to là dmawat gamu na là flinge i tdòyu, kakesyu kfung



i bliyu di kdàyu di gumnèla ku demen banwela. <sup>15</sup> Na tulengu gamu i kaglutan, di duh kukum Dwata dad to, balù too maflayam dad to sasè mdà di dad banwe Sodom na Gomora, mdatah fa kaflayam i dad to di banwe tnagakyu.”

*I dad kaflayam gnagu i dad to Dwata  
(Mark 13:9-13; Luk 12:2-19)*

<sup>16</sup> Na man Dyisas, “Flinge gamu! Dekta gamu di dad to mayè fsasè gamu. Salngad gamu bilibili gbol di dad labè ayem di bnas. Taman ganbetyu dad ulad too fulung meye i kagula, na ganbetyu dad abun too nun ldamla du fye landè gudmalam gamu. <sup>17</sup> Hae, fafye gamu, du nun kadang dad to kamfè gamu, du nebela gamu di usay di dad mdatah ganlal, na sankélla gamu di lam i galla gusatdò. <sup>18</sup> Na mdà di ksasatuyu di deg nebela gamu di muna i dad mdatah mukum, én gubir-nador na balù i harila. Kabay én sa i dalanyu samtulen di dale na di dad to ise Dyu i Fye Tulen gablà di deg. <sup>19</sup> Na di kakfèla gamu nangyu fsamuk nawayu gablà di dad timelyu dale na i fye kmanyu dun, du di bang ktadagyu déén blé Dwata di gamu i fye timelyu. <sup>20</sup> Du ise mdà di gamu fandam i dad manyu kadang, bay mdà di Tulus Màyu Dwata.

<sup>21</sup> “Na di bang én kadang, én nimò i dademe to bléla di fati balù i dad flanekla, na i dad mà bléla dad ngàla. Na i dademe dad ngà dnuenla dad tuala na fafatila. <sup>22</sup> Na knang gamu nawa i kdee dad to du gamu dad togu. Kabay ku simto gamtayud kel di gusenana, galwà kenen. <sup>23</sup> Na ku fanlayamla gamu di satu banwe mila gamu di dademe, du tulengu gamu i kaglutan, di là fa fnge i nimòyu di

kdee dad banwe di Israél, takel agu i dnagit Tingà To.

<sup>24</sup> “I to tdò là mdatah di to tamdò kenen, na i lifan là mdatah di amun. <sup>25</sup> Taman nang gamu tikeng ku sasè kibòla gamu salngad deg. Gablà ku salngad kibòla i dad to tdò di to tamdò dale na ku salngad kibòla i dad lifan di amula. Ku én katlola deg Bélsébul, dunan Satanas, tan fa ksasè katlola gamu dad togu.

<sup>26</sup> “Kabay balù én nang gamu likò dale, du i kdee gbuni, teen sa kadang, na i kdee là gadè di bang ani, gadè sa kadang. <sup>27</sup> I kdee tatulengu gamu di alò gito, tulenyu kadang di kdee dad to. I taungaggu di gamu, kityu kadang di kdee dad to di lwà. <sup>28</sup> Na nang gamu likò i dad to, du alò lawehyu i gfatila, bay làla gfati i layefyu. Kabay én kanlikòyu Dwata i to gafalmo i lawehyu na layefyu di lanaw lifoh. <sup>29</sup> Fandamyu sa kun i kalsidaw galla fabli lwe bnayad alò file kadakù, bay silang tatek satu di dale ku faloh i Màyu Dwata. <sup>30</sup> Na gamu dad to, balù file balu wakyu, tagse Dwata kdeela. <sup>31</sup> Taman nang gamu likò du di Dwata too gamu mabtas fa di dad kalsidaw.

*I to nfun Dyisas ditù di Maan  
(Luk 12:8-9)*

<sup>32</sup> “Na balù simto to mfun deg di muna i dad to, nfungu di muna i Màgu di langit. <sup>33</sup> Kabay i to là mfun deg di muna i dad to, làgu kenen nfun di muna i Magu di langit.

*I sundang nebe Dyisas di tah tanà  
(Luk 12:51-53; 14:26-27)*

<sup>34</sup> “Nangyu fandam ku én duengu salu dini di tah tanà du mebe agu ksasatu nawa. Ise ku ksasatu nawa i nebegu dini, bay én nebegu sundang du baling snang nawa i dad to mdà di deg. <sup>35</sup> Mdà di ksalugu dini snang nawa i tingà lagi na maan, na i tingà libun na yêan, na i libun tmewe na tewen libun. <sup>36</sup> Na i too mnang nawa i dad togu kadang, dunan i dademela di gumnèla.

<sup>37</sup> “Na i to mbong nawan maan na yêan mdatah fa di kalbong nawan deg, là gablà nfungu, na salngad i to mbong nawa i tingaan mdatah di kalbong nawan deg, là gablà nfungu. <sup>38</sup> Na ku nun to là mebe i krusan na too mlalò deg, là gablà nfungu. <sup>39</sup> Kabay i to kmabas i nawan, knean lana di kenen. Kabay i to mati mdà di klaloan deg, gamdawat nawan landè sen.

*I untung gdawat i dad to dmawat i dad to Dwata  
(Mark 9:41)*

<sup>40</sup> “Na balù simto i dmawat gamu dnawatan agu. Na ku simto dmawat deg dnawatan i Màngu Dwata i mdek deg. <sup>41</sup> Na ku simto dmawat i tugad Dwata, mdà di kdek Dwata kenen, salngad untung gdawatan di gdawat i tugad Dwata. Na salngad én, ku simto dmawat i to matlu du mdà di katlun, salngad untungan di to matlu. <sup>42</sup> Na tulengu gamu i kaglutan, nun untung di fulé duh i to mlé balù alò satu basu yéél tno di satu mdanà to du kenen satu to mlalò deg.”

## 11

*I kafsalek Dyan Gal Munyag gablà ku Dyisas  
(Luk 7:18-35)*

<sup>1</sup> Kafnge Dyisas tamdò i dad sfalò lwe to gal mlalò kenen, mdà kenen du tamdò di dademe banwe mdadong déén.

<sup>2</sup> Na Dyan Gal Munyag, tabnilanggù kenen, na di kaklingen gablà di dad mgimò Krayst dekan dademe dad gal mlalò kenen di ku Dyisas, <sup>3</sup> du fsalekan ku Dyisas, manan, “Ge kè i to dek Dwata dini i sanfatanmi ku nun fa dademe fatanmi?”

<sup>4</sup> Tmimel Dyisas, manan, “Samfulê gamu di ku Dyan na tulenyu kenen i kdee lingeyu na teenyu dini. <sup>5</sup> Mite i dad butè, gagu i dad kimay, landè ksik i dad to tanfig du mgulê, mlinge i dad bakong, mto lêman i dad mati, na tatulen di dad to landè i Fye Tulen mdà di Dwata. <sup>6</sup> Na manyu di ku Dyan, too nun kafye di dad to ku là lwe nawala di kafaglutla di deg.”

<sup>7</sup> Na di kdà i dad to dek Dyan, tambù Dyisas talù di dad to déén gablà di ku Dyan, manan, “Di ksaluyu ditù di ku Dyan déén di banwe landè to mnè déén, tan i kayèyu teen? Ise sa ku én neyeyu kalon wal i nus. <sup>8</sup> Na du ise én, ken én taneyeyu satu to too fye klaweh. Kabay ise én kè, du dad to kamlaweh i too fye klaweh mnè di dad malbang gumnè i dad hari. <sup>9</sup> Na du ise én, tan sa neyeyu? Én kè neyeyu satu tugad Dwata? Na glut, satu tugad Dwata kenen, bay tulengu gamu, mdatah fa nimò Dyan di dademen tugad Dwata, <sup>10</sup> du Dyan ani i to gman Dwata di Tnaluan, manan, ‘Dekgu i saliggu muna di ge,

du fatlagad i dalanam na fgadè i kakelam.’

<sup>11</sup> Na tulengu gamu i kaglutlan, landè fa to lmen sut gasngad di kdatah Dyan Gal Munyag, bay balù

mdatah Dyan di kdee dad to kel i ani, ku simto to gakuf di kagot Dwata, balù kel di too mdanà to faglut di deg, mdatah fa di ku Dyan. <sup>12</sup> Na tambù fa di katdò Dyan Gal Munyag kel ani too teen kgal kagot Dwata. Na dad to labè, too ale fgal fye gfusuk ale. <sup>13</sup> Hae, du i kdee Tnalù Dwata fagu di dad tugadan na i flaloan fagu di ku Mosis, toola santulen i kagot Dwata kel di bang Dyan ani. <sup>14</sup> Na ku mayè gamu faglut i manla, tagadèyu moon i to salngad ku Ilaydya sanfatanito dunan Dyan. <sup>15</sup> Taman flinge gamu ku nun klingeyu!”

<sup>16</sup> Na fadlug Dyisas tamdò, manan, “Na tan guflingengu i dad to di bang ani? Flingengu ale di dad ngà sudeng di fadyan. Là ale mayè magin i dademela magaf, du tamlo dademe, manla,

<sup>17</sup> “Tamalandag gami i lingag i kasdeme,  
bay là gamu sayew.

Na lingagmi i lingag kalbang,  
bay là gamu mngel.’

<sup>18</sup> Salngad én i ksalu Dyan dini, gal kenen fwasa na là minum binu, bay là ale mayè na balingla man, kun, ‘Tabnusaw kenen.’ <sup>19</sup> Na agu, i dnagit Tingà To, salu agu dini na kmaan na minum, na én manla, kun, ‘Neyeyu i to ani, tyan kenen na gal flangal. Na i dademen sgalak, dunan i dad sasè to gal mwè bayad buhis na i dad to gal mlafà i flalò Dwata.’ Én manla, bay i gumiteyu na i nimò satu to mdà di kfulung Dwata, di ulê i nimoan.”

*Idad banwe i dad to là msal di salàla*  
*(Luk 10:13-15)*

<sup>20</sup> Na nngak Dyisas i dad to mdà di dad banwe gumimoan i dee tnikeng, du là ale fa msal di dad

salàla, manan, <sup>21</sup> “Magakdo gamu dad to di banwe Korasin! Na gamu di banwe Bétsayda! Ku tateen i dad to ise Dyu di dad banwe Tiro na Sidon i dad tnikeng tanimògu déén di gamu, tamlo ale msal na lamsak i saku, na mubul i abu di ulula mdà di klidùla dad salàla, bay gamu là sa msal! <sup>22</sup> Taman mangu di gamu ani, balù blat kaflayam i dad to mdà di Tiro na Sidon, mlaan fa di gamu kaflayam di duh kukum Dwata. <sup>23</sup> Na gamu dad to di banwe Kafernaum, mayè gamu fdatah i ktoyuu kel di langit. Kabay fan bat gamu baling di lanaw lifoh. Ku tateen i dad to sasè di banwe Sodom i dad tnikeng tanimògu déén di gamu, là malmo banwela kel ani. <sup>24</sup> Taman mangu di gamu ani, balù blat kaflayam i dad to mdà di Sodom, mlaan fa di gamu kaflayam di duh kukum Dwata.”

<sup>25</sup> Na di bang éen dmasal Dyisas, manan, “E Mà, Amu magot i langit na tanà, mlé agu fye di ge du i bunim di dad to too fulung na i dad to mdatah gnadè, tafitem di dad to mdanà salngad i dad malnak ngà. <sup>26</sup> Hae Mà, mgimò ani, du ani knayeam.”

<sup>27</sup> Na man Dyisas di dad to, “Tasalig Mà di deg i kdee. Na landè gmadè i Tingà Dwata, galwà di Maan. Na landè gmadè i Maan galwà di Tingaan na dad to kayègu gufgadè kenen.”

*I kaftud nawa i dad to mimen dad tdò Dyisas  
(Luk 10:21-22)*

<sup>28</sup> “I kdeeyu mlungay mdà di blat nebeyu salu gamu di deg na banléta gamu kaftud. <sup>29</sup> Nimenyu i tdògu na ganbetyu agu, na nun sa kaftudyu du too nun kakdogu na kafdanà i ktogu. <sup>30</sup> Là malima i flalògu gamu, na là blat i fimògu.”

## 12

### *Ifye nimò di Duh Kaftud (Mark 2:23-28; Luk 6:1-5)*

<sup>1</sup> Kafnge én, di satu Duh Kaftud i dad Dyu magu ale Dyisas di dalan di satu nligo. Na bitil dad gal mlalò kenen, taman di slengla magu beg ale kambang là dee dad kigan trigu, du knilewla.

<sup>2</sup> Kabay di kite i dad Farisi i nimòla, manla di ku Dyisas, “Neyem i nimò dad gal mlalò ge! Nlafàla i flalò blé Dwata fagu di ku Mosis du baling ale kamtu di Duh Kaftud.”

<sup>3</sup> Kabay tmimel Dyisas, manan, “Kan kè? Làyu lmen masa i nimò Hari Dabid du mdà di kbitilan na kbitil i dademen?” <sup>4</sup> Là kenen fansalà Dwata balù fusuk kenen di Gumné Dwata na nwean i fan blé di Dwata, na blén di dad ton, na kdeela kmaan. Na blaam én alò fakay kmaan dun i dad baito di Dwata. <sup>5</sup> Na làyu kè lmen masa i sulat Mosis gablà di dad baito di Dwata mimò di Bong Gumnean klit Duh Kaftud, na landè salàla di klafàla i flalò Dwata gablà di Duh Kaftud. <sup>6</sup> Na ani mangu di gamu, nun to dini di munayu mabtas fa di Bong Gumné Dwata. <sup>7</sup> Ani man di Tnalù Dwata, ‘Ise ku dsù lmanaf i knayègu, bay kasakdo.’ Ku glabatyu ani làyu moon dnalàm i dad to landè salà, <sup>8</sup> du agu, i dnagit Tingà To, i nun glal mangman i fakay nimò di Duh Kaftud.”

### *I kafgulê Dyisas i to kengkeng i kmalan (Mark 3:1-6; Luk 6:6-11)*

<sup>9</sup> Na mdà Dyisas na fles fusuk di gal gustifun dad Dyu. <sup>10</sup> Na nun lagi déén kengkeng bali kmalan. Na nun dad to déén meye dalanla dmalàm ku Dyisas di salà, taman snalekla kenen, manla, “Fakay

dé di flalò Dwata ku fangulê i to nun tduk di Duh Kaftud ku là?” <sup>11</sup> Kabay tmimel Dyisas dale, manan, “Ku nun bilibiliyu mtatek di mngalam sol di Duh Kaftud tan i nimòyu? Làyu kè falwà dun balù fa di Duh Kaftud? <sup>12</sup> Na too mabtas fa i to di bilibili! Taman snalekgu gamu, fakay dé di flalò Dwata ku ttabengito i demeito to di Duh Kaftud ku là?”

<sup>13</sup> Kafnge én, man Dyisas di to kengkeng i kmalan, manan, “Bankem i kmalam.” Na banken. Na mgulê i kmalan na tasalngad di balin. <sup>14</sup> Kitela ani lamwà dad Farisi du stulen ku tan kfagula mati ku Dyisas.

### *I salig mgalék Dwata*

<sup>15</sup> Na du gadè Dyisas i ayè dad Farisi mati kenen, taman mdà kenen di banwe én. Kabay too dee dad to mlalò kenen na fanguléan i kdee dad to déén i nun tduk. <sup>16</sup> Kabay fnangan ale tmulen di dademe dad to ku simto kenen. <sup>17</sup> I nimò Dyisas ani i kagdohò i gman Dwata fagu di tugadan Isaya, manan,

<sup>18</sup> “Ani saliggu tamgalékgu,  
toogu kenen kando na too fye nawagu kenen.  
Fnègu di kenen i Tulusgu,  
na fgadean di kdee dad to i kukumgu too  
matlu.

<sup>19</sup> Na là kenen samdal dad dmuen kenen ku demen faltê,  
na laan falbong i taluan di dalan.

<sup>20</sup> I dad to mnè di klungay ttabengan;  
ku fkahta di law tabluk laan fles tanfò,  
na i salò fan mati laan fles fnati.

Fantahaan i nawan,



kel di bang katu i tlu nimò di kdee sasè.

<sup>21</sup> Na nun fanden i dad to di klamang banwe du mdà di kenen.”

*I gumdà tulus Dyisas*

*(Mark 3:20-30; Luk 6:43-45; Luk 11:14-23)*

<sup>22</sup> Na nun satu to nebela di ku Dyisas butè na umu du nun busawan, bay fanguléan kenen taman gталù na mite. <sup>23</sup> Na too tikeng i kdee dad to na sasalek ale, manla, “Kenen dé i bel Hari Dabid galito fatan?”

<sup>24</sup> Kabay di kaklinge dad Farisi ani, manla, “Ise! Gaganan falwà dad busaw fagu alò di tulus Bélsébul, i gumdatah dad busaw.”

<sup>25</sup> Na gadè Dyisas i fandamla, taman manan dale, “Ku fkahta di kagot i satu hari ku sunay ale i dad ton, malmo baling i kagotan dale. Salngad ku fkahta di satu syudad ku demen di satu malay ku sfati slame ale, malmo baling i ksasatula. <sup>26</sup> Na ku glut i manyu na Satanas i fafalwà dad busaw nagotan, na snang ale nawa kadi, na là kè malmo i kagotan? <sup>27</sup> Na ku glut, Bélsébul i gumdà tulusgu falwà dad busaw, simto kè gumdà tulus i dad mlalò gamu gal falwà dad busaw? Gadèyu i tulusla mdà di Dwata, na én sa gugmadèyu gsalà i manyu gablà di deg. <sup>28</sup> Taman du én kafalwàgu dad busaw mdà di Tulus Dwata, én sa i gugmadèyu takel i kagot Dwata di dad to.

<sup>29</sup> “Tafnisangu Satanas du landè to fakay fusuk di gumnè i mgal to du mwè i knunan ku laan funa kenen bnakus, bay ku tabnakus fakayan nwè balù tan kayean di gumnè i mgal to.

<sup>30</sup> “Balù simto to là msen deg, dmuen deg, na balù simto to là tmabeng samtifun i dad to, balingan ale sanbalét. <sup>31</sup> Taman mangu di gamu fakay nlifet balù tan salà i dad to na balù tan sasè manla gablà di Dwata, bay ku nun to falmo dengeg i Mtiu Tulus fagu di ktaluan là nlifet Dwata i salaan. <sup>32</sup> I to talù sasè gablà di deg, i dnagit Tingà To, fakay nlifet, bay i to talù sasè gablà di Mtiu Tulus là maglifet salaan balù duh ani na kel di landè sen.”

<sup>33</sup> Na manan, “I kayu fye, fye kbungen, bay ku sasè i kayu, sasè kbungen. Én gudmilèyu i kayu ku fye ku demen sasè di kbungen. <sup>34</sup> E gamu, gambet gamu ulad du alò sasè i mnè di nawayu. Landè kibòyu talù fye du sasè gamu! Hae, du ku tan i mnè di nawa i satu to, én i lamwà di baan. <sup>35</sup> I fye to, fye lamwà di baan du mdà di dad fye busekan di lam i nawan. I sasè to, sasè lamwà di baan du mdà di sasè busekan di nawan. <sup>36</sup> Na tulengu gamu, di Duh Kukum Dwata là fakay ku là tmimel kdee to di kenen di kat talùla i landè gukmamu. <sup>37</sup> Du ku fye gmanyu laan gamu sa fanlayam. Bay ku sasè gmanyu fanlayaman gamu.”

*I tnikeng fni i dad ulu dad Dyu  
(Mark 8:11-12; Luk 11:29-32)*

<sup>38</sup> Kafnge én, nun dad Farisi na dademe dad tamdò i dad flalò blé Dwata di ku Mosis, manla di ku Dyisas, “To Tamdò, kayèmi ku fnitem gami i tnikeng ilè ge i To Mgalék Dwata.”

<sup>39</sup> Kabay tmimel Dyisas dale, manan, “Too sasè i dad to di bang ani. Takmagol ale Dwata na mni fa i tnikeng. Kabay landè tnikeng fite di gamu galwà di tnikeng teenyu kadang gambet gnagu i tugad

Dwata Dyona. <sup>40</sup> Tlu duh na tlu butang klon di lam tien i bong nalaf na salngad én mkel di deg i dnagit Tingà To, du tlu duh na tlu butang mnè agu kadang di lam i tanà.

<sup>41</sup> “Na di Duh Kukum Dwata kadang, tadag dad to mdà di banwe Ninibi du dmalam gamu du i nimòla di muna fa i satu gugmadè na gamu gablà fanlayam, du di kaklingela tdò Dyona msal ale di sasè nimòla, na i tamdò gamu ani mdatah fa di ku Dyona bay là gamu msal. <sup>42</sup> Na di Duh Kukum, lê tadag i réyna magot i banwe Siba du dmalam gamu dad to di bang ani, du i nimò libun ani di muna fa i gugmadè na gablà gamu fanlayam, du balù too mawag i gumdaan salu kenen di ku Harì Solomon du fye flinge i gnadean. Kabay nun mdatah gnadè di ku Harì Solomon dini di gamu ani, bay là gamu flinge.”

*I kasfulê i busaw talamwà*  
(Luk 11:24-26)

<sup>43</sup> Na fadlug Dyisas talù, manan, “Ku nun busaw talamwà di satu to, gal kenen magu di dad kafag banwe landè alì to du mngabal i gumanakan. Kabay ku landè teenan, <sup>44</sup> manan di kton, ‘Samfulê agu di tagnè gumnègu.’ Na kakelan di to tagnè gumnean, teenan landè mnè ditù na tamlaneb na maftifas. <sup>45</sup> Taman mdà i busaw mngé i dademen, na faginan fitu dad busaw i mdatah fa ksasèla di kenen. Na sdulê ale fusuk na fles mnè di kenen. Taman matnù i ksasè kagkah to én di katbuan di là fa lamwà i busaw. Na ani kadang gukel i dad to sasè di tah tanà di bang ani.”

*I yê Dyisas na i dad flanekan  
(Mark 3:31-35; Luk 8:19-21)*

<sup>46</sup> Di sleng Dyisas talù fa di dad to déén, takel i yéan na dad flanekan lagi. Tadag ale di lwà du kayèla stulen di kenen. <sup>47</sup> Na nun to tmulen kenen, manan, “Taditù yéam na dad flanekam tadag di lwà, na mayè ale stulen di ge.”

<sup>48</sup> Kabay tmimel Dyisas, manan, “Hae, bay simto kè yêgu, na simto dad flanekgu?” <sup>49</sup> Na tdoan dad to gal mlalò kenen, manan, “Ani sa i yêgu na dad flanekgu, <sup>50</sup> du ku simto mimò knayè i Mâgu di langit, kenen i mgimò flanekgu lagi, na flanekgu libun na yêgu.”

## 13

*I fléd gablà di to smabul bnê  
(Mark 4:1-9; Luk 8:4-8)*

<sup>1</sup> Di duh atù lamwà Dyisas na salu kenen di kilil i bong lanaw, na sudeng ditù. <sup>2</sup> Na du too dee dad to stifun di safédan, taman myak kenen di tah i satu aweng na sudeng kenen déén du tamdò, na tadag i dad to flinge di kilil lanaw. <sup>3</sup> Na too dee tulenan dale fagu di fléd, manan, “Nun to salu di nligon du smabul bnê. <sup>4</sup> Na di ksabulan dun, nun dademe gsabul di bà dalan, na fti ttrukè i dad anuk di bnas. <sup>5</sup> Na nun dademe gsabul di gumngifi tanà di tah i batu. Na too mlal ktabòla du babu i tanà. <sup>6</sup> Kabay di ksut i duh, sakuf i tabòla, na du là ali dmalil mlanas ale. <sup>7</sup> Na nun dademe bnê gsabul di lam walad nun soal. Na tmabò, bay mlal kalnok i dad bnas, na mlimas i dad tabò i bnê. <sup>8</sup> Kabay nun dademe bnê sabul di gufye tanà, na too fye

kbungen. Nun dademe mlatu uléan, nun nam falò uléan, na nun tlu falò uléan. <sup>9</sup> Taman flinge gamu ku nun klingeyu!”

*Gablà di katdò Dyisas fagu di fléd  
(Mark 4:10-12; Luk 8:9-10)*

<sup>10</sup> Na fdadong i dad gal mlalò ku Dyisas di kenen, na smalek ale, manla, “Kan du tamdò ge i dademe to fagu di fléd?”

<sup>11</sup> Na tmimel Dyisas, manan, “Faglabatgu gamu dad mlalò deg i dad gbuni gablà di kagot Dwata, bay làgu faglabat dun di dademe dad to. <sup>12</sup> Du i dad to nun kaglabat i tdògu, tananù Dwata du fye too bong. Kabay i dad to là fkah dun di nawala, nawì Dwata balù i tukay kaglabatla.\* <sup>13</sup> Taman ani i duengu tamdò dale fagu di fléd du balù meye ale là ale mite, na balù flinge ale là ale mlinge, na là ale gamlabat.

<sup>14</sup> “Én man Dwata fagu di tugadan Isaya tagdohò di dad to ani, du manan, ‘Balù too gamu flinge, knean là gamu gamlabat, na balù too gamu meye, là gamu mite,

<sup>15</sup> du i dad to ani, tatoo mgal ulula,  
na gambet snafangla i klingela,  
na fnidangla matala,  
du fye là ale mite na là ale flinge,  
du ku là, gamlabat ale i kaglutun,  
na tagakla i dad sasè nimòla,  
du fye fangulêgu ale di dad salàla.’

---

\* **13:12** Satu kubad ani dunan: Du i to nun, tananù i nfunan, bay i to landè ali, nawì balù i tukay di kenen.

<sup>16</sup> “Kabay gamu dad gal mlalò deg, too nun kafye gdawatyu du too mite i dad matayu, na mlinge i dad klingeyu.

<sup>17</sup> “Na tulengu gamu i kaglutan, mdà di muna fa too dee dad tugad Dwata na dademe dad to Dwata too mayè mite i tateenyu, bay landè kibòla mite dun, na mayè ale mlinge i lingeyu, bay landè kibòla mlinge dun.”

*I gumtatek i fléd gablà di bnê gsabul  
(Mark 4:13-20; Luk 8:11-15)*

<sup>18</sup> “Na taman flinge gamu i gumtatek i fléd gablà di to smabul bnê. <sup>19</sup> Ku nun dad to mlinge i tdò gablà di kagot Dwata, bay làla glabat dun, gasil salu Satanas di dale du nwean di nawala i Tnalù Dwata talingela. I kagkah dad to ani salngad i dalan gugsabul dad bnê. <sup>20</sup> Na i mngifi tanà di tah batu gugsabul i dademe bnê, dunan i dad to too lehew dmawat Tnalù Dwata di kaklingela dun, <sup>21</sup> bay landè gudmalilan di nawala, taman là mlo ktayudla, du di kakel i kalima na kaflayam mdà di kdawatla i Tnalù Dwata, mlal ale tmagak i kafaglutla. <sup>22</sup> Na i tanà gugsabul bnê i gutmabò dad walad nun sual, dunan i dad to mlinge Tnalù Dwata, bay dee gusbalét i nawala gablà di knèla di tah tanà na i kiballa knun. Taman landè ulé Tnalù Dwata di dale. <sup>23</sup> Kabay i fye tanà gusmabul i dademe bnê, dunan i dad to mlinge na gamlabat Tnalù Dwata, na too nun uléan di nawala, nun mlatu i uléan, na dademe nam falò, na dademe tlu falò.”

*I fléd gablà di dad bnas tmabò di fule*

<sup>24</sup> Kafnge én nun tulen Dyisas satu fléd, manan, “Flingengu i kagot Dwata di satu to smabul i too fye bnê di nligon. <sup>25</sup> Kabay sleng i dad ton kudang, nun satu to mnang nawa kenen salu di nligon na én sabulan déén bnê i bnas na mdà. <sup>26</sup> Na silangla dilè i dad bnas, di ktabò i fule na tambù lamwà i dad kiganan.

<sup>27</sup> “Na salu i dad salig i mfun i fule di kenen, na manla, ‘Amu, too fye kè i bnê sabulito di nligom taman nè gumdà i dad bnas ani?’

<sup>28</sup> “Na tmimel i mfun, manan, ‘Nun to mnang nawa deg smabul bnas ani.’ Na smalek ale lêman, manla, ‘Mayè ge kè ku nsòmi i dad bnas ani?’

<sup>29</sup> “Kabay manan, ‘Bayàyu nsò i dad bnas, ken balingyu gakuf nsò dad fule. <sup>30</sup> Falohyu ale salnok kel di bang kamtu du mangu kadang di dad to kamtu, santifunyu funa i dad bnas, na bnatangyu du ntam. Kabay i fye, santifunyu na fkahyu di folgu.’ ”

*I fléd gablà i satu too tukay bnê  
(Mark 4:30-32; Luk 13:18-19)*

<sup>31</sup> Kafnge én, tulenan dale satu fléd, manan, “Satu guflingengu i kagot Dwata dunan i tukay bnê fule satu to di nligon. <sup>32</sup> Na i bnê én tukay fa di kdee dademe bnê, bay di taktaboan, baling too bong di dademe fule du tamgimò bong kayu gusmalal i dad anuk di bnas di dad fangan.”

*I fléd gablà di falnok fan  
(Mark 4:33-34; Luk 13:20-21)*

<sup>33</sup> Na tnulenan ale i satu fléd, manan, “Satu guflingengu i kagot Dwata dunan i falnok fan nwè

i satu libun du bolan di tlu gantang arina, na too masbool na too lamnok.”

<sup>34</sup> I kdee tdò Dyisas di dee dad to slame fagun di fléd. Landè tdoan di dale ku laan fagu di fléd.

<sup>35</sup> I nimò Dyisas ani i kagdohò i gman Dwata fagu di tugadan, manan,  
“Tamdò agu fagu di fléd,  
na tulengu i dad gbuni mdà di kimò i banwe.”

*I gumtatek i fléd gablà di bnas tmabò di fule*

<sup>36</sup> Kafnge én, tngak Dyisas i dee dad to déén, na fusuk kenen di lam i gumnè. Na fdadong i dad gal mlalò kenen, na manla, “Tulenam gami i gumtatek i fléd gablà di dad bnas di tanà i to smabul bnê.”

<sup>37</sup> Na tmimel Dyisas, manan, “I to smabul i fye bnê dunan agu, i dnagit Tingà To. <sup>38</sup> I tanà gusmabul bnê dunan i klamang banwe, na i gumtatek i dad fye bnê dunan i dad to gakuf di kagot Dwata, na i dad bnas dunan i dad to nfun Satanas. <sup>39</sup> Na i to mnang nawa deg, i smabul i dad bnas, dunan Satanas. Na i bang kaktu dunan i gusen i banwe, na i dad kamtu dunan dad kasaligan Dwata.

<sup>40</sup> “Na i kibòla i dad bnas, santifun na snakufla di lifoh, dunan i kibòla kadang di gusen i banwe.

<sup>41</sup> Agu, i dnagit Tingà To, én nimògu di bang én, dekgu i dad kasaligangu du fye nwèla i kdee gamebe i dad to di kagsalà na i kdee dad to mimò sasè gbol di dad to di kagotgu. <sup>42</sup> Na batla ale di too minit lifoh gumlanula na gukminggat i kifanla.

<sup>43</sup> Kafnge én, i dad to matlu di kite Dwata too ale mneng di kagot i Màla Dwata gambet i kneng i duh. Taman fye flinge gamu, ku nun klingeyu!



*I fléd gablà di knun gbuni*

<sup>44</sup> “Satu guflingengu i kagot Dwata dunan i too mabtas knun lbang di tanà. Kanto gakol satu to, gasilan lbang lêman. Na too lehew i to ani, taman mulê kenen du fablin i kdee knunan fye gbayadan i tanà, du fye gwean i too mabtas knun.”

*I fléd gablà di too mabtas mata tising dnagit férlas*

<sup>45</sup> “Satu guflingengu i kagot Dwata, dunan i satu to gal mayad dad mata tising too mabtas dnagit férlas. Lamngab kenen mngabal dad too fye férlas. <sup>46</sup> Di kiten i satu férlas too tatì fye, mulê kenen na fablin i kdee knunan, du bnayadan i too mabtas férlas.

*I fléd Dyisas gablà di fukut*

<sup>47</sup> “Satu guflingengu i kagot Dwata lêman, dunan i satu fukut ftatek ditù di bong lanaw gamwè i dee sahal bung nalaf. <sup>48</sup> Na di kafnò i fukut, dyol i dad to ditù di kilil lanaw, na sudeng ale déén du nalékla dad nalaf. I dad fye nalaf fkahla di lam alatla, na dad sasè batla. <sup>49</sup> Ani kagakah di gusen i banwe. Salu dini i dad kasaligan dek Dwata na tnanila i dad to sasè di dad to matlu. <sup>50</sup> Na i dad to sasè, bat ale di too minit lifoh, déén di gumlanula na gukminggat i kifanla.”

*I kabtas i labi tdò Mosis na i falami tdò Dyisas*

<sup>51</sup> Na smalek Dyisas dale, manan, “Taglabatyu kè i kdee mangu gine?”

Na tmimel ale, manla, “Hae.”

<sup>52</sup> Taman manan, “Ku glabatyu, glabatyu i kagakah i to tagnè gmadè i flalò blé Dwata fagu

di ku Mosis, na ku lê kenen mlalò i kagot Dwata salngad kenen di satu to too nun knunan di gumnean. Nun labi na nun falami knunan fakayan gumwè ku nun gukmamun dun.”

*Knangla Dyisas di banwe Nasarét  
(Mark 6:1-6; Luk 4:16-30)*

<sup>53</sup> Di kafnge Dyisas tmulen dad fléd, tngakan i banwe én, <sup>54</sup> na samfulê kenen di banwe gulamnokan. Na tamdò kenen di gal gusatdò i dad Dyu. Na too tikeng i dad to déén mlinge dun, manla, “Nè gugamwean i gnadean ani? Na nè gumdà kfulungan mimò tnikeng? <sup>55</sup> Laito kè dilè to ani? Ani kè tingà karfintiro atù? Ise kè Méri yéan na én dad flanakan Dyém, Dyosif, Simon, na Dyudas? <sup>56</sup> Na dad flanakan libun dini kè di banweito. Taman nè gumdà i bong kfulungan?” <sup>57</sup> Na i dad to di banwen, knangla kenen.

Kabay man Dyisas di dale, “I tugad Dwata too mgafè balù tanè gugsalun, bay én alò là mafè kenen i dad to di kenen too banwe na di kenen too gumnè.” <sup>58</sup> Na là dee dad tnikeng nimoan di banwe én du là ale faglut di kenen.

## 14

*I kfati Dyan Gal Munyag  
(Mark 6:14-29; Luk 9:7-9)*

<sup>1</sup> Di bang én nun linge Hari Hérod, i mdatah ganlal di banwe Galili, gablà di kdee tnikeng nimò Dyisas. <sup>2</sup> Na manan di dad saligan, “Dyisas ani, dunan Dyan Gal Munyag tamték mdà di fati, na én duen too kenen mtulus.”

<sup>3</sup> Ani manan, du tafakfean Dyan, na fbakusan na fbilangguan du mdà di ku Hérodiyas, yaan i

flanekan Filif. <sup>4</sup> Fbilangguan du tagal man Dyan di kenen, “Là fakay nlad yaan i flane kam.” <sup>5</sup> Na kayean moon fnati Dyan, bay likò kenen di dad to, du én fandamla, Dyan satu tugad Dwata.

<sup>6</sup> Kabay kel i duh kafaldam i ksut Hérod, sayew i tingà Hérodiyas libun di muna i kdee dad to malò i fista, na too mayè nawa Hérod meye dun. <sup>7</sup> Taman makang kenen di libun sayew, na smafà, manan, “Balù tan i fnim, blégu ge!” <sup>8</sup> Na nimenan flau yéan, na manan di ku Hérod, “Én kayègu, blém deg ulu Dyan Gal Munyag, fafkham di bong fligo.” <sup>9</sup> Too mlidù nawa Hari Hérod di fni i tingà én, bay landè kiboan du makang kenen di muna i kdee dad to nlakan di fista, taman dekan i sundalu blé di tingà i fnin. <sup>10</sup> Na faklangan ulu Dyan déén di bilanggù. <sup>11</sup> Na fkahla ulun di satu fligo, na nebela di tingà, na flesan nebe di yéan. <sup>12</sup> Na i dad gal mlalò ku Dyan beg ale salu ditù di bilanggù, na nwèla i lawehan du lbangla. Na kafnge én salu ale di ku Dyisas du tnulenla.

*I kafaan Dyisas mlukas lime libu dad to  
(Mark 6:30-44; Luk 9:10-17; Dyan 6:1-14)*

<sup>13</sup> Na di kaklinge Dyisas tafnati Dyan, mdà ale na maweng salu di satu banwe gulandè to. Kabay di kaklinge i dad to i gusalun, mdà ale tmanà du fye lalòla kenen. <sup>14</sup> Di ktufa Dyisas mdà di aweng, teenan i dee dad to déén. Na toon ale kando na fanguléan i dad to nun tduk.

<sup>15</sup> Na di fan sdaf i duh salu dad gal mlalò ku Dyisas di safédan, na manla, “Taflabi nan, na landè gumnè mdadong dini. Fye ku fdaam i dad to du

fye mngabal ale gumayadla knaan di dad malnak banwe mdadong dini.”

<sup>16</sup> Kabay man Dyisas, “Balù là ale mdà. Gamu sa mlé dale knaan.”

<sup>17</sup> Kabay manla di kenen, “Alò lime batù fanmi dini na lwe nalaf.”

<sup>18</sup> Man Dyisas, “Nebeyu dini di deg.” <sup>19</sup> Na fsudengan dad to di bnas, na nwean i lime batù fan na lwe batù nalaf. Na funan lngalà di langit du dmasal mlé fye di Dwata. Na snatngaana i fan, na blén di dad gal mlalò kenen na nalella di dad to. <sup>20</sup> Na gamkaan i kdeela na bsol ale. Na santifun i dad gal mlalò kenen i lukasan, na fnò i sfalò lwe been gdèla. <sup>21</sup> Na i kdee dad lagi kmaan mdadong lime libu, là gakuf nse i dad libun na dad ngà kmaan.

*I kagu Dyisas di tah lanaw  
(Mark 6:45-52; Dyan 6:15-21)*

<sup>22</sup> Kafnge én dek Dyisas muna dad gal mlalò kenen smakay aweng mifal i bong lanaw. Na ftagak Dyisas du fdaan i dad to. <sup>23</sup> Kafngen fdà i dad to, mnagad kenen di satu bulul aloan satu du dmasal. Di kasdaf i duh ditù fa Dyisas aloan satu. <sup>24</sup> Kabay di bang én, mawag di kilil lanaw i aweng dad gal mlalò kenen na glumfak lwek i awengla du gsitongla i nus. <sup>25</sup> Taman tamayè mwal salu Dyisas di dale tati magu di tah lanaw. <sup>26</sup> Kabay di kitela kenen tati magu di tah lanaw, too ale likò. Manla, “Lmagol sa atù!” Na mkit ale mdà di klikòla.

<sup>27</sup> Kabay gasil talù Dyisas di dale, manan, “Fan-galyu nawayu du agu sa ani. Nang gamu likò!”

<sup>28</sup> Na talù Fiter, manan, “Amu, ku ge én, fagum agu di tah lanaw salu di ge.”

<sup>29</sup> Man Dyisas, “Salu ge dini.”

Taman tufa Fiter di aweng na magu di tah lanaw salu di ku Dyisas. <sup>30</sup> Kabay kagalyalon kbal i nus, talikò kenen, na takagun galnab mkit kenen, manan, “E Amu, ttabengam agu!”

<sup>31</sup> Na gasil nagot Dyisas na nketan. Man Dyisas, “Tay, too tukay ksaligam! Kan ku lwe nawam?”

<sup>32</sup> Na di kyakla di aweng, manak i nus. <sup>33</sup> Na i dademen di lam i aweng, mangamfù ale di kenen, na manla, “Too glut kadì ge i Tingà Dwata!”

*I kafgulê Dyisas i dademe dad to di Génésarét  
(Mark 6:53-56)*

<sup>34</sup> Na fles ale mifal di lanaw, na ditù gudmuungla di banwe Génésarét. <sup>35</sup> Na di kdilè i dad to déén ku Dyisas fafngéla i dad nun tduk mdà di klamang banwe, na nebela di kenen. <sup>36</sup> Na fakdo ale di ku Dyisas began fagot dale balù alò kilil i klawehan. Na balù simto magot dun, mgulê sa.

## 15

*I kalob i dad to Dyu  
(Mark 7:1-13)*

<sup>1</sup> Na di slà én, nun dad Farisi na dad tamdò dad flalò blé Dwata fagu di ku Mosis mdà di syudad Dyérusalém salu di ku Dyisas na smalek, <sup>2</sup> manla, “Kan kè duen i dad gal mlalò ge mlfà i tdò flalò i dad gutambulito? Là ale malob di fan ale kmaan.”

<sup>3</sup> Na tmimel Dyisas, manan, “Na gamu, kan kè duenyu mlfà i flalò Dwata, du fye gimenyu i gamu flalò? <sup>4</sup> Du ani flalò Dwata, ‘Nafèyu i màyu

na yêyu,' na 'Ku simto to talù sasè gablà di maan ku demen yéan fnati.' <sup>5</sup> Nlafàyu sa du én balingyu tdò, ku nun tabeng fan blé satu to di dad tuan, na fakay kun, ku manan, 'I fangu tabeng gamu tagablégu di Dwata.' <sup>6</sup> Na fakay kun, ku talaan nan nafè i dad tuan fagu di tabeng én. Ani i kfaguyu kmagol i Tnalù Dwata du fye gimenyu gamu flalò. <sup>7</sup> Tay, gamu tatì flingu mimen Dwata! Too glut i man Dwata gablà di gamu fagu di tugadan Isaya, manan,

<sup>8</sup> 'I dad to ani mafè deg bay alò di bàla, bay too mawag i nawala di deg.

<sup>9</sup> Taman landè gukmamu i kfangamfùla di deg, du i tdò manla mdà di Dwata, mdà alò di dad to.' ”

*I gumdà salà i dad to*  
(Mark 7:14-23)

<sup>10</sup> Kafnge én, tlo Dyisas i dad to di safédan, na manan di dale, “Too gamu flinge na fnaglabatyu i mangu! <sup>11</sup> Ise én gafagsik i satu to i fkah di lam baan, bay én gafagsik kenen i sasè lamwà di baan.”

<sup>12</sup> Na fdadong i dad gal mlalò kenen du snalekla, manla, “Gadeam kè tamduk nawa i dad Farisi ge mdà di gmanam gine?”

<sup>13</sup> Na tmimel Dyisas fagu di fléd, manan, “I kdee fule i là fule i Màgu di langit nsò kadang gagin i dalilan. <sup>14</sup> Tatiyu ale fbayà, du balù ku malak ale i dademela to, salngad ale i dad to butè. Na ku i to butè malak i satu to butè, lwe ale baling tatek di sol.”

<sup>15</sup> Kabay man Fiter di kenen, “Tabyà, nubadam di gami i gumtatek i fléd gine.”

<sup>16</sup> Na man Dyisas, “Balù gamu, là gamu fa gamlabat? <sup>17</sup> Làyu kè glabat, i fusuk di bà i satu to salu di tienan na fles lamwà di lawehan? <sup>18</sup> Kabay i kdee sasè lamwà di bà i satu to, fdu di nawan, na én sa i gafsalà kenen. <sup>19</sup> Hae, du i nawa gumdà dad sasè fandam gamegebe i to di kbanò, klafà yaan, ksaféd i to ise yaanan, ktaku, ktulen kéng di usay, na ktalù sasè gablà di demen to. <sup>20</sup> Ani sa gafsalà i to, bay ku kmaan kenen di là fa malob ise én gafsalà kenen.”

*I kafaglut i libun ise Dyu  
(Mark 7:24-30)*

<sup>21</sup> Na tngak Dyisas i banwe én, na fles salu di banwe mdadong di dad syudad Tiro na Sidon. <sup>22</sup> Na nun mnè déén satu libun ise Dyu mdà di banwe Kanaan. Na salu kenen di ku Dyisas, na toon falbong i taluan fakdo ku Dyisas, manan, “E Amu, bel Harì Dabid, kandom agu, du too maflayam tingàgu libun du nun busawan.”

<sup>23</sup> Kabay là tmimel Dyisas, taman fdadong i dad gal mlalò kenen, na fnila, “Tabyà, blém di kenen i fnin, du fye mdà kenen du toon ito sanlalò na too mugak!”

<sup>24</sup> Na man Dyisas, “Kabay én alò gumdek Dwata deg di bel Israél, du salngad ale i dad bilibili lana.”

<sup>25</sup> Kabay fdadong i libun na lkuad kenen di blian, manan, “Amu, begam agu ttabeng.”

<sup>26</sup> Na tmimel Dyisas fagu di fléd, manan, “Là fakay nwè i knaan i dad ngà na blé di dad ayem.”

<sup>27</sup> Na tmimel i libun, manan, “Hae, Amu, gadègu én, bay balù dad ayem gamkaan i samel mtatek mdà di gukmaan i dad funla.”

<sup>28</sup> Na man Dyisas di kenen, “Libun, too bong i ksaligam! Blégu di ge i fnim.” Kmanan én, mgulé i tingaan.

*I kavgulé Dyisas i dee bung tduk i dad to*

<sup>29</sup> Na tnagak Dyisas i banwe én, na magu di kilil i bong lanaw Galili. Na fles kenen mnagad di satu bulul, na déén gusudengan. <sup>30</sup> Na too dee dad to salu di kenen, na nebela i dad to kimay, dad fatok, dad butè, dad to umu, na dademe fa dad to nun tduk. Fnèla di saféd Dyisas, na fanguléan ale. <sup>31</sup> Taman too tikeng i dee dad to di kitela i nimò Dyisas, du gtaalú i dad to umu, sikof lèman i dad to fatok, gagu i dad to kimay, na mite i dad to butè. Na dnayenla i Dwata fnangamfù dad bel Israél.

*I kafaan Dyisas i fat libu dad to  
(Mark 8:1-10)*

<sup>32</sup> Na tlo Dyisas i dad gal mlalò kenen di safédan, na manan, “Toogu kando i dad to stifun dini. Tatlu duhla fanak dini di safédgu, na talandè knaanla. Là agu mayè fdà dale ku landè knaanla, du ken mtafi ale di dalan.”

<sup>33</sup> Na man dad gal mlalò kenen, “Nè gumwèmi knaan di banwe ani gablà fkaan i kdee dad to ani. Fye ku nun to mnè dini!”

<sup>34</sup> Na smalek Dyisas, manan, “File batù fanyu?”

Na manla, “Alò fitu, na nun malnak nalaf bay là dee.”

<sup>35</sup> Na dek Dyisas i kdee dad to sudeng di tanà.

<sup>36</sup> Na nwean i fitu batù fan na i dad nalaf na funa kenen dmasal mlé fye di Dwata. Kafnge én, snatngaan na blén di dad gal mlalò kenen, du fye nalella di kdee dad to. <sup>37</sup> Na kmaan i dad to, na



bsol ale, na i gdè knaan nuku, fitu been fnò. <sup>38</sup> Na i kdee dad lagi kmaan nun fat libu, na là gakuf nse i dad libun na dad ngà kmaan. <sup>39</sup> Na kafnge Dyisas fdà dad to, smakay kenen aweng salu di banwe Magadan.

## 16

*I kafni dad Farisi tnikeng  
(Mark 8:11-13; Luk 12:54-56)*

<sup>1</sup> Nun dad Farisi na dad Sadusi salu di ku Dyisas du tnilewla kenen. Taman mni ale tnikeng mdà di langit gugmadèla kenen i dek Dwata. <sup>2</sup> Kabay ani timel Dyisas, manan, “Ku fan sdaf i duh na too fulè i langit, galyu man, ‘Too fye tanà fayah.’ <sup>3</sup> Kabay ku taflafus na fulè i langit, manyu, ‘Sasè tanà kadang du fulè i langit na labnang.’ Fulung gamu meye dad ilè di langit du fye gadèyu kagakah i tanà, bay là gamu fulung meye i dad ilè gugmadèyu i nimò Dwata di bang ani. <sup>4</sup> Too sasè i dad to di bang ani! Alò dad to takmagol Dwata i mni fa i tnikeng, bay landè tnikeng fitegu di gamu galwà di tnikeng teenyu kadang, dunan i gnagugu gambet i gnagu Dyona.”

Na kafnge én, tngakan i dad Farisi na dad Sadusi na mdà kenen.

*I kafngewe Dyisas gablà di tdò dad Farisi na Sadusi  
(Mark 8:14-21)*

<sup>5</sup> Di kifal i dad gal mlalò ku Dyisas i bong lanaw, taglifetla mebe i fan bnatula.

<sup>6</sup> Na fanngewe ale Dyisas, manan, “Tooyu fang-eye i gambet bulung falnok fan dad Farisi na Sadusi.”

<sup>7</sup> Na là ale gamlabat taman stulen ale, manla, “Manan én kè du landè fan nebeito.”

<sup>8</sup> Kabay gadè Dyisas gsalà i kaglabatla, taman manan di dale, “Tay, ktukay i ksaligyu di deg! Kan ku stulen gamu gablà di làyu kgebe fan? <sup>9</sup> Là gamu fa gamlabat kel ani? Taglifetyu kè i lime batù fan fkaangu i lime libu dad to? File kè been gukuyu i gdèla?

<sup>10</sup> “Na taglifetyu kè i fitu batù fan fkaangu i fat libu dad to? File kè been gukuyu i gdè?”

<sup>11</sup> “Kan kè i duenyu là gamlabat na ise ku btal fan i mangu? Én mangu dunan ani, “Tooyu fang-eye i gambet falnok fan dad Farisi na Sadusi.’ ”

<sup>12</sup> Na ko fa i dad gal mlalò kenen gamlabat ise ku btal falnok fan i manan, bay én fye fangeyela i tdò dad Farisi na Sadusi.

*I gman Fiter gablà ku Dyisas  
(Mark 8:27-30; Luk 9:18-21)*

<sup>13</sup> Na salu ale Dyisas di dad malnak banwe mdadong di lunsud Sisariya Filifos, na ditù gusmalekan dad gal mlalò kenen, manan, “Tan man i dad to gablà di deg i dnagit Tingà To? Simto agu kun?”

<sup>14</sup> Na manla, “Man dademe, ge kun Dyan Gal Munyag. Man dademe, Ilaydya. Na dademe, manla ge kun Dyérimaya ku demen satu di dademe tugad Dwata.”

<sup>15</sup> Na man Dyisas di dale, “Kabay gamu, tan i manyu? Simto agu kè?”

16 Na tmimel Simon Fiter, manan, “Ge sa i Krayst, i Mgalék Dwata mebe i kagotan. Ge sa Tingà i too mto Dwata.”

17 Man Dyisas di kenen, “Simon, tingà Dyona too nun kafyem mdà di Dwata, du ise ku to i faglabat dun di ge, bay Màgu di langit, i fgadè dun di ge. 18 Taman dnagitgu ge Fiter du gambet ge i mgal batu. Na di batu ani gufdakgu gumnègu, dunan i dad to faglut di deg. Na landè gamfisan dale, balù fati. 19 Blégu di ge i kaglut lamwa i dalan dad to salu di kagot Dwata, gambet ge magot i kungsi gamgukà i langit. Na ku tan i fnangam dini, fnang Dwata di langit, na ku tan i faloham dini di tah tanà, faloh Dwata di langit.”

20 Kafnge én, fnang Dyisas i dad mlalò kenen tmulen di balù simto to, ku kenen i Krayst, i Mgalék Dwata.

*I kafgadè Dyisas i kfatin  
(Mark 8:31–9:1; Luk 9:22-27)*

21 Mdà di bang én, tambù Dyisas fgadè di dad gal mlalò kenen gablà di fan mkel di kenen, manan, “Là fakay ku là agu salu di syudad Dyérusalém, na magu di dee kaflayam ditù mdà di dad tua gal mebe i dad to Dyu na i dad ulu i dad bà di Dwata na i dad tamdò i flalò blé Dwata fagu di ku Mosis. Fnabila agu, bay nték agu mdà di fati di gatlung duh.”

22 Na ani duen Fiter mebe kenen di kilil na nngakan, manan, “Amu, là faloh Dwata i manam. Là fakay ku én mkel di ge.”

<sup>23</sup> Kabay falê Dyisas di ku Fiter, manan, “Fawag ge di deg, Satanas! Kayeam nsang i knayè Dwata, du ise di Dwata gumdà i fandamam bay di to.”

<sup>24</sup> Kafnge én, talù Dyisas di dad gal mlalò kenen, manan, “Ku nun to mayè mlalò deg, là fakay ku laan knagol knayè i kton, na mebe i krusan, na too mlalò deg. <sup>25</sup> Du ku simto kmabas i nawan, knean mati. Kabay ku simto mati du mdà di klaloan deg, nun nawan landè sen. <sup>26</sup> Balù gfun satu to i kdee fye dini tah tanà, tan i gufyen ku baling lana di kenen i nawa landè sen? Landè, du landè fakayan blé du fye gbawian i nawan landè sen. <sup>27</sup> Du là mlo i kasfulêgu, agu i dnagit Tingà To, magin i bong kdatah Màgu, na dad kasaliganan. Na di duh én bnalasgu i kdee tamgimò kat satu to. <sup>28</sup> Tulengu gamu i kaglutun, nun di gamu tadag dini là mati kel di kiteyu deg, i dnagit Tingà To, salu dini di kebegu i kagotgu.”

## 17

### *I kgili baweh Dyisas (Mark 9:2-13; Luk 9:28-36)*

<sup>1</sup> Kafnge i nam butang, fagin Dyisas Fiter, Dyém, na Dyan i flanek Dyém di satu mdatah bulul, na landè to ditù alò ale. <sup>2</sup> Na di klola meye di kenen mgili i bawehan. Too mneng i bawehan salngad i duh, na i klawehan mneng too bukay. <sup>3</sup> Na nun msut déén Mosis na Ilaydya stulen di kenen.

<sup>4</sup> Na man Fiter di ku Dyisas, “Amu, too fye du dini gami. Ku mayè ge, fdak agu tlu slung dini, satu i ge, satu ku Mosis, na satu ku Ilaydya.”

<sup>5</sup> Na di slengan fa talù, maglimun ale i labun too mneng, na nun talù mdà di labun, manan, “Ani i tingàgu toogu kanbong nawa, na too fye i nawagu kenen. Flinge gamu kenen!”

<sup>6</sup> Kaklingela i talù mdà di labun, tatì ale lamfan di tanà mdà di klikòla. <sup>7</sup> Kabay fdadong Dyisas na nagotan ale, manan, “Tadag gamu na nang gamu likò.” <sup>8</sup> Na di ktukengla landè dademe to teenla alò Dyisas.

<sup>9</sup> Na di kasolla mdà di bulul too ale nfang Dyisas, manan, “Nangyu tulen di balù simto i tateenyu ditù gine. Silangyu tulen ku tamtéku agu, i dnagit Tingà To, mdà di fati.”

<sup>10</sup> Na smalek dad gal mlalò ku Dyisas, manla, “Kan ku gal man i dad to tamdò i flalò Dwata, na silang kel i To Mgalék Dwata ku takel lêman Ilaydya?”

<sup>11</sup> Na man Dyisas, “Too glut, i muna kel i to gambet ku Ilaydya du fatlagadan i kdee. <sup>12</sup> Na tulengu gamu takel sa Ilaydya, bay là dnìlè i dad to ku simto kenen, na balingla kenen fanlayam gusen i knayèla. Na salngad én kadang i nimòla di deg, agu i dnagit Tingà To.”

<sup>13</sup> Na tlabo én kaglabat i dad gal mlalò kenen, i to manan ani dunan Dyan Gal Munyag.

*I kafgulé Dyisas i tingà nun busaw  
(Mark 9:14-29; Luk 9:37-43)*

<sup>14</sup> Na di kasfulèla di kdee dad to stifun di dungan nun satu lagi salu di ku Dyisas na lkuad di munan, manan, <sup>15</sup> “Amu, begam kando tingàgu lagi! Bnabuy kenen na ku nkel i tdukan too kenen maflayam du fugen di lifoh ku demen di yéél.

16 Tanebegu kenen di dad gal mlalò ge, bay làla gagan fgulê kenen.”

17 Na tmimel Dyisas, manan, “E tay, gamu dad to di bang ani, landè kafaglutyu, na too gsalà i fandamyu. Bong klogu mnè di safédyu! Tan fa dé kaftahàgu i nawagu di gamu fye faglut gamu? Nebeyu dini i tingà.” 18 Na di kakel i tingà, nngak Dyisas i busawan, na lamwà, na tamgulê sa i tingà.

19 Na i dad gal mlalò ku Dyisas fdadong di kenen di alò ale déén du snalekla kenen, manla, “Tan duenmi là gmagan falwà i busaw gine?”

20 Na man Dyisas di dale, “Du là gablà i kafaglutyu. Tulengu gamu i kaglutu, balù tukay i kafaglutyu salngad kalbong i too tukay bnè mustasa gaganyu man di bulul ani, ‘Mili ge ditù!’ Na mili sa! Ku gambet én i kafaglutyu gaganyu mimò balù i tan! 21 (Kabay alò fagu di kdasal na i kafwasa gafalwàyu i busaw salngad ani.)”

*I kfgadè Dyisas lêman gablà di kfatin  
(Mark 9:30-32; Luk 9:43-45)*

22 Di kastifun i kdee dad gal mlalò ku Dyisas di banwe Galili, man Dyisas di dale, “Tamdadong i kablé deg, i dnagit Tingà To, di agot i dad to, 23 na fnatila agu, bay di gatlung duh nték mdà di fati.”

Di kmanan ani, too mlidù nawa i dad gal mlalò kenen.

*I bayad gal tabeng di Bong Gumnè Dwata*

24 Di kakel ale Dyisas di Kafernaum, nun dad to déén gal mwè bayad tabeng di Bong Gumnè Dwata fdadong di ku Fiter, na smalek ale, manla, “I to gal tamdò gamu, mlé kenen dé i bayad tabeng di Bong Gumnè Dwata?” 25 Na man Fiter, “Hae, mlé sa.”

Na di kasfulê Fiter di gumnèla, i muna talù Dyisas, manan, “Simon, tan i ge fandam gablà ani? Dini di tah tanà, i dad hari, simto gal gumwèla i bayad knun blé di hari? Mdà di dad ngàla ku demen di dademe dad to mnè di banwela?”

<sup>26</sup> Na man Fiter, “Di dademe dad to gumwèla.”

Na man Dyisas, “Na ku én, balù là mlé dad ngà i hari. <sup>27</sup> Kabay balù fakay ku là agu mlé, knean mayad ite du ken mahal nawa dad to gal mwè i bayad. Taman salu ge di lanaw, na dmulé ge. Na i nalaf muna samkot, banngatam i baan du déén gumitem filak. Nweam na blém di dale i bayadta.”

## 18

### *I too mdatah to di kagot Dwata (Mark 9:33-37; Luk 9:46-48)*

<sup>1</sup> Di bang én fdadong di ku Dyisas i dad gal mlalò kenen na smalek ale, manla, “Simto i too mdatah to di kagot Dwata?”

<sup>2</sup> Na tlo Dyisas satu tukay tingà di safédan du ftadagan di blengla, <sup>3</sup> na manan, “Tulengu gamu i kaglutan, silang gamu gfusuk di kagot Dwata ku mguman i fandamyu na salngad i fandam dad malnak ngà, <sup>4</sup> du i too mdatah di kagot Dwata dunan i to too fdanà i kton salngad i tingà ani.

### *I kgebe di salà (Mark 9:42-48; Luk 17:1-2)*

<sup>5</sup> “Na ku simto dmawat i satu to gambet i tukay tingà ani du mdà di ksatun di deg, dnawatan agu. <sup>6</sup> Kabay ku simto gumdà i satu to gamsalà, too kenen fanlayam. Fye fa ku mgikat di lialan i bong giling batu, na bat kenen di gumngalam i mahin,

di laan fa mgebe di salà satu di dad to faglut di deg gambet tukay tingà ani.

<sup>7</sup> “Magakdo i dad to di tah tanà du dee dad gamebe dale di salà. Na landè gutlag ani, bay too sasè kagkah kadang i dad to gumdà i dademe to gamsalà. <sup>8</sup> Na ku i bali kmalam ku demen bali bliam mebe ge di kimò sasè, fye fa baling ku kanlangam na batam du fye là ge fles mimò sasè, du fye fa ku fatok ge ku demen kimay na nun nawam landè sen, di sikof kmalam na bliam bay baling ge bat di lifoh landè gusenam. <sup>9</sup> Na ku bali matam gamebe ge di kimò sasè, baling fye fa ku tanwilam na batam du fye là ge fles mimò sasè. Fye fa ku alò satu matam, na nun nawam landè sen. Sasè ku balù sikof matam bay baling ge bat di lanaw lifoh.”

*I fléd gablà di bilibili lana*  
(Luk 15:3-7)

<sup>10</sup> “Too gamu fgeye du fye là mdanà keyeyu i dad to gambet i dad ngà ani. Tulengu gamu i kaglutan, i dad kasaligan Dwata mifat dale gal mnè di saféd i Màgu déén di langit. <sup>11</sup> (Na agu, i dnagit Tingà To, i duengu salu dini di tah tanà du fye falwàgu i dad to lana di Dwata mdà di salàla.)\*

<sup>12</sup> “Di gamu fandam, tan nimò i mfun mlatu bilibili ku lana i satu? Ise én nimoan kè, tngakan i syem falò syem di bulul gumtebla, du fanngabalan i satu lana? <sup>13</sup> Na tulengu gamu i kaglutan, ku teenan, too lehew, mdatah fa i klehewan di syem falò syem i là lmen lana. <sup>14</sup> Na salngad én,

---

\* **18:11** Di dademe dad labi ksulat Tnalù Dwata là gakuf tnaluan 11 di ksulat dun.



là mayè i Màngu di langit ku lana di kenen balù alò satu to gambet dad ngà ani.”

*Gablà di flane kam gamsalà di ge*

<sup>15</sup> Na man Dyisas, “Ku nun flane kam di kafaglut gamsalà di ge, salu ge di kenen na tulenam kenen ku tan i gugsalaan di ge, bay nimoam ani di alò gamu lwe. Na ku fanlingen ge, gambet tagebem kenen lêman di kasaflanekyu. <sup>16</sup> Kabay ku laan ge fanlinge faginam satu ku demen lwe to, du fye nun lwe ku demen tlu to mlinge i kdee gmanyu. <sup>17</sup> Na ku laan ale fanlinge, tulenam di dad to faglut di kastifunyu. Na ku laan ale fanlinge, na i kibòyu kenen fsalngadyu di dad to là gmadè Dwata ku demen satu to gal mwè bayad buhis.”

*I glal dad to mlalò ku Dyisas*

<sup>18</sup> “Tulengu gamu i kaglut, ku tan i fnangyu dini di tah tanà, fnang sa di langit, na ku tan i falohyu dini, faloh Dwata di langit.

<sup>19</sup> “Na ani fa tulengu gamu, ku nun lwe di gamu dini di tah tanà nun ksatu i nawayu gablà di satu fniyu, blé sa i Màngu di langit i fniyu, <sup>20</sup> du balù nè gustifun lwe demen tlu to du mdà di ksatula di deg, déén agu di safédla.”

*Gablà di klifet i salà*

<sup>21</sup> Na fdadong Fiter di ku Dyisas, na smalek kenen, manan, “Amu, file dulêgu nlfet i salà demegu to gamsalà di deg? Kel di fitu dulê dé?”

<sup>22</sup> Kabay tmimel Dyisas, manan, “Ise ku alò fitu dulê, bay kel di fitu falò dulê fitu. <sup>23</sup> Én duenan du i kagot Dwata dad ton salngad di nimò satu hari meye dad uteng i dad saligan di kenen. <sup>24</sup> Na di

katbuan meye dad uteng ani nun nebe di kenen satu saligan gamguteng di kenen dee libu filak.  
<sup>25</sup> Na du laan gambayad i utengan, man i amun fafablin kenen salngad i fasak, na yaanan, dad ngaan, na kdee nfunan du bayad i bong utengan.

<sup>26</sup> “Kabay lkuad i salig di muna i amun du too fakdo, manan, ‘Amu, begam fantahà nawam di deg du bnayadgu i kdee utenggu.’ <sup>27</sup> Na kamdo i amun kenen, taman nlifetan i kdee utengan, na falwaan kenen.

<sup>28</sup> “Kabay di kalwà i to én, gsitongan satu di dademen salig nun tukay uteng di kenen. Di kiten kenen, fanlangan manan, ‘Bnayadam i utengam!’

<sup>29</sup> “Na lkuad i salig ani di munan na fakdo kenen, manan, ‘Begam fantahà nawam di deg du bnayadgu di ge.’

<sup>30</sup> “Kabay laan mayè, na tabalingan fbilanggù i demen salig kel di kbayadan i kdee utengan. <sup>31</sup> Di kite i dad demen salig i mgimoan, too ale mlidù, taman salu ale di amula, na tulenla i kdee teenla.

<sup>32</sup> “Kaklinge i harì dun, fatlon i salig tafalwaan na manan di kenen, ‘Too ge sasè salig! Tanlifetgu i kdee utengam du fakdo ge di deg. <sup>33</sup> Gablà moon ku kandom i demem salig salngad i kakdogu ge.’  
<sup>34</sup> Na too flabè i amun, taman fbilangguan i salig én, du fye fanlayam kel di kbayadan i kdee utengan.

<sup>35</sup> “Salngad én i nimò Màgu di langit di kat satu gamu ku là mdà di nawayu mlifet salà i demeyu to.”

## 19

### *I katdò Dyisas gablà di kagkah i satlamin (Mark 10:1-12)*

<sup>1</sup> Kafnge Dyisas tamdò i kdee ani, tngakan i banwe Galili na salu kenen di banwe Dyudiya di faltù i yéél Dyordan. <sup>2</sup> Na too dee dad to mlalò kenen, na fanguléan déén i dad to nun tduk.

<sup>3</sup> Na nun dad Farisi salu di kenen du neyela dalan dmalam kenen, taman smalek ale, manla, “Fakay dé di flalò Dwata ku kahito yaanito, balù tan i gumdaan?”

<sup>4</sup> Na tmimel Dyisas, manan, “Làyu kè bnasa gablà di nimò Dwata di katbuan di kimoan i banwe, du nimoan satu lagi na satu libun, <sup>5</sup> manan, ‘Ani duen i lagi lamwà di ifat i maan na yéan na mnè di saféd i yaanan du i lwe to ani mgimò satu?’ <sup>6</sup> Taman taise ku lwe to i satlamin bay mbaling satu. Na taman là fakay ku sankah i dad to, i tasansatu Dwata.”

<sup>7</sup> Taman smalek dad Farisi, manla, “Ku én i kagkah, tan duen Mosis faloh i lagi kah i yaanan ku tafunan sulat di fafil gufgadè i kaskah?”

<sup>8</sup> Na tmimel Dyisas, manan, “Hae, du too mgal uluyu! Ani sa duen Mosis faloh ku kahyu yaanyu. Kabay mdà di katbuan ise ani knayè Dwata. <sup>9</sup> Taman mangu di gamu, balù simto to mkah yaanan i là mlafà kenen, gamsalà ku lêman mwè satu libun.”

<sup>10</sup> Na man i dad gal mlalò ku Dyisas di kenen, manla, “Ku ani kagkah i satlamin, fye fa ku nang ito mwè yaan.”

<sup>11</sup> Na tmimel Dyisas, manan, “Nun dad to banlé Dwata kgagan là mwè yaan, bay ise ku kdee dad to.

<sup>12</sup> Là salngad duen i dad to là mwè yaan. I dademe nun gukulang lawehla mdà di ksutla. Na dademe tnalín ale i dad to. Na dademe là mwè yaan mdà di kabléla i ktola di kafbel i kagot Dwata. Nè i to gmagan mimò ani, én fye dmawat i tdò ani.”

*I kdawat Dyisas i malnak dad ngà  
(Mark 10:13-16; Luk 18:15-17)*

<sup>13</sup> Na nun dad to mebe i dad ngà di ku Dyisas du fye nagotan ale na dnasalan. Kabay i dad mlalò ku Dyisas, balingla nngak i dad to én.

<sup>14</sup> Kabay man Dyisas, “Falohyu dad ngà salu di deg, na nangyu ale fnang, du ku simto to nun ksalig salngad i dad ngà ani, gakuf ale di kagot Dwata.” <sup>15</sup> Na kafngen magot na dmasal dale tamdà kenen.

*I lagi nun bong knun  
(Mark 10:17-31; Luk 18:18-30)*

<sup>16</sup> Di satu duh nun lagi salu di ku Dyisas, na smalek, manan, “E To Tamdò, tan i fye nimògu fye gfungu i nawa landè sen?”

<sup>17</sup> Na man Dyisas, “Kan ku smalek ge deg ku tan i fye? Alò satu i fye, dunan Dwata. Nimenam kdee flalò Dwata ku mayè ge gamdawat nawa landè sen.”

<sup>18</sup> Na smalek i lagi, manan, “I tan dad flalò manam én?”

Na man Dyisas, “Nang ge manò, nang ge mlafà yaanam, nang ge tmaku, na nang ge tmulen kéng di usay, <sup>19</sup> mafè ge i maam na yéam, na kandom i demem to salngad kakdom i ktom.”

<sup>20</sup> Na tmimel i lagi, manan, “Tanimengu i kdee dad flalò én. Tan fa kè i gukulanggu?”

<sup>21</sup> Na man Dyisas di kenen, “Ku mayè ge landè gukulangam, mdà ge na fablim i kdee dad knunam, na blém i bayadan di dad to landè. Na fagu déén nun bong knun gfunam di langit. Kafnge é<sup>n</sup>, samfulê ge, na mlalò ge deg.”

<sup>22</sup> Kabay di kaklinge i lagi i man Dyisas, mdà kenen na too mlidù nawan du too bong knunan.

<sup>23</sup> Na man Dyisas di dad gal mlalò kenen, manan, “Tulengu gamu i kaglutan, too malima kagfusuk i to nun bong knun di kagot Dwata.

<sup>24</sup> Glut ani, malima fusuk i bong lmanaf kamél di sol i dalum, bay malima fa i satu to nun bong knun fusuk di kagot Dwata.”

<sup>25</sup> Kaklinge dad gal mlalò kenen ani, too ale tikeng, na smalek ale, manla, “Ku glut é<sup>n</sup>, simto fakay galwà?”

<sup>26</sup> Na meye Dyisas di dale, na manan, “Landè to gmagan mimò ani, bay gagan Dwata i kdee.”

<sup>27</sup> Na tmimel Fiter, manan, “Neyem gami, tat-nagakmi i kdee du mlalò gami ge, na tan i gdawatmi?”

<sup>28</sup> Na man Dyisas di dale, manan, “Tulengu gamu i kaglutan, di bang kadang ku tafnalami Dwata i kdee, sudeng agu, i dnagit Tingà To, di gusudeng i gumdatah. Na di bang é<sup>n</sup>, gamu dad gal mlalò deg nun sfalò lwe gusudengyu mukum, na mukum gamu i dad to mdà di sfalò lwe lumbuk bel Israél. <sup>29</sup> Na kat satu to tmagak i gumnean, ku demen i dad flanakan, ku demen i maan, ku demen i yé<sup>n</sup>, ku demen i dad ngaan, ku demen tanaan mdà di klaloan deg, too bong gdawatan mdà di Dwata kel di mlatu dulê i kbongan di

tatnagakan. Na gdawatan fa i nawa landè sen.  
<sup>30</sup> Na nun dee dad to mdatah di bang ani, baling mdanà kadang di fulé duh. Na dad to mdanà di bang ani, mdatah kadang di fulé duh.”

## 20

### *I taden blé i mfun fule*

<sup>1</sup> Na man Dyisas, “Satu guflingengu i kagot Dwata di nimò satu to mfun tanà gumulen dad bunge grép. Too flafus kenen lamwà du meye dad to mimò di tanaan. <sup>2</sup> Na i kastulenla i tagnè taden di sduh na tamastandè ale, taman fimoan ale di tanaan.

<sup>3</sup> “Na di tngà mnagad i duh lêman lamwà mfun i fule na nun teenan dad to di fadyan tatì tadag déén landè nimòla, <sup>4</sup> taman manan di dale, ‘Mimò gamu di tanàgu, na tnadengu gamu i gablà tadenyu kadang.’ <sup>5</sup> Taman mdà ale du mimò ditù.

“Na lamwà kenen di kaldu i duh na lêman di tngà masol i duh, na nun dad to fimoan di tanaan. <sup>6</sup> Na di fan kasdaf i duh, lamwà kenen lêman na teenan dademe to tì tadag déén, na manan, ‘Tan duenyu tadag dini tayud i duh landè nimòyu?’

<sup>7</sup> “Na manla, ‘Hae, du landè to fimò gami.’

“Na manan di dale, ‘Na ku én, mimò gamu di tanàgu.’

<sup>8</sup> “Na di kasdaf i duh, man i mfun i fule di to magot i taden, manan, ‘Tlom i dad to mimò, na tnadenam ale. Funam tnaden i dad to fulé tambù mimò, na fafulém dad guna mimò.’

<sup>9</sup> “Kakel i dad to tambù mimò mdà di fan sdaf i duh, na banlén kat satu dale i tagnè taden di sduh.

<sup>10</sup> Taman di ktadenan i dad guna mimò, i man

nawala bong fa déén i dale taden, bay salngad sa i tadenla. <sup>11</sup> Na di kagdawatla i tadenla too ale mugak di mfun i tanà. <sup>12</sup> Manla, ‘I dad to gfulé tambù, alò satu uras klola mimò, bay fsalngadam ale di gami, blaam tatayud i duh mimò gami di bong kinit.’

<sup>13</sup> “Na tmimel kenen, manan di satu di dale, ‘Flanek, làta gamu nlangong. Ise éñ kè tagnè kas-tulenta di katbuam mimò, i tagnè taden di sduh i tadengu ge? <sup>14</sup> Dnawatyú i tadenyu, na mulé gamu. Éñ kayègu ku tan i blégu gamu salngad éñ i blégu di dad to fulé kel. <sup>15</sup> Man, landè kè kaglutgu magot i filakgu? Ken mingà nawayu du too agu mayè mlé.’

<sup>16</sup> “Na salngad éñ, nun dad to fulé ani baling guna kadang di fulé duh. Na nun dad to muna ani baling gfulé kadang di fulé duh.”

*I gatlu dulê Dyisas fgadè gablà i kfatin  
(Mark 10:32-34; Luk 18:31-34)*

<sup>17</sup> Na mnagad ale Dyisas salu di syudad Dyérusalém. Di slengla magu fafdadong Dyisas i dad sfalò lwe gal mlalò kenen na klola magu manan di dale, <sup>18</sup> “Flinge gamu, du ani salu ito di Dyérusalém na ditù bléla agu, i dnagit Tingà To, di agot i dad ulu i dad bà di Dwata na dad tamdò i flalò blé Dwata fagu di ku Mosis na nukumla agu di fati. <sup>19</sup> Na kafnge éñ, bléla agu di dad to ise Dyú du fye snilola agu, na bnadasla, na flesla agu nlansang di krus. Kabay di gatlung duh nték agu Dwata mdà di fati.”

*I fni yê ale Dyém na Dyan  
(Mark 10:35-45)*

<sup>20</sup> Kafnge én, fdadong di ku Dyisas i yaan Sébidi magin i lwe dad ngaan lagi, na lkuad kenen di munan du nun kayean fni di kenen. <sup>21</sup> Na smalek Dyisas, manan, “Tan i kayeam?”

Na manan, “Ku tage magot i banwe di fulé duh, fsudengam i lwe dad ngàgu ani di safédam, satu gsen di kwananam na satu gsen di ibengam.”

<sup>22</sup> Kabay tmimel Dyisas, manan, “Làyu gadè i fniyu. Gaganyu kè mebe i kaflayam salngad i bong kaflayam gnagugu kadang?”\*

Manla, “Hae, gaganmi.”

<sup>23</sup> Man Dyisas, “Too glut, i kaflayam gnaguyu kadang salngad di kaflayam gnagugu. Kabay landè kaglutgu malék ku simto fsudeng gsen di kwanangu na di ibenggu, du én alò gsudeng déén i dad to tagutmagà i Màgu dun.”

<sup>24</sup> Na di kaklinge i dademe sfalò gal mlalò ku Dyisas i fni dademela ani, flabè ale di lwe saflanek ani. <sup>25</sup> Kabay, tlo Dyisas kdeela di safédan, na manan, “Tagadèyu i gal nimò i dad ganlal i dad to di tah tanà ani. Toola bankut i dad to gdanà di dale. I dad to nun glal, toola gal dek i dad to. <sup>26</sup> Kabay gamu, ise én i kfaguyu, du ku nun di gamu mayè mbaling mdatah là fakay ku laan gal ttabeng i dademen. <sup>27</sup> Na ku nun di gamu mayè mdatah di kdee, là fakay ku laan flifan i kton di kdee dademen. <sup>28</sup> Salngad deg, i dnagit Tingà To, làgu salu di tah tanà ani du én kayègu ku ttabeng agu i dad to, bay i duengu salu dini du ttabenggu

---

\* **20:22** Satu kubad ani dunan: Gaganyu kè tmufi minum i basu guminumgu.



i dad to na blégu i ktogu di fati, du bnayadgu dad salàla du fye dee dad to galwà.”

*I kafgulê Dyisas dad to butè  
(Mark 10:46-52; Luk 18:35-43)*

<sup>29</sup> Na di kdà ale Dyisas di banwe Dyérikò too dee dad to mlalò kenen. <sup>30</sup> Na nun lwe to butè sudeng di kilil dalan. Di kaklingela, i to mlius di dale, dunan Dyisas, tamlo ale, manla, “E Bel Harì Dabid, begam gami kando.”

<sup>31</sup> Na dee to mngak dale, na manla dale fanak. Kabay baling matnù kakitla, manla, “E Amu, Bel Harì Dabid begam gami kando!”

<sup>32</sup> Na tlag Dyisas magu du tlon ale di safédan, manan, “I tan kayèyu nimògu di gamu?”

<sup>33</sup> Na manla, “Amu, kayèmi ku beg gami mite.”

<sup>34</sup> Na too kamdo Dyisas dale, na nagotan i matala, na mite ale, na fles ale magin kenen.

## 21

*I sangal kagu Dyisas di syudad Dyérusalém  
(Mark 11:1-11; Luk 19:28-40; Dyan 12:12-19)*

<sup>1</sup> Na di kagdadong ale Dyisas di syudad Dyérusalém, di kakella di banwe Bétfagi di dungan i bulul Olib, dekan muna lwe gal mlalò kenen, <sup>2</sup> na manan di dale, “Fles gamu di banwe sen munaito. Kakelyu ditù, nun teenyu satu dongki ikat gagin i tingaan. Nbelyu ikatla na nebeyu dini di deg. <sup>3</sup> Na ku nun to smalek gamu, manyu, ‘Nun gukmamu i Amu dun.’ Na gasilan fulê di gamu kadang i dongki na tingaan.”

<sup>4</sup> I tanimò Dyisas ani, du fye gdohò i gman Dwata fagu di satu tugadan, manan,

5 “Fgadeam dad to di Sion,\* manam,  
 ‘Neyeyu, du fan kel di gamu i Hariyu.  
 Fdanaan i kton na smakay kenen di dongki,  
 tingà dongki i snakayan.’ ”

6 Na tamdà i lwe dek Dyisas. Na nimenla i manan. 7 Na nebela i dongki na tingaan di ku Dyisas, na afidla dun i dademe klawehla, na smakay Dyisas. 8 Na di slengla magu nun dee to mbel dademe klawehla di dalan gumagun na kamlang ale fa dad malnak fanga kayu nun doon, du filèla di dalan gumagu Dyisas du fitela afèla kenen.† 9 Na tamlo i dad to di muna Dyisas, na tmimel dad to di fulé, manla,  
 “Dnayenito i bel Hari Dabid.

Too nun kafye i to salu dini mebe i glal Amuito Dwata.  
 Dnayenyu Dwata kdeeyu mnè di tah langit!”

10 Na di kfusuk Dyisas di Dyérusalém kdee dad to di klamang syudad too tikeng, manla, “Simto to ani dé?”

11 Na tmimel i dad to magin ku Dyisas, manla,  
 “Dyisas ani, satu tugad Dwata mdà di banwe Nasarét di Galili.”

*Inimò Dyisas di Bong Gumnè Dwata  
 (Mark 11:15-19; Luk 19:45-48; Dyian 2:13-22)*

12 Na fusuk Dyisas di Bong Gumnè Dwata, i gal gumangamfù dad Dyu. Na ndalan lamwà dad

---

\* 21:5 Satu dagit Sion, dunan Dyérusalem. † 21:8 Satu kibò dad to di bang Dyisas mto fite afèla i hari salu di banwela, galla nbel klaweh na fkah malnak fanga kayu nun doon di dalan gumagun. Na i gal snakay i dad hari di bang én dunan i too fye kudà, bay du fdanà Dyisas i kton, én snakayan, dunan donki.

to sbayad déén. Fnugenan dad lamisa i dad to samfalit filak, na dad gusudeng i dad fabli salafati galla dsù. <sup>13</sup> Na manan di dale, “Tagsulat di Tnalù Dwata, manan, ‘Én gukmamu i Gumnègu gal gudmasal,’ bay tabalingyu nimò gumnè i dad to tmaku!”

<sup>14</sup> Na nun dad to butè na dad to là gagu salu di kenen déén di lam i Bong Gumnè Dwata, na fanguléan ale. <sup>15</sup> Kabay too flabè i dad ulu i dad bà di Dwata na dad tamdò i flalò blé Dwata fagu di ku Mosis di kitela i dad tnikeng nimò Dyisas, na di kaklingela i kit dad ngà di lam i Bong Gumnè Dwata, di kmanla, “Dnayenito i bel Hari Dabid!”

<sup>16</sup> Taman smalek ale ku Dyisas, manla, “Laam kè linge i manla?”

Na tmimel Dyisas, manan, “Hae sa. Làyu kè bnasa i man di Tnalù Dwata, manan, “Tdoam dad ngà, balù dad too malnak ngà dmayen kdataham?”

<sup>17</sup> Na tnagakan ale na lamwà di syudad, du salu kenen di Bétani, na déén gumilean di butang én.

*Italù Dyisas di kayu fig  
(Mark 11:12-14, 20-24)*

<sup>18</sup> Kakwalan én, di dalan Dyisas samfulè di syudad, tabitil kenen. <sup>19</sup> Na teenan satu kayu fig di kilil dalan, na fdadong kenen, bay kakelan déén alò doon i teenan landè bungen. Taman talù Dyisas di kayu, manan, “Fandà ani talà ge gambunge.” Na tati mlanas i kayu.

<sup>20</sup> Na di kite dad gal mlalò ku Dyisas mati i kayu, tikeng ale, na smalek ale, manla, “Kan ku mlal mlanas i kayu fig.”

<sup>21</sup> Na tmimel Dyisas, manan, “Tulengu gamu i kaglutam, ku faglut gamu na là lwe i nawayu, gaganyu nimò i tanimògu di kayu ani, na ise ku alò ani, bay fakayyu man di bulul ani, ‘Magket ge na gbat di lam i mahin,’ na gdohò sa i manam. <sup>22</sup> Du balù tan i fniyu di dasal gdawatyu.”

*I ksalek gablà di gumdà i glal Dyisas  
(Mark 11:27-33; Luk 20:1-8)*

<sup>23</sup> Na samfulê Dyisas di Bong Gumnè Dwata. Di slengan tamdò di lam, fdadong di kenen i dad ulu i dad bà di Dwata na i dad tua gal mebe dad Dyu, na smalek ale, manla, “Tan kè i kaglutam mimò i kdee nimoam, na simto mlé ge glal?”

<sup>24</sup> Na tmimel kenen, manan, “Nun snalekgu gamu funa. Ku tmimel gamu, tulengu gamu i gumdà glalgu mimò ani. <sup>25</sup> Tulenyu deg, i kbunyang Dyan, nè gumdà i glalan, mdà di Dwata, ku demen mdà di to?”

Na stulen ale ku tan fye timella, na manla, “Tan i timelito? Ku manito, ‘I glalan mdà di Dwata,’ snalekan ito, ‘Kan ku làyu fnaglut i manan?’ <sup>26</sup> Kabay ku manito, ‘Mdà di to,’ likò ito dad to, du i kdeela too fnaglut Dyan satu tugad Dwata.”

<sup>27</sup> Taman tmimel ale ku Dyisas, manla, “Làmi gadè.”

Taman man Dyisas di dale, “Na, làgu tmulen gamu ku nè gumdà i glalgu mimò i nimògu.”

*I fléd gablà di lwe tingà lagi*

<sup>28</sup> Na fadlug Dyisas talù di dad ganlal i dad Dyu, manan, “Tan i fandamyu gablà ani? Nun satu to lwe tingaan lagi. Na salu kenen di twege, na

manan, ‘Tò, mdà ge du mimò ge di fule grép duh ani.’

<sup>29</sup> “Baling man i tingaan, ‘Là agu mayè.’ Kabay là mlo msal kenen na mdà du mimò ditù.

<sup>30</sup> “Na salu i mà ani di tingaan twali na salngad i manan. Na tmimel i tingaan, manan, ‘Hae Mà,’ bay laan salu ditù. <sup>31</sup> Na di lwe dad ngà ani, simto i mimen knayè i màla?”

Na tmimel ale, manla, “I twege.”

Na man Dyisas, “Hae, na tulengu gamu i kaglut, i dad to sasè, gambet i dad to mwè bayad buhis na i dad libun mkat lagi, muna fa di gamu fusuk di kagot Dwata. <sup>32</sup> Hae, du salu Dyan Gal Munyag dini di gamu du fiten di gamu i dalan du fye matlu gamu, bay là gamu faglut di kenen. Baling én faglut di manan i dad to mwè bayad i buhis na i dad libun mkat lagi. Kabay gamu, balù tateenyu i kafaglut dad to én, knean là gamu msal na faglut di tdoan.”

*I guflingen Dyisas i dad ganlal di kafaglut di to magot i fule*

*(Mark 12:1-12; Luk 20:9-19)*

<sup>33</sup> Na man Dyisas, “Flinge gamu di satu fléd ani. Nun satu to mule i walad dnagit grép di tanaan na nlabatan. Na makol kenen sol di bong batu du gumisà i bunge grép. Na fdakan satu mdatah gumnè i to munung dad fulen. Na kafnge én, fagotan i dad fulen di dademe to, du salu kenen di satu banwe. <sup>34</sup> Na di bang ktaga dad bungen, nun dekan dad saligan salu di dad to magot dun, du fwean kenen alel.

<sup>35</sup> “Kabay i dad to fagotan dun, balingla kanfè i dad saligan, na bnunalla i satu, fnatila i satu,

na tnudàla batu i satu. <sup>36</sup> Na dekan lêman ditù dademe dad saligan, dee fa di dad muna dekan. Kabay salngad nimòla di dale. <sup>37</sup> Di gusenán, dekan i tingaan, du manan, ‘Là fakay ku làla nafè i tingàgu.’

<sup>38</sup> “Kabay kantola teen i tingaan, stulen ale, manla, ‘Ani sa tingà i mfun i fule. Kenen i mfun kadang, taman snitongito kenen na fnatiito, du fye di kfati maan gito gamfun i fule.’ <sup>39</sup> Na taman kanfèla, na ditù gumbatla kenen di lwà i gumule i maan na flesla fnati.”

<sup>40</sup> Na smalek Dyisas, manan, “Ku takel i mfun fule ditù, tan i nimoan di dad to gufagotan i fulen?”

<sup>41</sup> Manla, “Fnatin sa i dad to sasè én, na fagotan di dademe dad to mayè mlé i alelan ku tabang kgafat i bungen.”

<sup>42</sup> Na man Dyisas di dale, “Làyu kè bnasa i man Dwata di Tnaluan? Manan,

‘I batu too knang i dad to fdak gumnè,  
du di dale fandam landè gukmamu dun,  
én baling i batu too mabtas di kdee.

Hae, ani mgimò i Amuito Dwata,  
na di kitemi, too gamtikeng i nimoan.’

<sup>43</sup> “Taman tulengu gamu, i kagot Dwata nawì mdà di gamu na blé di dad to mimò knayean.

<sup>44</sup> (Na ku simto gdauf di batu ani, tfò dad tulanan, bay ku simto tankan i batu, tatì mluna.”)

<sup>45</sup> Na kaklinge dad ulu i dad bà di Dwata na dad Farisi i dad fléd Dyisas ani, glabatla ale gugtadè i manan. <sup>46</sup> Taman too ale mngabal kfagu kamfè kenen di bang én, bay likò ale di dee dad to faglut na Dyisas i satu tugad Dwata.

## 22

### *I fléd gablà di klak di kasdeme* (Luk 14:15-24)

<sup>1</sup> Na tamdò Dyisas di dad to lêman fagu di fléd, manan, <sup>2</sup> “Satu guflingengu i kagot Dwata di satu harì mimò i bong fista di kasdeme i tingaan lagi. <sup>3</sup> Na dekan dad saligan di dad to tanlakan du fye nngèla ale, bay là ale mayè.

<sup>4</sup> “Na taman dekan lêman dademe dad saligan, na manan, ‘Tooyu man di dad to tanlak, tagatlagad i kakaan. Tatnatê i dad malbang bakagu na dad ngà baka tafabù, tagatlagad i kdee. Na tooyu ale fsalu dini di fista i kasdeme tingàgu.’

<sup>5</sup> “Kabay là fduf i dad to tanlakan i manan, na baling ale fadlug di dad nimòla, satu salu di nligon, na satu salu di tindan. <sup>6</sup> Na i dademe, kanfèla dad saligan, na fatdukla ale, na fnatila. <sup>7</sup> Na too flabè i harì, na dekan dad sundalun, du fye fnatila i dad to mati i dad saligan, na snakufan i syudad gumnèla.

<sup>8</sup> “Kafnge én, tlon i dademe dad saligan, na manan, ‘Tagatlagad fista i kasdeme, bay i dad to tamunagu nlak là ale gablà salu di fista ani. <sup>9</sup> Taman mdà gamu salu di dad dalan di gusabù i dad to, na nlakyu i kdee dad to teenyu du salu di fistagu.’ <sup>10</sup> Na mdà i dad saligan salu di dad dalan, na santifunla i kdee dad to teenla, balù fye dad to ku demen sasè. Na tafnò dad to i bong gukmaan di fista i kasdeme.

<sup>11</sup> “Kabay di kfusuk i harì du neyen i dad to salu déén, nun teenan satu to là lamsak klaweh i kasdeme. <sup>12</sup> Na snalek kenen i harì, ‘E flaneK,

tan i kagfusukam dini du là ge lamsak klaweh i kasdeme?" Kabay là gamtimel i to én.

<sup>13</sup> "Na man i harì di dad saligan, manan, 'Bnakusyu dad blian na dad sigalan, na batyu di lwà di gukmifun, déén di gumlanu dad to na gukminggat i kifanla.'

<sup>14</sup> "Hae, du dee dad to nlak Dwata, bay là dee i dad mgalékan."

*I salek gablà di bayad buhis*

*(Mark 12:13-17; Luk 20:20-26)*

<sup>15</sup> Na kafnge én, lamwà dad Farisi, du santulenla kfragula kamfè ku Dyisas fagu di salek. <sup>16</sup> Na én nimòla, dekla di ku Dyisas dademe to gal mlalò dale na dademe dad Dyu msen di ku Harì Hérod. Kakella ditù, manla, "To Tamdò, gadèmi ge satu to là tmulen kéng. Tamdò ge i kaglut gablà di knayè Dwata, du laam fkah di nawam i man dad to gablà di ge, na là mabtas di ge ku tan i glalla.

<sup>17</sup> Taman tulenam gami ku tan i fandamam. Fakay dé di flalò blé Dwata fagu di ku Mosis ku mlé gami i bayad buhis di ku Sisar, i gumdatah di banwe Roma ku demen là?"

<sup>18</sup> Kabay gadè Dyisas i duenla smalek ani, taman manan, "Gamu dad to flingu mimò fye, kan ku tilewyu agu fnawel? <sup>19</sup> Fiteyu deg satu filak galyu bayad buhis." Na nebela satu filak di kenen. <sup>20</sup> Na snalekan ale, manan, "Simto kè baweh na dagit i gkah di filak ani?"

<sup>21</sup> Na manla, "Ku Sisar."

Taman man Dyisas di dale, "Na ku tan i nfun Sisar bléyu ku Sisar, na ku tan i nfun Dwata bléyu di Dwata."



<sup>22</sup> Di kaklingela i manan, too ale tikeng, taman mdà ale tmagak kenen.

*I salek gablà di kték mdà di fati*  
(Mark 12:18-27; Luk 20:27-40)

<sup>23</sup> Na di duh én nun dad Sadusi salu di ku Dyisas, dunan dad Dyu i gal mangman kun, là mték i dad to mdà di fati. <sup>24</sup> Na ani snalekla di kenen, manla, “To Tamdò, nun sulat Mosis di gito di muna fa, gman, ku mati satu lagi, bay landè tingàla yaanan, là fakay ku là nwè i flanekan i libun balu én, du fye nun bel i tamati fagu di kenen. <sup>25</sup> Na di muna kun, nun fitu lagi saflanek mnè dini. Na mwè yaan i twege, bay mati na landè tingàla, taman nwè i galwen. <sup>26</sup> Kabay salngad ani mkel di galwen na gatlung na di kdee dad fitu saflanek kel di sangal twali. <sup>27</sup> Kafnge én, mati i libun. <sup>28</sup> Na ani snalekmi, kadang di kték i dad mati, di dad fitu saflanek simto yaan i libun ani, du i kdeela slame mwè kenen?”

<sup>29</sup> Na tnmel Dyisas, manan, “Gsalà i fandamyu du làyu gadè i Tnalù Dwata na làyu gadè i kbong tulusan. <sup>30</sup> Du di kték i dad to mati di fulé duh, talandè swè yaan lagi ku demen libun, du én kagkahla salngad i dad kasaligan Dwata di langit. <sup>31</sup> Na gablà di fnaglutyu i là mték dad to mati, làyu kè lmen masa i man Dwata di gamu? <sup>32</sup> Manan, ‘Agu i Dwata fnangamfù Abraham, Isaak, na Dyékob.’ I gman Dwata ani i satu gugmadeito balù tamati ale Abraham mto ale lêman, du Dwata i Dwata fnangamfù i dad to mto, ise dad to mati.”

<sup>33</sup> Na di kaklinge i dad to i man Dyisas ani, too ale tikeng di katdoan.

*I too mdatah flalò Dwata*  
(*Mark 12:28-34; Luk 10:25-28*)

<sup>34</sup> Di kaklinge i dad Farisi gablà di kfisan Dyisas i dad Sadusi, sdulê ale stifun di kenen. <sup>35</sup> Na nun satu di dale gal mubad dad flalò blé Dwata fagu di ku Mosis tmilew mawel kenen fagu di salek. <sup>36</sup> Manan, “E To Tamdò, tan i too mdatah flalò di kdee flalò Dwata?”

<sup>37</sup> Na tmimel Dyisas, manan, “Tooyu kando i Amuyu Dwata mdà di nawayu, na di kdee knayèyu, na di kdee fandamyu.’ <sup>38</sup> Ani i too mdatah flalò na mabtas di kdee. <sup>39</sup> Na i gamtadol, fan salngad di muna, dunan ani, ‘Kandoyu i demeyu to salngad kakdoyu i ktoyu.’ <sup>40</sup> I lwe flalò ani, gumdà i kdee flalò blé Dwata di ku Mosis na i kdee tdò dad tugad Dwata.”

*I salek gablà di To Mgalék Dwata*  
(*Mark 12:35-37; Luk 20:41-44*)

<sup>41</sup> Di kagastifun fa i dad Farisi, smalek Dyisas dale, <sup>42</sup> manan, “Tan fandamyu gablà ku Krayst, i Mgalék Dwata? Simto kè gutambulan?”

Na tmimel ale, manla, “Kenen i bel Hari Dabid.”

<sup>43</sup> Na man Dyisas, “Ku én, kan ku katlo Dabid kenen Amu fagu di kalak i Tulus Dwata? Hae, du ani gman Dabid,

<sup>44</sup> ‘Man Amuito Dwata di Amugu, manan,

“Fagotgu ge i kdee,

taman sudeng ge dini gsen di kwanangu,

kel di kagfisangu dad dmuen ge,

na kafkahgu dale di dungan falel bliam.” ’

<sup>45</sup> Na du katlo Dabid, i To Mgalék Dwata dunan Amu, na kan ku én katloyu kenen bel Dabid?”

<sup>46</sup> Na landè to gamtimel kenen, na mdà di duh én talandè mayè smalek kenen.

## 23

*I kafngewe gablà di nimò i dad gal tamdò i flalò Dwata na dad Farisi (Mark 12:38-39; Luk 11:43, 46; 20:45-46)*

<sup>1</sup> Na kafnge én, talù Dyisas di kdee dad to na di dad gal mlalò kenen, manan, <sup>2</sup> “I dad to tamdò i dad flalò na dad Farisi, ale i nun glal mubad dad flalò blé Dwata fagu di ku Mosis, <sup>3</sup> taman là fakay ku làyu nimen i kdee tulenla gamu, bay nangyu ganbet i dad nimòla du làla nimen i galla tdò. <sup>4</sup> Dee flalòla i dad to too malima nimen, gambet fkakifla di dad to i dad too blat nebe, bay balù satu tnalò, làla agot du tmabeng mebe dun.

<sup>5</sup> “I kdee fye nimòla, nimòla du fye fite di dademe to. Falbangla i dad gumkahla dad gusmulat Tnalù Dwata batangla di ulula na sigalla. Na ftahàla i fayolla di kilil klawehla du fye dag i dad to i kimenla Dwata. <sup>6</sup> Na én kayèla di dad fista i dad gusudeng i dad to too mgafè, na déén di dad gusatdò kayèla i fye gusudeng di muna. <sup>7</sup> Ku salu ale di fadyan kayèla ku too ale nafè i dad to déén, na ku ‘To Tamdò’ i kdagit dale.

<sup>8</sup> “Kabay nangyu faloh ku én kdagit gamu ‘To Tamdò,’ du i kdeeyu salngad du saflanek, na alò satu tamdò gamu. <sup>9</sup> Na nang gamu dmagit i to dini di tah tanà, ‘Mà,’ du alò satu i Màyu, dunan Dwata ditù di langit. <sup>10</sup> Na nangyu faloh ku nun dmagit gamu, ‘Amu,’ du alò satu Amuyu, dunan agu i Mgalék Dwata. <sup>11</sup> Na én too mdatah di kdeeyu

dunan i to flifan i kton di dademen. <sup>12</sup> Du balù simto to fdatah i kton, fdanà sa kadang, na balù simto to fdanà i kton, fdatah sa kadang.”

*I kngak Dyisas i dad to flingu ale fye to*

*(Mark 12:40; Luk 11:39-42, 44, 47-52; 20:47)*

<sup>13</sup> “Magakdo gamu dad tamdò i flalò blé Dwata na gamu dad Farisi! Fanlayam gamu kadang du tati gamu flingu gamu fye to, bay nsangyu i dalan dad to fusuk di kagot Dwata. Là gamu mayè fusuk na balù i dad to mayè, làyu faloh dun. ( <sup>14</sup> Magakdo gamu dad tamdò i flalò blé Dwata na gamu dad Farisi! Tati gamu flingu gamu fye to, bay mlangong gamu i dad to balu du fye gwèyu dad knunla, na fantahàyu dasalyu du fye là dilè i dad to i ksasèyu. Taman baling matnù i flayamyu di fulé duh!)

<sup>15</sup> “Magakdo gamu dad tamdò dad flalò blé Dwata na gamu dad Farisi! Fanlayam gamu kadang du tati gamu flingu gamu fye to! Hae, mifal gamu i mahin na magu gamu di gumawagan di klamang banwe du fye gebeyu dad to di tdòyu balù alò satu to. Kabay ku tagebeyu kenen, matnù fa i ksasean di gamu, na mdatah fa i kagablaan salu di lanaw lifoh.

<sup>16</sup> “Magakdo gamu du tamdò gamu i dalan di demeyu to, bay salngad gamu to butè gal malak dademe to, du ani tdòyu, ‘Ku nun to smafà fagu di Bong Gumnè Dwata, fakay ku laan dnohò dun, bay ku smafà kenen fagu di blawen di lam i gumangamfù di Dwata là fakay ku laan dnohò.’

<sup>17</sup> Tay too gamu kulang na butè! Tan i too mabtas, i blawen ku demen i Bong Gumnè Dwata. Alò mabtas i blawen di Dwata du déén di Bong Gumnean.

18 Na tdòyu kun, ‘Ku nun to smafà fagu di gudamsù di Dwata fakay ku laan dnohò i fakangan, bay ku smafà kenen fagu di dsù di tah i gudamsù là fakay ku laan dnohò i fakangan.’ 19 Tay kbutèyu! Tan i too mabtas, i dsù bléyu ku demen i gudamsù di Dwata? Silang gablà dsù di Dwata, ku tamatfing di gudamsù di kenen. 20 Taman ku nun to smafà fagu di gudamsù di Dwata gakuf i kdee fkah di tahan. 21 Na ku nun to smafà fagu di Bong Gumnè Dwata gakuf Dwata i mnè di lam. 22 Na ku nun to smafà fagu di langit, gakuf di safaan i gusudeng Dwata di langit na Dwata i sudeng di tahan.

23 “Magakdo gamu dad tamdò i dad flalò blé Dwata na dad Farisi! Fanlayam gamu kadang du tatì gamu flingu gamu fye to. Galyu blé di Dwata i gasfalò alel balù di dad malnak bol utenyu. Kabay fbayàyu i dad mdatah nimò, dunan i tlu kibòyu i demeyu to, na i kakdo na kagsalig. Ani moon tooyu nimò, na fadlug fa i kimenyu i dademe flalò galyu nimen. 24 Gamu salngad i dad butè gal malak dademe to! Snalàyu i dad malnak ngà langad mdà di ninumyu du fye landè magagsik ginumyu, bay gambet fanloyu baling i dad mal-bang lmanaf kamél magagsik, du nimenyu dad là ali mabtas di Dwata, bay fbayàyu dad mabtas.

25 “Magakdo gamu dad tamdò i dad flalò blé Dwata na gamu dad Farisi. Fanlayam gamu kadang du tatì gamu flingu gamu fye to fagu di klalòyu dee flalò, bay di lam nawayu too fnò klangong na klom. Salngad ku nalobyu di lwà i tabù na fligo, bay ditù di lam sana kagsikan. 26 Butè gamu dad Farisi! Én fye nimòyu, funayu nalob di lam i

tabù na fligo, na fagu déén, lê mlaneb di lwaan.

<sup>27</sup> “Magakdo gamu dad to tamdò i dad flalò blé Dwata na gamu dad Farisi. Fanlayam gamu kadang du tatì gamu flingu gamu fye to. Gambet gamu i dad lbang galla fnintura bukay. Di lwà, too fye neye, bay knean ditù di lam too fnò tulan i dad to mati na i dad magagsik. <sup>28</sup> Na salngad én i gamu kagkah du di kite i dad to, matlu gamu, bay di lam nawayu tatì fnò i kaflingu na dee bung sasè.

<sup>29</sup> “Magakdo gamu dad tamdò dad flalò blé Dwata na gamu dad Farisi. Fanlayam gamu kadang du tatì gamu flingu gamu fye to! Nimòyu i too fye baweh gulambang i dad tugad Dwata fnati, na fanseyu fnalas dad lbang i dad muna to matlu. <sup>30</sup> Na én manyu, kun, ‘Ku mto gami di bang i dad gutambulito là gami magin mati i dad tugad Dwata. <sup>31</sup> Na fagu di manyu én, nfunyu kadi na gamu bel i dad manò dad tugad Dwata! <sup>32</sup> Na taman snikofyu sa i tatanbù i dad gutambulyu.’

<sup>33</sup> “Salngad gamu dad ulad na i gutambulyu ulad! Tan i kibòyu falwà i ktoy fye là gamu fanlayam di lanaw lifoh? <sup>34</sup> Dekgu di gamu kadang i dad tugad Dwata, na dad to nun kfulung, na dad nun bong gnadè mdà di Dwata. Na én nimòyu kadang fnati dademe, nlangsang di krus dademe, na sankél dademe di lam i galyu gusatdò, na dluyu ale, balù nè banwe gumilala. <sup>35</sup> Na ani duenan én flayam blé Dwata di dad to manò i kdee dad to landè salà slame sulé di tahyu, mdà di kbanò ku Abél kel di kbanò Sakaraya i tingà Barakaya, i bnanòla di bleng i gumangamfù di Dwata na i gudamsù di kenen. <sup>36</sup> Tulengu gamu i kaglutan,

gamu dad to di bang ani mebe i kdee kaflayam di kbanò i kdee ani.”

*I kalbong nawa Dyisas di dad to di syudad Dyérusalém*

*(Luk 13:34-35)*

<sup>37</sup> Na man Dyisas, “E gamu dad to di Dyérusalém, gamu dad to mati i dad tugad Dwata, na tmudà batu kel di kfati i dad saligan dekan di gamu! Tadee dulêgu mayè samtifun gamu di ifatgu gambet i anuk mliton santifunan i dad unsuyan di dungan fafakan, bay là gamu mayè. <sup>38</sup> Na taman tnagak gamu Dwata na falmo kadang i banweyu. <sup>39</sup> Du tulengu gamu, silangyu agu lêman teen ku takel i bang i kmanyu, ‘Nun kafye di to salu dini mebe i glal mdà di Amuito Dwata.’ ”

## 24

*I kalmo i Bong Gumnè Dwata*

*(Mark 13:1-2; Luk 21:5-6)*

<sup>1</sup> Na lamwà Dyisas di Bong Gumnè Dwata, na di kdaan fdadong di kenen dad gal mlalò kenen, na tdòla di kenen i kdee gumnè glam di Bong Gumnè Dwata. <sup>2</sup> Na manan, “Hae, neyeyu i kdee ani, du tulengu gamu i kaglutatan, malbà sa kadang na landè batu gtagak di tagnè gugkahan du sdulê malbà kdeela.”

*I dad samuk na dad kaflayam*

*(Mark 13:3-13; Luk 21:7-19)*

<sup>3</sup> Na fles Dyisas di bulul dnagit Olib, na sudeng déén, na fdadong di kenen dad gal mlalò kenen di alò ale déén, na manla, “Tulenam gami ku kilen

kagdohò i manam gine, na i tan ilè gugmadèmi i bang kasfuléam na i gusen i banwe.”

<sup>4</sup> Na tmimel Dyisas, manan, “Too gamu fgeye du fye là gamu mgebe i dad to tamdò kakakéng, <sup>5</sup> du dee kadang dad to kel flingu mebe i dagitgu, manla, ‘Agu sa Krayst, i Mgalék Dwata.’ Na too dee dad to kadang mafgaw mdà di manla. <sup>6</sup> Na lingeyu kadang nun dad kasfati mdadong di gamu na dad santulen gablà di kasfati di dademe banwe, bay nang gamu likò, du glut muna kel kdee ani, bay ise ku éñ gusen i banwe. <sup>7</sup> Hae, du sfati kadang dad sahal to na i dad sahal banwe. Na mkel i kbitil na dad linol di dademe dad banwe. <sup>8</sup> Kabay i kdee ani alò katbù i dad kaflayam, salngad di kagkah i libun maltien ku lyon lbanad i tienan, bay là fa kel i too katdukan.

<sup>9</sup> “Na di bang éñ, kanfè gamu i dad to na nebela gamu di dad ganlalla du fanlayamla, na fnatila gamu. Knang gamu nawa i kdee to du gamu dad togu. <sup>10</sup> Na di bang éñ, nun dee to kmagol i kafaglutla di deg, na baling ale sangkal na snang nawa. <sup>11</sup> Na dee kel dad to flingu tmugad i Tnalù Dwata, na fangawla dee dad to. <sup>12</sup> Na du matnù i kdee sasè, taman tatno kasakdo i dee dad to. <sup>13</sup> Kabay ku simto gamtayud kel di gusen, galwà kenen. <sup>14</sup> Na silang kel gusen i banwe ku tagatdò i Fye Tulen gablà di kagot Dwata di klamang banwe du fye mlinge kdee bung to di tah tanà i kaglutan.”

*I dad ilè tamdadong gusen i banwe  
(Mark 13:14-23; Luk 21:20-24)*

<sup>15</sup> “Na teenyu kadang i too gamlikò gal falmo, tadag di Gumnè Dwata, dunan i gman Dwata



fagu di tugadan Danyél. (Gamu masa ani, tooyu fandam du fye glabatyu.) <sup>16</sup> Na ku teenyu i too gamlikò éñ, ku déén gamu di Dyudiya mila gamu di dad bulul. <sup>17</sup> Na ku nun to déén di lwà nang kenen fusuk di gumnean du mwè balù i tan. <sup>18</sup> Na salngad i to mimò di nligon, nang nan mulê funa du mwè i klawehan. <sup>19</sup> Di bang éñ kadang, too magakdo i dad libun maltien na dad to nun malnak ngà tmutù. <sup>20</sup> Taman too gamu dmasal du fye là kel i kilayu di bang ksasè tanà ku demen di Duh Kaftud. <sup>21</sup> Hae, du balù tan ksasè i dad kaflayam mkel mdà di katbù i banwe kel di duh ani, landè gasngad di ksasè ani. <sup>22</sup> Kabay fanfukal Dwata i klo i bong kaflayam ani, du ku là, landè to gtagak mto. I duenan fafukal i bang ani du too bong nawan i dad to tamgalékan.

<sup>23</sup> “Di bang éñ ku nun to mangman di gamu, ‘Neyeyu, dini Krayst, i Mgalék Dwata!’ ku demen, manan, ‘Ditù kenen!’ nang gamu faglut, <sup>24</sup> du di bang éñ, dee to msut flingu na ale kun, Krayst, i Mgalék Dwata. Na man dademe, ale kun, tugad Dwata, bay ise. Na mimò ale dad bong tnikeng na dad ilè ktulusla, du ku nun kibòla kayèla ku mafgaw i kdee to balù i dad to mgalék Dwata. <sup>25</sup> Tagmangu kdee ani di gamu di laan fa kel, taman fgeye gamu.

<sup>26</sup> “Na ku nun mangman di gamu, ‘Neyeyu, tadtù Krayst di banwe landè to mnè déén,’ nang gamu salu ditù. Na ku manla, ‘Neyeyu, dini di lam gusalbunin,’ nangyu fnaglut. <sup>27</sup> Hae, du i kasfulègu kadang, agu i dnagit Tingà To, too teen gambet i silà magtuyal i klamang langit mdà di

gusut i duh kel di gusdafan.

<sup>28</sup> “Too gdohò kdee i gmangu ani, du too glut i gal gman, ku nè gugilè i mati, déén sa i gustifun i dad wak du knaanla.”

*I kagkah i langit di kasfulê Dyisas  
(Mark 13:24-27; Luk 21:25-28)*

<sup>29</sup> Na man Dyisas, “Kafnge i dad kaflayam én, mbaling kifu i duh,  
na là nan mneng i bulen,  
na tatek i dad blatik mdà di langit,  
na gasyat i kdee mnè di langit di tagnè dalanla.

<sup>30</sup> “Kafnge én, msut di langit ilè kasfulê Tingà To, na sdulê mlanu dad to mdà di kdee banwe di tah tanà di kitela deg, i dnagit Tingà To, tufa di lam i labun di ksalugu dini magin i bong eneg na kneng mdà di kdatahgu. <sup>31</sup> Kafnge én, nun bong uni i twang na dekgu i dad kasaligan Dwata ditù di kdee suluk i banwe du santifunla i kdee dad to mgalék Dwata mdà di kdee banwe dini di tah tanà.”

*I fléd gablà di dad ilè i kasfulê Dyisas  
(Mark 13:28-31; Luk 21:29-33)*

<sup>32</sup> Na man Dyisas, “Satu gugmadèyu kagkah i tanà di kayu fig. Ku tmubad na tambù dmoon gadèyu too mdadong nan i bang kafye tanà. <sup>33</sup> Na salngad én, ku tateenyu takel i dad ilè mangu gamu gine, gadèyu tamdadong nan i kasfulêgu, salngad ku tatadag agu di bà takab. <sup>34</sup> Tulengu gamu i kaglutan, kel kadang kdee ani di là fa mati i kdee dad to di bang ani. <sup>35</sup> Matlas i langit na tanà, bay là matlas i tnalùgu kel di landè sen.”

*Landè to gmadè i duh kasfulê Dyisas  
(Mark 13:32-37; Luk 17:26-30, 34-36)*

<sup>36</sup> “Kabay landè to gmadè i duh ku demen i too bang kasfulêgu, balù i dad kasaligan Dwata di langit ku demen deg, i Tingà Dwata, du alò Màm gmadè dun. <sup>37</sup> I kagkah i dad to di kasfulê i dnagit Tingà To, salngad i kagkah dad to di bang Nowa, <sup>38</sup> du di là fa kel i bong dunuk di dale landè fandam i dad to i fan kel, taman é n nimòla kmaan, na minum, na mwè yaan, na fwèla yaan dad ngàla kel di kfusuk Nowa di bong awengan. <sup>39</sup> Silang ale gmadè, di kakel i bong dunuk i mlimas dale. Na gambet ani kagkah di kasfulêgu, agu i dnagit Tingà To. <sup>40</sup> Di kakelgu nun lwe to mimò di tanàla, na nwè satu, bay i satu mtagak. <sup>41</sup> Nun lwe libun gmiling, na nwè satu, bay i satu mtagak.

<sup>42</sup> “Taman too gamu fgeye du làyu gadè ku kilen i duh kasfulêgu, agu i Amuyu. <sup>43</sup> Ani fandamyu, ku tagadè i mfun gumnè i bang kakel i to tmaku, laan kudang bay fgeye du fye là gfusuk i to tmaku di gumnean. <sup>44</sup> Taman salngad gamu, too gamu fatlagad, du agu, i dnagit Tingà To, kel di bang i man nawayu ise fa bang kakelgu.”

*I lwe bung salig fatan i kasfulê amula  
(Luk 12:41-48)*

<sup>45</sup> Na man Dyisas, “Simto i salig too gsalig na too fulung? Dunan i salig gufagot i amun i dademe dad saligan, du fye nalelan dale i knaanla ku tabang kablé dun. <sup>46</sup> Too nun kafye i salig di kakel i amun ku teenan kenen mimò i fimò kenen. <sup>47</sup> Tulengu gamu i kaglutan, ku ani teenan, fagotan i saligan ani i kdee dad knunan. <sup>48</sup> Kabay,

ku sasè baling i saligan ani, na manan di kton, ‘A, mlo fa kulê i amugu,’<sup>49</sup> na tanbuan fatduk i dade-men dad salig, na too kenen kmaan na minum di saféd i dad to flangal.<sup>50</sup> Na ku én nimoan, ani sa mkel di kenen. Samfulê i amun di bang i laan gadè dun na laan fadam ku kel.<sup>51</sup> Na i kibò i amun kenen, toon fanlayam, na fakufan kenen di gaslok i dademe to flingu ale fye to, déén di gumlanula na gukminggat i kifanla.”

## 25

### *I fléd gablà di sfalò sawang libun*

<sup>1</sup> Na fadlug Dyisas talù, manan, “Én guflingengu i kagot Dwata di bang kasfulêgu, di sfalò sawang libun. Nwèla dad salòla, du snitongla i lagi sandeme.<sup>2</sup> Lime ale i là fulung faldam, na lime fulung faldam.<sup>3</sup> I lime là fulung faldam, nebela i salòla, bay landè nebela tnù fngalola.<sup>4</sup> Kabay i dad libun fulung faldam nebela dad salòla na nun nebela tnù fngalo.<sup>5</sup> Na du léét kel i lagi sandeme snitongla, taman kdeela malkudang na fles ale kudang.

<sup>6</sup> “Na di tngà butang, nun lingela tamlo, manan, ‘Takel i lagi sandeme. Lamwà gamu na snitongyu!’<sup>7</sup> Na mukat i dad sawang libun na fatlagadla i dad salòla.<sup>8</sup> Na talù i lime libun là fulung faldam di dademela fulung faldam, manla, ‘Banléyu gami tukay fngaloyu du tafan mati dad salòmi.’

<sup>9</sup> “Kabay tmimel dad fulung faldam, manla, ‘Landè kibòmi du ken là gablà i fngalomi ku banlémi gamu. Mdà gamu salu di dad to fabli du mayad fngalo, fye nun salòyu.’

<sup>10</sup> “Taman tamdà ale mayad fngalo, na di slengla ditù takel i lagi sandeme. Na i lime sawang libun tagatlagad, magin salu di kasdeme. Na di kag-fusukla tnakab sa i takab.

<sup>11</sup> “Na là mlo takel i dademe sawang libun, na manla, ‘E Amu! Amu, begam nukà gami i takab!’

<sup>12</sup> “Kabay tmimel kenen, manan, ‘Tulengu gamu i kaglutàn, làgu gamu dilè!’ ”

<sup>13</sup> Na man Dyisas, “Taman too gamu fgeye du salngad gamu ani, làyu gadè i duh na i too bang kasfulêgu.”

*I fléd gablà di tlu salig*  
(Luk 19:11-27)

<sup>14</sup> Na man Dyisas, “Nun fa guflingengu i kagot Dwata di satu to fan mdà magu, na tlon i dad saligan na fagotan dale dad knunan. <sup>15</sup> Di satu blén lime libu filak, na di satu lwe libu, na di satu mlibu. Én blén kat to i kalbong gaganan nagot. Na kafnge én, mdà kenen. <sup>16</sup> I salig fagotan i lime libu gasil mdà na fagun filak di nimò, na i uléan lime libu. <sup>17</sup> Na salngad én kibò i to fagotan lwe libu filak, na i uléan lwe libu filak. <sup>18</sup> Kabay i to fagotan mlibu filak tabalingan buni. Makol kenen di tanà na lbangan i filak tafagot amun kenen.

<sup>19</sup> “Na too mlo klo i amula mulê. Kakelan, neyen i filak tafagotan dad saligan. <sup>20</sup> Na i salig fagotan lime libu filak salu déén na blén i lime libu filak ulé i blé kenen. Na manan, ‘Amu, tafagotam deg lime libu filak, neyem ani i lime libu gatnùgu di filak blém deg.’

<sup>21</sup> “Na man i amun di kenen, ‘Too fye i nimoam! Too ge fye na gsalig. Too ge gsalig di tukay fagotgu

ge, taman ani, fagotgu ge i bong. Fusuk ge dini, na fakuf ge di klehewgu.’

<sup>22</sup> “Na lêman salu ditù i to fagotan lwe libu, na manan, ‘Amu, tafagotam deg lwe libu filak, neyem ani lwe libu gatnùgu di filak blém deg.’

<sup>23</sup> “Na man i amun di kenen, ‘Too fye i nimoam! Too ge fye na gsalig. Too ge gsalig di tukay fagotgu ge, taman ani, fagotgu ge bong. Fusuk ge dini na fakuf ge di klehewgu.’

<sup>24</sup> “Kafnge én, salu ditù di amun i to tafagotan i mlibu filak. Na manan, kun, ‘Amu, gadègu too ge labè. Hae, du kamtu ge ise ge fla, na galam nwè i ise ge fule. <sup>25</sup> Taman likò agu ge, na bunigu i filak fagotam deg di lam i tanà. Neyem, ani filakam!’

<sup>26</sup> “Na én man i amun di kenen, ‘Too ge sasè na mataka! Man nawam kadì kantugu i ise deg fla na nwègu i ise deg fule. <sup>27</sup> Na kan ku laam kah i filakgu di bangku du fye gasfulê di deg na nun tingaan?

<sup>28</sup> “ ‘Nwèyu di kenen i mlibu, na bléyu di salig i nun sfalò libu. <sup>29</sup> Du ku simto to gsalig di fagotgu kenen, tananùgu i fagotgu du fye too bong. Kabay ku simto là gsalig, nawì di kenen balù i tukay tafagot di kenen.\* <sup>30</sup> Na i salig landè gukmamu batyu ditù di lwà di gukmifun, déén di gumlanun na gukminggat i kifanan.’ ”

### *I kukum Dyisas i dad to di kasfuléan*

<sup>31</sup> Na fadlug Dyisas talù, manan, “Di kasfulêgu kadang, agu i dnagit Tingà To gagin i bong

---

\* **25:29** Satu kubad ani dunan: Du i to nun, tananù i nfunan, bay i to landè alì, nawì balù i tukay di kenen.

kdatahgu, magin deg i dad kasaligan Dwata. Na di bang é n, sudeng agu di gusudeng i mdatah hari. <sup>32</sup> Na i kdee dad to di tah tanà santifun di kanfegu. Na sansahalg u ale gambet i to mifat i bilibili ku sansahalan i dad bilibili di dad kambing. <sup>33</sup> É n dad to matlu flingengu di bilibili fkahgu gsen di kwanangu, na i dad là matlu flingengu di dad kambing fkahgu gsen di ibenggu.

<sup>34</sup> “Kafnge é n, agu, i Hari, talù agu di dad to gsen di kwanangu, mangu, ‘Gam u, dad gamdawat i kafye mà gu, salu gamu dini di deg, na dnawaty u i kagot tagaan gamu mdà di kgimò i banwe. <sup>35</sup> Gdawatyu ani du di kbitilgu tafankaanyu agu, di kalinungu tafninumyu agu, di là kdilèyu deg tafyakyu agu di gumnèyu, <sup>36</sup> di klandè klawehgu, tabanlèyu agu, di knun tdukgu, tanifatyu agu, di bnilinggù agu tanlauyyu agu.’

<sup>37</sup> “Na smalek i dad to matlu, manla, ‘Amu, kilen kitemi ge bitil na fankaanmi ge, ku demen malinum, na fninummi ge? <sup>38</sup> Kilen là kdilèmi ge na fyakmi ge di gumnèmi? Kilen klandè klaweham na banlèmi ge? <sup>39</sup> Na kilen kitemi ge nun tduk ku demen bnilinggù na nlauymi ge?’

<sup>40</sup> “Na agu, i Hari, tmimel agu, mangu, ‘Tulengu gamu i kaglut an, ku tan i nimòyu di satu flanekgu balù ku too mdanà to, salngad ku di deg i gumimòyu dun.’

<sup>41</sup> “Kafnge é n, ani mangu di dad to gsen di ibenggu, ‘Fawag gamu di deg, gamu dad to sasè tanukum Dwata. Ditù gamu di lanaw lifoh landè gumatin tatagà Dwata du gumlayam ku Satanas na dad kasaliganan, <sup>42</sup> du di kbitilgu làyu agu

fankaan, na di kalinumgu làyu agu fninum. <sup>43</sup> Di là kdilè deg làyu agu fyak di gumnèyu. Di klandè klawehgu làyu agu banlé. Di knun tdukgu na bnilinggù agu, làyu agu nlauy.’

<sup>44</sup> “Na i dad to é n kadang, smalek ale, manla, ‘Amu, kilen kitemi ge bitil, demen malinum, demen di banwe landè dmilè ge, demen landè klaweh, demen nun tduk, ku demen bnilinggù, na làmi ge ttabeng?’

<sup>45</sup> “Na tnmelgu ale kadang, mangu, ‘Tulengu gamu i kaglutu, ku tan i làyu nimò di dad flanekegu balù too mdanà to, salngad ku làyu nimò di deg.’ É n mangu di dale.

<sup>46</sup> “Na i dad to é n, ditù gusalula di gumaflayamla landè sen, bay i dad to matlu banlé ale nawa landè sen.”

## 26

### *Ifan nimò di ku Dyisas*

*(Mark 14:1-2; Luk 22:1-2; Dyan 11:45-53)*

<sup>1</sup> Di kafnge Dyisas tamdò i kdee ani, manan di dad gal mlalò kenen, <sup>2</sup> “Gadèyu lwe duh ani i fista Duh Kaglius, na agu, i dnagit Tingà To, blé di agot i dad to du fye nlansangla di krus.”

<sup>3</sup> Na di bang kman Dyisas ani stifun i dad ulu i dad bà di Dwata na dad tua gal mebe dad Dyu déén di bong gumnè Kayafas, i gumdatah i dad bà di Dwata. <sup>4</sup> Stulen ale ku tan i fye kibòla kamfè ku Dyisas du fye fnatila kenen di landè to gmadè dun.

<sup>5</sup> Kabay manla, “Nangito nimò ani di bang i fista du ken flabè i dee dad to na too ale smamuk.”



*I kakok satu libun i fangbun di ulu Dyisas  
(Mark 14:3-9; Dyan 12:1-8)*

<sup>6</sup> Na déén Dyisas di tukay banwe Bétani di gumnè Simon, i to tanfig. <sup>7</sup> Na di slengla kmaan, nun satu libun kel déén mebe sabuy batu fnò fangbun too mabtas, na kokan ani di ulu Dyisas. <sup>8</sup> Kite i dad gal mlalò ku Dyisas i nimoan, flabè ale. Na manla, “Kan ku falmon i fangbun? <sup>9</sup> Fye fa ku fablin, du bong gwean fakay blé di dad to landè.”

<sup>10</sup> Kabay gadè Dyisas i manla, taman manan di dale, “Kan ku snamukyu libun ani? Du too fye nimoan di deg. <sup>11</sup> Gal nun dad to landè di safédyu fakayyu ttabeng, bay deg, là agu mlo mnè di safédyu. <sup>12</sup> Di kakokan i fangbun gine di deg, falan fatlagad lawehgu du lband. <sup>13</sup> Na tulengu gamu i kaglutu, balù nè gutamdò i Fye Tulen gablà di deg di tah tanà ani, lê tulen nimò libun ani du fye gafaldam kenen.”

*I kafakfè Dyudas ku Dyisas  
(Mark 14:10-11; Luk 22:3-6)*

<sup>14</sup> Kafnge éen, nun satu di dad sfalò lwe to gal mlalò ku Dyisas dnagit ku Dyudas Iskariyot salu di dad ulu i dad bà di Dwata, <sup>15</sup> na manan, “Tan bléyu deg ku blégu di gamu Dyisas?” Na bléla kenen tlu falò batù filakla salafi. <sup>16</sup> Na mdà di bang éen, mngabal Dyudas i kfagu mlé ku Dyisas di agotla.\*

*I sangal kakaan ale Dyisas di Duh Kaglius  
(Mark 14:12-21; Luk 22:7-14, 21-23; Dyan 13:21-30)*

---

\* **26:16** Satu kubad ani dunan: mngabal Dyudas i kfagu mangkal kenen.

17 Di tnanin duh i Fista i Kakaan i Fan Landè Falnok Dun, fdadong dad gal mlalò ku Dyisas di kenen, na smalek ale, manla, “Nè kayeam gufatlagadmi knaan di Duh Kaglius?”

18 Na man Dyisas di dale, “Salu gamu di satu to mnè di syudad, na manyu di kenen, ‘Man i To Tamdò takel i bangan gdohò i kdee tagmanan, na én gukmaan knaan i Duh Kaglius di gumneam magin dad gal mlalò kenen.’ ” 19 Na nimenla i kdee gman Dyisas di dale. Na ditù gufatlagadla knaanla i Duh Kaglius.

20 Na di butang én, sudeng Dyisas na dad sfalò lwe gal mlalò kenen du kmaan. 21 Na di slengla kmaan, talù Dyisas, manan, “Tulengu gamu i kaglutan, nun kadang satu di gamu mangkal deg di fati.”

22 Na too mlidù nawala, na kat satu dale smalek kenen, manla, “Amu, agu kè i manam?”

23 Na tmimel Dyisas, manan, “I to msong deg, én mangkal deg. 24 Too glut, agu i dnagit Tingà To, gsalu di fati salngad i tagsulat gablà di deg. Kabay too magakdo kadang i to mangkal deg. Fye fa baling di to én ku laan sut.”

25 Na talù Dyudas, i mangkal ku Dyisas, manan, “Amu, agu dé i mangkal ge?” Na man Dyisas, “Tamanam sa.”

*I kfafaldam Dyisas i kfatin fagu di fan na ninum (Mark 14:22-26; Luk 22:15-20; 1 Korintu 11:23-25)*

26 Na di slengla kmaan, nwè Dyisas i fan, na funa dmasal mlé fye di Dwata, na snatngaan na blén di dad gal mlalò kenen, manan, “Nwèyu ani, na knaanyu du ani lawehgu.”

<sup>27</sup> Kafnge é<sup>n</sup>, nwean i ninum, na mlé fye di Dwata, na blén di dale, manan, “Sansinumyu ani, kdeeyu, <sup>28</sup> du ani litègu falohgu du fye nlifet Dwata dad salà i dee dad to, du litègu i kaglut di falami dalan i fakang Dwata falwà i dad to. <sup>29</sup> Na tulengu gamu, là agu lêman minum i nimum† ani kel di duh ksasatuito lêman di kagot i Màgu na minum ito i falami binu.”

<sup>30</sup> Kafnge é<sup>n</sup> mlingag ale i satu lingag dmayen Dwata na kafngela mlingag mdà ale salu di bulul Olib.

*I kafgadè Dyisas gablà di ktagak dad mlalò kenen*

*(Mark 14:27-31; Luk 22:31-34; Dyan 13:36-38)*

<sup>31</sup> Na talù Dyisas di dad gal mlalò kenen, manan, “Kadang butang ani, kdeeyu baling mila na tmagak deg, du man Dwata di Tnaluan, manan, ‘Fnatigu i to gal mifat dad bilibili, na sbalét dad bilibilin.’

<sup>32</sup> Kabay ku tamté<sup>k</sup> agu mdà di fati, muna agu di gamu salu di Galili.”

<sup>33</sup> Na man Fiter di ku Dyisas, “Balù mila i kdee dademe, bay làta ge tagak.”

<sup>34</sup> Na man Dyisas di ku Fiter, “Tulengu ge i kaglut<sup>an</sup>, kadang butang ani, di là fa kamleet i anuk, tmulen ge tlu dulé i laam agu dilè.”

<sup>35</sup> Kabay man Fiter, “Balù ku mati agu magin ge, là agu tmulen kéng i là agu dmi<sup>lè</sup> ge.” Na salngad i man kdee dad gal mlalò ku Dyisas.

*I kdasal Dyisas di Gétsémani*

*(Mark 14:32-42; Luk 22:39-46)*

---

† **26:29** I ninum ani, dunan satu binu nimò mdà di yéél i bunge grép.

<sup>36</sup> Na fadlug ale Dyisas salu di satu tanà dnagit Gétsemani, na manan di dad gal mlalò kenen, “Sudeng gamu dini di lamgu dmasal ditù.” <sup>37</sup> Na faginan Fiter na i lwe dad ngà Sébidi salu di gudmasalan. Na tambù én too mlidù na too msamuk nawan. <sup>38</sup> Na manan di tlu magin kenen, “I klidù nawagu ani too blat gambet tafan agu mati. Mnè gamu dini, na too gamu fgeye dmeme deg.”

<sup>39</sup> Na salu kenen di là too mawag, na tatì kenen lamfan di tanà na dmasal, manan, “E Mâ, gaganam i kdee, taman begam nwè i kaflayam fangu nagu ani. Kabay balù én i deg knayè, toom dnohò i ge knayè.”

<sup>40</sup> Kafngen dmasal, samfulê kenen di dad gal mlalò kenen faginan gine, na teenan ale kudang. Na snalekan Fiter, manan, “Là ge kè gamtayud fgeye dmeme deg balù là mlo alò? <sup>41</sup> Too gamu fgeye na dmasal fye là gamu fisan di tilew, du balù mayè i nawayu mimò fye, bay nun klungay i lawehyu mimò dun.”

<sup>42</sup> Na lêman samfulê Dyisas di gudmasalan, na manan, “E Mâ, ku landè kibò mwè i kaflayam fan kel ani silang ku nagugu, fye ku gdohò i ge knayè.”

<sup>43</sup> Na lêman kenen samfulê na lêmanan ale teen gkudang du too ale malkudang. <sup>44</sup> Na lêman ale tngak Dyisas, na dmasal di gatlung dulê na salngad i manan.

<sup>45</sup> Na lêman samfulê Dyisas di safédla, na manan di dale, “Tan, kudang gamu fa na ftud? Neyeyu, takel i bang kablé deg, i dnagit Tingà To, di agot i dad to gamsalà. <sup>46</sup> Mték gamu du mdà ito. Neyeyu, tadini i to mangkal deg.”

*I kalfè ku Dyisas*

*(Mark 14:43-50; Luk 22:47-53; Dyan 18:3-12)*

<sup>47</sup> Di slengan fa talù takel Dyudas, satu di sfalò lwe gal mlalò kenen. Na too dee dad to magin kenen mebe dad sundang na dad bunal. Tamdek dale i dad ulu dad bà di Dwata na dad tua gal mebe dad Dyu. <sup>48</sup> Na nun ilè tatulen i to mangkal di dad to faginan kamfè ku Dyisas, manan, “I to nalakgu kadang, én i to fangabalyu. Kanfèyu kenen!”

<sup>49</sup> Taman kakel ale Dyudas déén, gasil kenen fdadong di ku Dyisas, manan, “E Amu!” Na nalakan Dyisas.

<sup>50</sup> Na man Dyisas di kenen, “Lew, fnaflalam i kayeam nimò.”

Kafnge én, fdadong i dad to magin ku Dyudas, na kanfèla Dyisas na toola nafas. <sup>51</sup> Kabay satu to magin ku Dyisas nsoan i sundangan, na tniben i lifan i gumdatah dad bà di Dwata, na masfek i bali klingen.

<sup>52</sup> Na man Dyisas di to én, “Fuléam di lumaan i sundangam du ku simto to magot tek, mati fagu di tek. <sup>53</sup> Laam kè gadè ku mni agu tabeng di Màngu Dwata, feben sa dini dee libu dad kasaliganan du tmabeng deg? <sup>54</sup> Kabay ku én i nimògu, là gdohò i kdee gman Dwata di Tnaluan gablà di gnagugu.”

<sup>55</sup> Na talù Dyisas di dee dad to kamfè kenen, manan, “Kan, to tmaku agu kè du mebe gamu sundang na bunal di kalfèyu deg? Klit duh sudeng agu tamdò di Bong Gumnè Dwata na làyu agu kanfè. <sup>56</sup> Kabay én duen mgimò kdee ani du fye gdohò i tagsulat dad tugad Dwata.”

Na di kman Dyisas ani i kdee dad gal mlalò kenen tngakla kenen na mila.

*I kebe ku Dyisas di muna i mdatah mukum dad Dyu*

*(Mark 14:53-65; Luk 22:54-55, 63-71; Dyan 18:13-14, 19-24)*

<sup>57</sup> Na i dad to kamfè ku Dyisas nebela kenen di bong gumnè Kayafas, i gumdatah di dad bà di Dwata. Na tastifun déén i dad to gal mukum, dunan dad tamdò i dad flalò blé Dwata fagu di ku Mosis na i dad tua gal mebe dad Dyu. <sup>58</sup> Na mlalò Fiter kel di nasel i bong gumnè i gumdatah i dad bà di Dwata, bay fawag di fulé. Kakelan déén fusuk kenen na fasbool sudeng di saféd i dad to munung du fye gadean i mkel di ku Dyisas.

<sup>59</sup> Na i dad ulu di dad bà di Dwata na i dademe ganlal gal mukum tastifun déén, mngabal ale kfagu fsalà ku Dyisas, balù là glut, gumdàla mati kenen. <sup>60</sup> Kabay balù too dee tmulen kakakéng gablà di ku Dyisas knean landè teenla salaam. Kabay di gusenana nun lwe to salu di muna, <sup>61</sup> na manla, “Én gman i to ani, ‘Gagangu lambà i Bong Gumnè Dwata na lêman ftadag dun di lam tlu duh.’”

<sup>62</sup> Kafnge éen, tadag i gumdatah i dad bà di Dwata na snalekan Dyisas, manan, “Landè kè timelam di kdee tulenla salaam ani?” <sup>63</sup> Kabay là tmimel Dyisas balù landè salaam.

Taman lêman talù i gumdatah dad bà di Dwata di kenen, manan, “Fagu di dagit Dwata too mto, smafà ge, na tulenam gami ku ge i Mgalék Dwata, dunan i Tingaan?”

<sup>64</sup> Na man Dyisas di kenen, “Tagmanam sa! Kabay tulengu gamu, di fulé duh teenyu agu, i dnagit Tingà To, sudeng di kwanan i mdatah ganlal, dunan Dwata Too Mtulus, di ksalugu dini di lam i labun mdà di langit!”

<sup>65</sup> Na di kaklinge gumdatah i dad bà di Dwata i gman Dyisas ani, knaséan klawehan du ilè knangan i man Dyisas, na manan, “E tay, tafsalngadan kton di Dwata! Landè kamuito dademe to mlé kenen salà, du talingeyu kafalmon Dwata. <sup>66</sup> I tan sa kukumyu kenen?”

Na tmimel i dademen, manla, “Gablà kenen fnati.”

<sup>67</sup> Kafnge éen, dnulàla i baweh Dyisas, na snuntukla, na dademe snafangla matan na snamfakla, <sup>68</sup> na manla, “Na ge, Mgalék Dwata, manam sa kun ku simto smamfak ge!”

### *I kbalew Fiter*

*(Mark 14:66-72; Luk 22:56-62; Dyan 18:15-18, 25-27)*

<sup>69</sup> Na ditù fa gusudeng Fiter di nasel i gumnè. Na fdadong di kenen satu libun gal dek i gumdatah i dad bà di Dwata, na manan, “Ge i satu gal magin ku Dyisas mdà di Galili.”

<sup>70</sup> Kabay baling malew Fiter di muna i kdee dad to déén, manan, “Làgu gadè i manam.”

<sup>71</sup> Na salu Fiter di bà gufusuk i nasel. Na lêman nun libun gal dek mite kenen, na manan di dad to déén, “To ani satu gal magin ku Dyisas mdà di Nasarét.”

<sup>72</sup> Kabay lêman malew Fiter na smafà, na manan, “Làgu dilè i to éen!”

<sup>73</sup> Na di là mlo nun dademe dad to tadag déén fdadong di ku Fiter, na manla, “Too glut sa, ge i satu di dale du dilèmi du mahal uni taluam.”

<sup>74</sup> Na lêman kenen tambù smafà, manan, “Fanlayam agu i Dwata ku tmulen agu kéng. Làgu dilè i to én!”

Na di kmanan én, kamleet i anuk, <sup>75</sup> na gafaldam Fiter i gman Dyisas di kenen, “Di là fa kamleet i anuk tatmulen ge tlu dulê laam agu dilè.” Na lamwà kenen na too mngel.

## 27

### *I kebela ku Dyisas di muna Filat*

*(Mark 15:1; Luk 23:1-2; Dyan 18:28-32)*

<sup>1</sup> Na di too flafus stifun i kdee dad ulu i dad bà di Dwata na dad tua gal mebe dad Dyu du stulen ku i tan kfagula fafati ku Dyisas. <sup>2</sup> Na én nimòla, fbakusla kenen na nebela di ku Filat, i gubirnadór, du fukumla kenen.

### *I kfati Dyudas*

*(Dad Nimò 1:18-19)*

<sup>3</sup> Na Dyudas, i mangkal ku Dyisas, di kgadean too glut tanukum Dyisas di fati too kenen msal, na fuléan i tlu falò batù filak salafi di dad ulu i dad bà di Dwata na dad tua gal mebe dad Dyu, <sup>4</sup> manan, “Gamsalà agu di kablégu i to landè salà di fati.”

Na tmimel ale, manla, “Landè labetmi gami. Ge salà én!”

<sup>5</sup> Taman bat Dyudas i filak tabléla kenen di lam i Bong Gumnè Dwata na mdà. Na fles kenen mikat lial.



<sup>6</sup> Na di kuku i dad ulu di dad bà di Dwata i filak tabat Dyudas, manla, “Mlafà ito i flalò Mosis ku fkahito filak ani di gal gumusek filak di Bong Gumnè Dwata, du ani bayad i kfati satu to.” <sup>7</sup> Taman stulen ale i fye kflagula dun. Na bnayadla satu tanà i gal gumimò kulang tanà du fye gulambangla i dad to magu mdà di mahal banwe, ku mati ale déén. <sup>8</sup> Taman én dagit i tanà én kel di duh ani, dunan i Tanà Litè. <sup>9</sup> Taman gdohò sa i gman Dyérimaya i tugad Dwata, manan, “Nwèla i tlu falò batù filak salafi, i btas knayè dad bel Israél di kbayadla kenen. <sup>10</sup> Na én i bayadla i tanà gumimò kulang tanà, du én i flau Amugu deg.”

*I ksalek Filat ku Dyisas*

*(Mark 15:2-5; Luk 23:3-5; Dyan 18:33-38)*

<sup>11</sup> Na tadag Dyisas di muna Gubirnadador Filat, na smalek Filat, manan, “Ge kè Harì i dad Dyu?”

Na man Dyisas, “Tagmanam sa.” <sup>12</sup> Kabay laan tnmel i kdalam dad ulu i dad bà di Dwata na dad tua gal mebe dad Dyu.

<sup>13</sup> Taman man Filat di kenen, manan, “Man, laam kè linge i kdee dalamla ge?”

<sup>14</sup> Kabay là tmimel Dyisas balù tan i dalamla kenen, na taman too tikeng i gubirnadador.

*I kafalwà ku Barabas na kfati ku Dyisas*

*(Mark 15:6-15; Luk 23:13-25; Dyan 18:39-19:16)*

<sup>15</sup> Na klit fali di bang i fista Duh Kaglius, i tagnè nimò Filat falwaan satu to bnilinggù, ku simto knayè i dad Dyu, én i falwaan. <sup>16</sup> Na di bang én, nun satu to bnilinggù dnagit ku Barabas too mdengeg mdà di dad mgimoan. <sup>17</sup> Taman di

kagastifun i kdee dad to, snalek ale Filat, manan, “Simto kayèyu falwàgu gamu, Barabas ku demen Dyisas, i dnagit Krayst?” <sup>18</sup> Én duenan smalek, du gadè Filat i duen dad ulu i dad Dyu mebe ku Dyisas di kenen du mingà nawala ku Dyisas.

<sup>19</sup> Na di sleng Filat sudeng di gal gumukum nun febe i yaanan kenen fngewe, manan, “Nangam fanlayam i to én, du landè salaan. Hae, du malbutang kamna agu na too msamuk i nawagu gablà di kenen.”

<sup>20</sup> Kabay i dad ulu i dad bà di Dwata na dad tua gal mebe i dad Dyu banlékla i dad to fye fnila di ku Filat falwà Barabas na fnati Dyisas.

<sup>21</sup> Na lêman ale snalek Filat, manan, “Simto di lwe to ani kayèyu falwàgu di gamu?”

Na manla, “Barabas!”

<sup>22</sup> Na smalek Filat, manan, “Na tan i kibògu ku Dyisas, i dnagit Krayst?”

Na tmimel kdeela, manla, “Flansangam di krus!”

<sup>23</sup> Na smalek Filat, manan, “Kan? Tan i salaan?”

Kabay baling matnù i kakitla, manla, “Flansangam kenen di krus!”

<sup>24</sup> Taman gadè Filat landè kiboan, du baling tambù nan mimò samuk i dad to. Na taman mwè kenen yéél na naloban i kmalan di muna i kdee dad to, na manan, “Ise deg tmimel di kfati i to ani. Déén i litean di gamu kmal.”

<sup>25</sup> Na tmimel i kdee dad to, manla, “Hae, gami na dad belmi i tmimel gablà di kfati i to ani.”

<sup>26</sup> Na taman nagin Filat i knayè dad Dyu, na falwaan Barabas di dale. Kabay Dyisas, funan

too faskél, na kafnge én, blén di dad sundalun du flansang di krus.

*I kadoy i dad sundalu ku Dyisas  
(Mark 15:16-20; Dyan 19:2-3)*

<sup>27</sup> Na i dad sundalu, nebela Dyisas di lam i bong gumnè Filat. Na santifunla i kdee dademe sundalu di glibutan. <sup>28</sup> Na nlusla dad klawehan na falsakla kenen i klaweh fulè, du fagbetla kenen hari. <sup>29</sup> Na nlikinla dad walad nun soal, na sukubla di ulun du nimòla kyangenan. Na fagotla kwananan satu tugad gambet i gal nagot i dad hari. Kafnge én, lkuad ale di munan, du snilola, manla, “Too ge mlawil Hari i dad Dy.” <sup>30</sup> Na sandulàla kenen na nwèla lêman i tugad gine du skélla di ulun. <sup>31</sup> Di kafngela smilo kenen lêmanla nlus i klaweh tafalsakla kenen, na falsakla lêman i tagnè klawehan. Na kafnge én, nebela kenen di gumlansangla di krus.

*I klansang ku Dyisas di krus  
(Mark 15:21-32; Luk 23:26-43; Dyan 19:17-27)*

<sup>32</sup> Di kalwàla di Dyérusalém, gsitongla i satu lagi dnagit ku Simon mdà di banwe Sirini, na gnagala mebe i krus Dyisas.

<sup>33</sup> Na salu ale di tukay bulul dnagit Golgota. Na i gumtatek Golgota, dunan banwe i tulun ulu. <sup>34</sup> Kakella ditù banléla kenen binu sanbool bulung féét, bay di kagneman dun, laan fles ninum.

<sup>35</sup> Na kafngela mlansang kenen di krus, sansalella i klawehan fagu di kasbunut du neyela ku simto i dad gamfun dun. <sup>36</sup> Kafnge én, sudeng ale déén na nunungla kenen. <sup>37</sup> Na nun sulat

tmulen i salà dalamla kenen fkahla di tah i ulun, manan, “Ani Dyisas, Harì i dad Dyu.”

<sup>38</sup> Na nun lwe to tmaku nlansangla di saféd Dyisas satu gsen di kwananan na satu gsen di ibengan. <sup>39</sup> Na i dad to magu mlius déén toola snilo Dyisas na kmiling ale du fanngulêla kenen, <sup>40</sup> manla, “Ge kun, i to gmagan lambà i Bong Gumnè Dwata na lêman ftadag dun di lam tlu duh, taman falwaam i ktom ku gaganam. Ku ge i Tingà Dwata, tufa ge mdà di krus!”

<sup>41</sup> Na salngad nimò i dad ulu di dad bà di Dwata, na dad tamdò dad flalò blé Dwata fagu di ku Mo-sis, na dad tua gal mebe dad Dyu, snilola kenen, <sup>42</sup> manla, “Galan falwà i dademe dad to, bay i kton laan gagan falwà. Kenen kun, i Harì di Israél! Ku gtufa kenen di krus, faglut ito di kenen. <sup>43</sup> Smalig kenen di Dwata du manan kenen Tingà Dwata. Na neyeito ku mayè Dwata falwà kenen!”

<sup>44</sup> Na balù i dad tmaku nlansang di safédan smilo kenen.

### *I kfati Dyisas*

*(Mark 15:33-41; Luk 23:44-49; Dyan 19:28-30)*

<sup>45</sup> Na mdà di ltu i duh mbaling kifu di klamang banwe kel di tngà masol i duh. <sup>46</sup> Na mdadong di tngà masol i duh falbong Dyisas taluan, manan, “Iloy, Iloy, lama sabaktani?” I gumtatek ani dunan, “È Dwatagu, Dwatagu, tan i duenam tma-gak deg?”

<sup>47</sup> Na nun dad to tadag déén mlinge i talù Dyisas, na balingla man, “È tatlon llaydya.”

<sup>48</sup> Na nun satu to déén faflal lamnab i galla fsaf yéél di masam binu, na fkahan di tukè i kayu,

na ulukan di ku Dyisas fye ninuman. <sup>49</sup> Kabay man i dademe, “Tayò fa, neyeito funa ku salu dini llaydya du falwà kenen.”

<sup>50</sup> Na lêman falbong Dyisas i taluan na fles mati.

<sup>51</sup> Na salngan én, i bong kurtina déén di lam i Bong Gumnè Dwata matngà kasê mdà di tah kel di dungan. Na mlinol i tanà, na bgang dad malbang batu. <sup>52</sup> Mgukà i dad gulambang, na mték mdà di fati dee dad muna to faglut di Dwata. <sup>53</sup> Lamwà ale fdu di lam dad lbang na kafnge i kték Dyisas salu ale di Dyérusalém, na dee dad to mite dale.

<sup>54</sup> Na i kafitan dad sundalu na dad sundalu magin kenen di kunungan ku Dyisas, lyola i bong linol, na teenla i kdee mkel, taman too ale likò, na manla, “Too glut, kenen i Tingà Dwata.”

<sup>55</sup> Na nun fa dee libun ditù di gumawagan du beg ale meye ku Dyisas. Tagnè ale magin ku Dyisas mdà di Galili du galla kenen ttabeng. <sup>56</sup> Na gakuf di dad libun ani, Méri Magdalin, na Méri i yê Dyém na Dyosif, na yê i dad ngà Sébidi.

### *I kalbang ku Dyisas*

*(Mark 15:42-47; Luk 23:50-56; Dyan 19:38-42)*

<sup>57</sup> Di tafan kasdaf i duh kel déén satu lagi i nun bong knun mdà di banwe Arimatiya dnagit ku Dyosif, na kenen satu gal mlalò ku Dyisas. <sup>58</sup> Na salu kenen di ku Gubirnador Filat du fnin i laweh Dyisas du lbang. Na mdek Filat, fye blé lawehan di ku Dyosif. <sup>59</sup> Taman nwè Dyosif i lawehan mdà di krus, na nlabédan falami safut bukay, <sup>60</sup> na fkahan di kenen gulambang i falamin nsol di lfidas di gugdak i bulul. Kafnge én, flulidan déén satu bong batu du nsangan i bà gufusuk i lbang, na mdà

kenen. <sup>61</sup> Na Méri Magdalin na i satu Méri sudeng mdadong déén meye i nimòla di gulambang ku Dyisas.

### *I kfunungla i lbang Dyisas*

<sup>62</sup> Di tmadol duh, dunan i Duh Kaftud, salu i dad ulu i dad bà di Dwata na dad Farisi di ku Filat. <sup>63</sup> Na manla, “Gafaldammi nun man i to gal mgaw atù di là fa mati, manan, ‘Nték agu di gatlun duh.’ <sup>64</sup> Taman fye ku toom funung i lbulan kel di gatlun duh, du ken tnaku i dad mlalò kenen i lawehan, na kafnge éñ, tatìla man di dad to, tamték kenen mdà di fati. Na baling matnù fa kafgawla i dad to mdà di kéngla ani di muna kafgawla.”

<sup>65</sup> Taman man Filat di dale, “Na, faginyu ditù dad to munung, na tooyu fanse kafgagidyu i lbang.” <sup>66</sup> Na taman salu ale di lbang Dyisas du fangagidla. Fankahla i gafgat di batu sang i lbang gudmilèla ku nun mutik dun. Na tnagakla déén dad to munung.

## 28

### *I kték Dyisas mdà di fati*

*(Mark 16:1-10; Luk 24:1-12; Dyan 20:1-10)*

<sup>1</sup> Kafnge i Duh Kaftud di too flafus Linggu, mdà ale Méri Magdalin na i satu Méri salu di lbang du neyela.

<sup>2</sup> Na nun bong linol du nun kasaligan Dwata fdanà mdà di langit, na flulidan i bong batu sang i lbang, na sudeng kenen di tahan. <sup>3</sup> Gambet silà i kbawehan na too bukay i klawehan. <sup>4</sup> Na i dad to munung i lbang tatì ale kankal mdà di klikòla kenen, na gambet ale i dad to mati.

<sup>5</sup> Kabay man i kasaligan di lwe libun, “Nang gamu likò. Gadègu én fanngabalyu Dyisas, i tanlansangla di krus. <sup>6</sup> Talaan dini du tamték mdà di fati, gambet i tagmanan di gamu. Salu gamu dini na neyeyu i gufilèla kenen, <sup>7</sup> na gasil gamu salu di dad gal mlalò kenen, na tnulenyu ale tamték kenen mdà di fati, na tamuna kenen di gamu salu di Galili. Ditù gusmiteyu kenen. Én sa i tulengu gamu.”

<sup>8</sup> Taman gasil mdà i dad libun mdà di lbang na likò ale, bay too ale lehew. Na sadlu ale du fye tnulenla i dad gal mlalò ku Dyisas. <sup>9</sup> Na tati ale snitong Dyisas, na manan, “Í ktanak nawa samnagin gamu!” Na fdadong ale di kenen na nagotla i dad blian, na mangamfù ale di kenen. <sup>10</sup> Na man Dyisas di dale, “Nang gamu likò, ditù gamu di dad flanekgu, na dekyu ale salu di Galili na ditù gusmitela deg.”

### *I tulen dad sundalu munung i lbang*

<sup>11</sup> Na di sleng i dad libun magu, nun di dad to munung i lbang salu di syudad, na tnulenla dad ulu i dad bà di Dwata i kdee tamkel. <sup>12</sup> Taman dad ulu i dad bà di Dwata, snitela dad tua i dad Dyu du stulen ale ku tan i kibòla. Na banléla dad to munung bong filak, <sup>13</sup> na manla, “Tnulenyu i dad to, i laweh Dyisas tnaku i dad mlalò kenen di butang di lammi kudang. <sup>14</sup> Na ku linge i gubirnador ani, gami fafye stulen di kenen du fye laan flabè gamu.” <sup>15</sup> Taman nwè i dad munung i filak na nimenla i gman di dale. Na i tulen i dad ulu dad Dyu tatoo mbel di dad Dyu kel di duh ani.

*I kfite Dyisas i kton di dad gal mlalò kenen  
(Mark 16:14-18; Luk 24:36-49; Dyan 20:19-23;  
Dad Nimò 1:6-8)*

<sup>16</sup> Na salu i dad sfalò satu gal mlalò ku Dyisas ditù di Galili di bulul i tagman gufsalu Dyisas dale. <sup>17</sup> Na di kitela kenen, mangamfù ale di kenen, bay nun di dale lwe nawala. <sup>18</sup> Na fdadong Dyisas di dale, na manan, “Tagablé di deg i kdee glal di tah langit na di tah tanà. <sup>19</sup> Taman salu gamu di dad to di kdee dad banwe di tah tanà, na flalòyu ale deg. Na bnunyagyu ale di dagit Dwata Mà, na i Tingà, na i Mtiu Tulus. <sup>20</sup> Na tdòyu ale mimen kdee flalògu gamu. Na nangyu glifet samnagin agu gamu kel di gusen i banwe.”



## **I tnalù dwata New Testament in Blaan, Sarangani**

copyright © 1998 Wycliffe Bible Translators, Inc.

Language: Sarangani Blaan (Blaan, Sarangani)

Translation by: Wycliffe Bible Translators

Contributor: Wycliffe Bible Translators, Inc.

### **Copyright Information**

© 1998, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Blaan, Sarangani

**© 1998, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
efb4a7ef-8c5f-5201-b899-abcaa7a21d0e